

Hasil Sayembara Mengarang

Bahasa Kaili-Ledo

1991

DAFTAR PENULIS CERITA SAYEMBARA

MPOLALOVE	Tahir Sempalogo Umur:50, Pegawai Biromaru
TOPOANA PAPITU	Abdul Muthalib Djaelangkara Umur:30, Karyawan Biromaru
ASU NTE TAVEVE	Edwin Palintorue Umur:15, Siswa SMP Desa Maranata
IBO ANTE BANTILUKU	Demi B. Sarikuna Umur:22, Petani Banpres-Tongoa
TESA TUTURA RANDUA TOPOASU	Lewi Lamanusu Umur:@50, Petani Desa Rejeki
TESA TOBURO BO TOBONGO	P. Lamanusu Umur:@45, Guru SD Desa Maranata
PATESA TONA NJAMBOKO	M.K. Kanjinaba Umur:@40, Petani Desa Rejeki
TUTURA KAJADI NU NGATA	E. W. Lampekui Umur:@50, Petani Desa Rejeki
KAGERO NGATA RARANGGONAU	Hanalia B. Umur:@45, Petani Desa Rejeki
I RAJAMUDA	Tei Sarikuna Umur:@40, Petani Desa Rahmat

PETEVAI NTOTUA KA TONA NOBEREI
Musu D. Tiku
Umur:?, Pegawai
Palu

I UMANTENDE
Lahmudin Yoto
Umur:?, Pegawai
Palu

TATALU TOPOVEGA RAPA
Musu D. Tiku
Umur:?, Pegawai
Palu

LONTARA ANTE DALA NGGATUVUA
Musu D. Tiku
Umur:?, Pegawai
Palu

TADULAKO BULILI
P. Lamanusu
Umur:@45, Guru SD
Desa Maranata

TOPOLINO TOLIA
Demi B. Sarikuna
Umur:22, Petani
Banpres-Tongoa

VALESU ANTE KALIBAMBA
Demi B. Sarikuna
Umur:22, Petani
Banpres-Tongoa

I ALI
Tei Sarikuna
Umur:@40, Petani
Desa Rahmat

PANJAYOKU HAU RI MANGGALAPI
Tei Sarikuna
Umur:@40, Petani
Desa Rahmat

TESA TOPOMPATESI ANANA
Basinati Katimula
Umur:@40, Petani
Desa Rejeki

BENGGA NAJADI NUA	A. Lamangile Lamanusu Umur:35, Petani Banpres-Tongoa
TESA POMPATUDUKI POBEREI	A. Lamangile Lamanusu Umur:35, Petani Banpres-Tongoa
TUTURA POLINJA MANGELO KATUVU BO KABALI KATUVU TORARANGGONAU	A. Lamangile Lamanusu Umur:35, Petani Banpres-Tongoa
TESA PANGEVA NU BALANDA	J. S. Silinawa Labaresi Umur:54, Petani Desa Rejeki
TUTURA ASALA NU KANDEAA.	A. Panggagau Umur:57, Pegawai Toaya (Sindue)
SABANA TAI NU LAGA NATIO	A. Panggagau Umur:57, Pegawai Toaya
PUA NJAMADI NTE I NAGAULA	Ny. Zaitun B. Lawali Umur:37, Pegawai Kec. Dolo
I NGGIBO NTE I YUKU	Rapiah Umur:50?, ? Pevunu

PUA JAMADI NTE I NAGAULA

(dikarang oleh Ny. Zaitun B. Lawali
untuk Sayembara 9-91, Dolo)

Tesa hii, tesa berimba poberei Pua Jamadi nte i Nagaula, randaa gaya, belo lenje damo eva bula dongga, bulua vuri nandate suga kente. I Nagaula nipungi ntinana ra mpomuaka nantau. Tomana namatemo bo itumo nakini rara ntinana nantora ana nagaya lenje.

Eo-eo poviana aga pantanumo. Nipalaisi ntinana hau ri tana popae, i Tobongo, i Topunggu nte i Toburo nibolika mombapasiayu pangande i Nagaula ra mpomuaka. Pae pulu tinggaloko pangande i Nagaula nibolika ntinana. Da saeo rua-eo da nikenikara pae pulu tinggaloko ka i Nagaula, apa vesia petevai ntinana. Ri saeona mai pangande hia pae pulu ka i Nagaula domo nipapolakara ra mpomuaka aga nikandera tatalu. I Nagaula hii aga nidakakara tava mparia mpai.

Aga vesiamo eo-eo. Nara pangane nasumpumo rara i Nagaula aga nipakande tava mparia mpai. Nipasiromuna bulu ntonji navaro ri vambasala mpomaka bo nidau-dauna nipovia kapi. Nara pangane nevalimo kapi, nevoromo ia mbatotoaka tinana nokato bo nodademo ia;

E..Ina...Ina aaa i Nagaula,
I Nagaula nevali tonji,
Nevali tonji paria mpai

Netingoamo pangane tinana bo nesana, "Nadoyo tano tonji eva aga yaku nidadena.

Nodade vai i Nagaula:

E...Ina....Ina....i Nagaula
I Nagaula nevali tonji
Nevali tonji paria mpai

Bo nevoromo mpangane tonji hia hau ranggakayu. Tinana pangane navoli munimo dako nokato nikavana mai anana i Nagaula ra mpomaka domo ria damo valeana. Nipecutana puramo ira tatalu, "Iko, Buro, berimba nipalambakamu i Nagaula nalai?"

Nesanamo Toburo, "Berimba, ranga, kutagi bo ia le nimpeintaku aga niepekumo serena?"

Nipecutana vai i Tobongo, "Iko, Tobongo, nakuya le nitagimu i Nagaula nalai?"

Nesanamo Tobongo, "E aga nipeintakumo ia nanggalivo, bo le niepeku serena nalai."

"Iko, Topunggu, nakuya le niragamu i Nagaula?"

Nesana Topunggu, "Aga nimpeintaku bo niepekumo ia nalai, aga le nipakuleku meraga." Kaupuna pangane nipodua ntinanamo domo nembangu-mbangu.

I Nagaula pangane tempa hau, ntempa tumai mbapetiro-tiro Pua Jamadi dako notingguli noasu, nodademo i Nagaula;

O Pua Jamadi, iii Pua Jamadi
Pua Jamadi i Nagaula
I Nagaula nevali tonji.

Bo nisaka i Pua Jamadi pangane tonji hii. Ledo muni nevoro tonji hii nisaka. Nikeni mpanjili pangane bo nisuaraka rara jaba. Naeo mpadondo pangane, nipeinta mai i Pua Jamadi uve ri gumba, ri potolo, nabo pura. Nekutanamo ia ka tinana, "He, ina! Berimba tagumba hii? Le nikosini."

Nesana tinana, "Bo nikosini nu batua pura ngena gumba-gumba itutu."

Aga vesiamo rua-mpadondomo. Katalu-mpadondo kana mai pangane, nikava santau bulua tonji ri sinjori nu gumba, bo bulu ntonji hii nasimbayu nte bulu ntonji rara jaba. Nabata rara i Pua Jamadi hii. Le niuli-ulina aga nipariaranamo.

Vesia natanga bongipa, haumo i Pua Jamadi ri avu mbatongoraka topakujee uve. Da vesii-sia pangane, niepena nojeemo uve. Nipetadilona mai bo natekaja i Pua Jamadi. Eva malimpia ia nanggita kagaya nu randaa nandiu..."Bo aga tonji hii tano nompakaoti uve. Bo tano iko hii randaa gaya." Vesiamo panguli rara ntaina.

Nompekiti pangane ia mbaleli kuli ntonji i Nagaula nandiu nialana. Nesore mai, i Nagaula mompasua kuli ntonjina, do ria. Nigama-gamana ri bela mpantuna, le muni ria. Nasesamo rarana, "Berimbamo hii? Nabobayamo maeomo, yaku dopa-dopa nombali."

Nara pangane neonga i Pue Jamadi nanjalunggu kuli ntonji i Nagaula. Nesanamo i Pua Jamadi, "Mompamula hii, iko domo ngena mevali-vali tonji, apa iko kupoberei."

Niulika puramo pangane todea. I Pua Jamadi hii rapolisakamo pitu-eo pitu-mbongi. Nalinggu rara ngata hau nanggatungga poboti nu ana nu madika.

Ri mbulana pangane hia nabelomo katuvu/posinggeniakara randua. Nangulimo i Nagaula, "E, pua, eva naalentora mpuu ranga yaku nte tinaku."

Nesanamo i Pua Jamadi, "Bo haumo ya kita."

Nara pangane nosumomba mpuu geira. Ja i Nagaula nte daa nu rarana nosakaya apa nangidamo. Ri tatatanga ntasi hii, nerapimo rara i Nagaula mangande taipa mpoi, bo i Pua Jamadi pangane nompotove berei. Nipari-pari mesampo ruru ri talinti mangelo taipa ka i Nagaula. Haumo pangane ira nangelo taipa, nipalaisimo i Nagaula saitona rara njakaya. Bo tano talinti nipesampo aga ngata gei Yoro Lolopalo.

Nara neongamo Yoro tumai mbatotoaka i Nagaula, nipeintana mai nagaya mpuu mombine ranjakaya. Nekutanamo i Yoro, "Nuapa to nialamiu nesompo ri talinti hii?"

Nitesaka i Nagaulemo dala mposumombara bo nerapi rara mangande taipa. Domo pangane hia i Yoro hii noakika daamo nilonjuna pangane mata i Nagaula bo nivonjuna pura nuapa ri karo i Nagaula bo ninavusakana ra ntasi. Nara pangane neongamo to pangelo taipa, netidamba munimo i Yoro Lolopalo, apa iamo nonturoka valea i Nagaula, nogulimo sakaya.

I Nagaula pangane nodademo ri tambe njakaya:

O Pua Jamadi....Pua Jamadi
I Nagaula...ri tambe njakaya
ri tambe njakaya...nilonja mata

Nesanamo i Pua Jamadi, "E, petaa-petaa ruru sakaya! Eva aga dade i Nagaula ri tambe njakaya."

Nesana muni i Yoro, "He, he, he! Dade-dadeku mbatunggai tinaku aga vesiamo, aga vesiamo."

Nasampo mai pangane, nipositomunakamo i Pua Jamadi nte i Nagaula nikenika kadera mbulava. Le nadota ia, aga nerapi oko apa palo nalolo.

I Nagaula pangane nesampo muni ra ngata ntanina. Nosou mboto ia. Karona hii aga nipule-pulekana buluana, apa ia nivonju i Yoro. Nara pangane noanamo ia langgai. Anana natanda ri bambara, nisangamo ia Bambarabulava.

Ri saeona pangane, Bambarabulava hau nomei ri tasi bo nikavana bau mbaso nikeni mpanjili pangane. Nakava mai ri banua, nibingga tai nu bau bo nikavana mata rua-bingga nisampu pangane. Nte damba nu rara ia niulikana ka tinana, "He, ina. Mai vei kupataka ka komiu mata naupu nisampuku hii."

Nipatakamo pangane, nadamba mpuu rara ntinana apa nompeinta luona vaimo ranga tinana.

Ri saeona pangane, Bambarabulawa hau mosipuli manu ri ngata nu madika. Bambarana hii nitampala pura nu tampo ala le rapeinta ntona, bo padagi pangane manuna aga vesiamo, aga vesiamo.

Madika hii nipayantaikana isema ngana eva aga nagayamo lingirana. Nitudunamo batuana hau mompolelo ngana hii. Vesia do masae makava ri souna, nandiumo ia nompegali tampo ri bambarana. Natekaja topetatopo petudu nu madika pangane, nompari-mpari notingguli hau mompakiluka ka Madika. Madika hii nompariara munimo. Vesia kamailekana nakava vaimo Bambarabulava nitampala vaimo bambarana nosipulimo. Manu pangane padagi vai. Potinggulina mai, domo batua nepolelo Madika mbotomo. Nara pangane nipeintana mpuumo ngana hai mbapegali bambarana, damo mpindo-mpindona bulava ri bambarana.

Nikapuinamo ngana hii bo nipekenina hau manggita tinana. I Nagaula pangane nanggita Madika tumai, nitanjakanamo toboyo loe ri tangga nte ri tambale, bo nakava mai pangane Madika.

Nesanamo ia, "E Pua, neemo ranga tumai! Peinta vei, tai bayangi ri tangga bo ri tambale hii. Neemo mpuu, ranga!"

Le nijampangi Madika hii, kana nompene ia vesia ranjou. Nikapuina i Nagaula nte anana, nompedalamo ranga i Nagaula nte tangina. Kaupuna pangane nikeni mpanjilimo ira ntaliana.

Nakava ra ngata, nipayoleleka ka todea i Yoro hii rasambale bo rasampa rapovia dai. Nara pangane nisambale mpuumo i Yoro bo nidai bo nipakatu ka tinana bo sararana ri ngata. Nadamba mpu rara nu sarara i Yoro mbatomunaka pakatu i Yoro. Niposikande mai dai pangane. Nesanamo santanga, "O soa-soana i Yoro." Nipeinta mai pangane bo tano aga i Yoro nipozikander.

I Nagaula pangane nte anana nasalamamo bo tina i Nagaula nadua ntamo, natuvu puramo vatuh nggakavu ri kalimpi apa le nembangu-mbangu nadua nantora i Nagaula. Hau nipekiala pangane tinana. Nabelomo tinana bo nasiromu puramo ira nte damba nu rara bo novia salama apa nosinggava puramo.

TOPOANA PAPITU (dikarang oleh Tahir Sempalogo)

Naria ri sangu ngata tona noana papitu. Anana hii langgai pura. Ponturora hii ri ngata nasusa ntoto pangande. Ngata nangau, nakaja uvena. Katuvuara aga notalua. Anara kaupu hii nosanga Latadaga, damo nedagi. Ane mangandemo nakananomo apa i Latadaga le nadota nangande ane le naria kandebo bau. Aga vesiamo... aga vesiamo ri tempo mpangande. Naraumo rara ntinana bo tomana nanggita inggu i Latadaga. Le nisanina pangande nasusa.

Naria sambongi naupu nangande, nipasiromu ntomana pura anana. Nipecutana saito-saito anana. Nipamulana dako ri anana tuaka, "Iko, ana, ane pangande nuapa ntoto nipokonomu?"

Nesana anana, "Yaku mau aga loka radaka, najadi puramo."

Nipekutanana vai sunjuna, "Iko, ana, nuapa?"

Nesana anana, "Yaku nipokonoku bangga roo."

Nipekutanana vai anana katataluna, "Iko, ana?"

Nesana anana, "Yaku mau aga sinasu."

Nipekutanana vai anana kaampakana, "Iko, ana, nuapa muni?"

Nesana anana, "Yaku mau aga sinole najadimo."

Nipekutanana vai ana kaalimakana, "Iko, ana?"

"Yaku mau aga kasubi radaka," pesana nu anana.

Nipekutana vai ana kaaonokana, "Iko, ana?"

"Talebe ka yaku," pesana nu anana.

Kaupuna nipekutana Latadaga, "Iko, Latadaga, nuapa nipokonomu?"

Nesana Latadaga, "Yaku kandea pae bo bau."

Nangepe pesana i Latadaga, narau pura sampesuvuna. Batuana i Latadaga hii ngana mpepaupu, nuapa maria maupu aga masurukavu kita. Aga kana kaupuna haitu nojaritamo tomana, "Maile mpadondo masalisa memata, raporiapu baku apa kita hau mombavote tasi."

Nahera puramo anana, "Hau mokuya tano, Tata?"

Nesana tomana, "Domo rapekutana, pokona hau pura kita."

Kaeona mpadondo nembangu puramo geira. Nanguli tomana, "I Latadaga rapakasantanina bakuna, neemo rapakasigalo nte bakuta." Nuapa niuli ntomana, niturusu pura ntinana.

Aga pebonda nu eo, nolipamo geira. Nakava ri bivi ntalinti nikavara sangu sakaya. Nesavimo. Nom Pamulamo nivose sakaya.

Katongo nu eo nakavamo geira ri ngata ponja. Nopeulumo tomana, "Iko, Latadaga, panaumo ri sii. Itumo bakumu. Kami manjilimo. Ri siimo iko."

Nanaumo ranga i Latadaga saitona. Baku nidekeika aga sukana rakande ntongo eo haitu. Nipanotona rarana, nojaritamo ia rara ntaina, "Nitadiaka tano yaku, damo rakuya." Naarapa taina, nangandemo. Naupu nangande nolipa-lipamo ia ri bivi ntalinti saito-itona. Nolipa-nolipa naaramo vai tai. Baku naupumo. Kakuasa nTupu nikavana sanggayu ganaga, sangu-anguna vuana, ute natasa muni. Kaliu-liu nipenena ganaga pangane hia. Pekeni nu ara ntai naliumo, nitonganamo ri lolona ganaga. Dako nipamula nangande, nikitana sangu bavu nolipa rara ntasi. Nahera ia, nakuya bavu tutu le nalodo nolipa rara ntasi? Sampesanika bavu pangane hia, nesore kaliu-liu nombatotoaka puna nu ganaga nipene i Latadaga.

Nikitana bavu pangane hia nombavonjumo rantena pade nisodana ri tinggu nu ganaga. Rara ntaina, bara haitu nompakabaraka bavu, mau nolipa rara uve le nalodo, nau nabangga ledo. Nanggava akala i Latadaga, nirempetakana vua nu ganaga tasa pangane hia. Kaliu-liu nitotoaka nu bavu. Puri nu bavu nangande ganaga, nanaumo i Latadaga nialana rante nu bavu pangane hia bo nikenina mpetabuni. Naupu nangande bavu pangane hia, hau tumaimo nangelo rantena.

Nalengepa rarana, nalaimo ia, kapola-pola notingganavu rara ntasi. Nikita i Latadaga domo naria bavu, nalodomo. Nompekirimo i Latadaga, hitu tano rante nompakabaraka bavu pangane. Nipakasangunamo rarana. Nicobana nogugu rara ntasi, le nakuya. Eva aga nolipa ri kabatana.

Ri tatanga ntasi nipotomuna tatalu tona rara njakaya. Tona-tona hii porampo. Nanggita i Latadaga nolipa rara ntasi le nalodo, nahera porampo pangane hia. Kaliu netaa sakayara.

Nipepesavira i Latadaga ala mosimporoa. Nesana i Latadaga, "Komiu hii nuapa? Madota mombarampo yaku?"

Nesana porampo, "Ledo. Komiumo rapajadi kami balengga!" Perapi nu porampo hii, nipoio i Latadaga. Nesavimo. Napanga pangane rara ntasi, nikitara naria nareme ri kabatana. Nipepesamporamo sakayara.

Hau singgani geira nombatotoaka reme pangane. Nikavara naroa mpuu tona, tona ri banua nu madika. Netaramo ruru geira. Naara pangane, nesuvu madika neangga ri vamba nojarita, "Isema-sema yarga madika, yarga batua mosepa raga hii. Ane mesua ri vamba sala kapola-pola le manjenggi-njenggi, kaliu-liu ri timpu nu anaku, ia mompoberei anaku saito-itona, ante muni mbara-baru njumangu-mangu ka geira pura, vesia muni kakuasa nu madika rara ngata, kudekei puramo ka geira njamboko.

Naupu madika nojarita, nompamulamo geira ana-ana nu madika nosepa. Le nesua-sua ri vamba sala. Nisili bali sili kana le nesua. I Latadagi da nanggapui bambara netara. "Bara ngana hamaitu, mamala muni mesua rara lili, vesiamo pangane madika."

Nesana i Latadaga, "Ane mamala, Pua, rapesoba."

Nesuamo i Latadaga rara lili, nompamulamo ia nioporoka bala. Sambela, ruambela, katalu-mbelakana nisepa i Latadaga ri vamba salamo, kapola-pola nesua, kaliu-liu ri timpu ana nu madika.

Nanguli madika, "Sema nosepa pangane?"

Nesana geira pura-pura, "Ngana hamaitu."

Nanguli vai madika, "Sili sangganipa vai."

Nisili mpuu i Latadaga nosepa. Nomore-nomore, nipasanggani i Latadaga nosepa, le nanjenggi-njenggi ri vamba sala, kapola-pola ri timpu nu ana nu madika. Nekutanamo madika, "Sema sangamu?"

"Sangaku Latadaga, Pua."

"Dako ri umba asalamu?"

"Dako ri ngata ngau hamaitu ya, Pua."

"Eva nuapa niuliku pangane hia: ikomo tu mompoberei anaku, ante iko munimo mombaganti yaku moparenta rara ngata hitu."

Nangepe jarita nu madika, nakananomo tona, naria nongare le nasituju, apa tona le nisani unu nu apuna majadi madika, meparenta. Le nasana rarara, nosiulika puramo geira sangata mombapatesi i Latadaga.

Le nasae naupu haitu, nakava puramo tona sangata nombatiku i Latadaga. Nongaremo geira, "He Latadaga, palai iko ri sii, ane ledo rapatesi kami iko."

Nangepe jarita haitu aga nongiri i Latadaga. Nesana i Latadaga, "He sampesuvu, kamai mojarita mabelo. Ane da maria dala mabelo itu raoseta. Yaku hii nonia nabelo."

Nongare vai geira, "Palaimo ri sii, tumo nojarita ane madota masalama." Nikitara i Latadaga eva le madota malai, aga meeva. Sampesanika netuumo poboba nte i Latadaga.

Nisuvurakanamo rante nu bavu dako ri kopena. Nojaritamo ia nte rantena, "Ane mpuu-mpuu iko hii nabaraka, koi boba geira haitu, sambela-sambela sampe madungga le mamala membangu."

Kakuasa nTupu nevoro mpuu rante pangane hia hau nombaboba geira saito-saito sampe nadungga pura. Domo naria saitoa neeva. Nerapi ampu pura nte i Latadaga.

Nojaritamo i Latadaga, "Sampesuvu njumangu-mangu, kamai kita nompakasangu, le ria gunana mosipodua, raepeta pura nuapa rauli nu madika."

Nalinopa pangane hia nojaritamo madika, nombaovo susa poboti nu anana nte i Latadaga. Banua nisambumo ante muni topegaga nitudumo. Nanggava eo matana nonikamo, boti nipatudamo. Nikita nu madika noada mpuu maniana Latadaga.

Nompamulamo i Latadaga nopenrenta. Kasae-sae nipokono ntodeamo ia, apa nonondo, namaju pongata, le ria toposinggarau rara ngata, panggavia ntodea kana nevali, sampe nakareba ri ngata ntanina ngataramo hii ngata nasugi. Nadeamo tona noinayo ri ngatara, naria muni tona dako ri ngata pangote i Latadaga.

Nangepepa tona hau tumai nanggeni balu-balu ri ngata sugi pangane, nonia munimosampesuvu i Latadaga moinaya hau. Aga kamailekana haumo geira ntali pesuvu. Na kavamo ri ngata ponia. Nabaipa tambolo nesaimo ri banua nu madika nerapi uve. Nonturomo bo nanginumo. Nojarita mbotomo geira, nabelo mpuu madika, "nanondo." Le nasae nesuvu madika langgai (i Latadaga), nekutana, "Dako ri umba komiu?"

Nesana geira, "Dako ri ngata nangau hamaitu, Pua."

Nekutana mpanjili madika, "Sema sangata?"

Nanjanga puramo geira saito bo saito. Nangepe sangara saito-saito noundumo madika. Aga rara ntainamo, "Sampesuvuku pura hitu."

Nekutana vai ia, "Da natuvu totua?"

Nesana geira, "Da natuvu."

Nanguli madika, "Mangande ri sii puramo kita hitu." Noio puramo geira.

Nesuamo madika (i Latadaga) nangulika bereina moriapu. Nangulimo i Latadaga ka bereina, "Daka loka, daka dale, povia sinasu, sole dale, daka kasubi, poriapu talebe. Ane mangongomo ngena, sondumo. Ane rapatala ngena talodu pura sangu-sangu."

Nangongopa nisondumo nu bereinamo, nipatalanamo eva panguli nu bereina langgai. Nipepesuamo geira mangande. Nipasiayumo ponturora saito-saito. Nangulimo madika,

"Mangandemo kita." Mbo nobukamo anu netalodu, mbo natekaja pura geira. Natetora puramo anu nokaulu.

Nanguli vai madika, "Nakuya, anumo mangandemo kita."

Aga mbo nosikita geira, bo notumangi. "Sampesuvuta..., sampesuvuta..." vesiamo suara nu tangi nesuvu. Kaupuna aga negoli nosikapui pura geira.

Nojaritamo Latadaga, "Ulikamo tumai tinata bo tomata, mosanggani matuvumo ri sii kita." Perapi Latadaga hii nipoio pura nu sampesuvuna ante muni tinana bo tomania.

TESA TOPOMPATESI ANANA dikarang oleh Basinate, Rejeki

Naria topoberei nasae-sae ira nosikeniaka, notesa-tesamo ira njamboko. Nasae ira notesa-tesa, nangulimo bereina langgai ka bereina mombine, "Ane moana ngena kita, ane ana langgai rapatuvu, ane ana mombine rapatesi."

Nasae-sae haitu, nangidamo bereina. Nangidapa bereina, haumo ia modaga. Haupa ia modaga nitevainamo bereina mombine, nanguli ia, "Ane ana langgai ngena rapatuvu, ane ana mombine rapatesi."

Nesanamo bereina mombine nanguli, "Iyo." Jadipa haumo ia nodaga ri ngata ntona.

Nasae-sae ia hau, noanamo bereina. Noana ia haitu aga ana mombine. Tapi ledo naliu rara ntinana nopatesi, kana nipatuvuna sampe nambaso. Nambasopa ngana haitu nitabuniakanamo niloduna riara galunggu. Dopa nasae haitu, nakavamo tomania dako nodaga. Nakava ia haitu nekutanamo nanguli, "Noanamo iko?"

Nesanamo bereina mombine, nanguli, "Iyo."

Nanguli vai bereina langgai, "Ngana nuapa?"

Nesana bereina mombine, nanguli, "Ngana mombine."

Nanguli bereina langgai, "Nipatesimumo?"

Nesana bereina mombine nanguli, "Iyo."

Nanguli bereina langgai, "Ane nipatesimumo, ri umba dayona?"

Nesana bereina mombine, "Yaku aga nalali."

Nasae-saepa haitu, nariamo bata nu rara bereina langgai, apa nggani/nggani nangande kana nibolina tibo ntavevena, niulina, "Agina yaku domo mangande. Neemo taveveku ledo mangande."

Jadi dako rahaitu nosimpakenimo ira hau nevavo, naaramo tai. Naarapa tai nosiunakamo ira mavoli hau ri sou. Navolipa ira haitu, nokolumo bereina langgai, bereina mombine da ri puri. Nakava bereina langgai haitu ri sou, nibusakana puramo uve. Naupu nobusaka uve, naturu-turu. Da naturu ia. nakavamo bereina mombine. Nakavapa bereina mombine, nitudunamo movele. Nipepeinta uve domo ria, nitudu bereina langgaimo bereina hau manambu. Da puri nu bereina hau nanambu, notesamo rara ntaina, "Nuapa ntoto nitabuniaka bereku hii? Nggani/nggani nangande kana tibo ntavevemo nibolina."

Nasudu rarana haitu, nielonamo soki-sokina, ledo ria nuapa nikavana. Sampe niunggerakana puramo tonda, ledo ria nikavana, damo niunggeraka ri galunggu pade nikavana. Nikavana aga ngana mombine riara galunggu. "Sii tano nitabuniaka bereiku. Niulina aga taveve niboli-bolikana tibona." Nekutanamo tomana, "Ikomo tutu, ana?"

Nesanamo ngana mombine, "Iyo, Tata!"

Nangulimo tomana, "Kusambalemo iko, ana?"

Nesana anana, "Neemo, Tata."

Nanguli vai tomana, "Kana kusambalemo iko, ana."

Nesana ana, "Neemo rasambale ri sii yaku. Mabongo ngena talinga i Nina kupongare!"

Nanguli tomana, "Kana kusambalemo iko, ana!"

Nesana anana nanguli, "Ane kana rasambalemu yaku, neemo rasambalemu ri sii. Kenimi hau ri bulu nagavu-gavu moitu. Ane mariamo jono sampoka, sambale siamo yaku."

Nanguli vai tomana, "Kana kusambalemo iko, ana!"

Nesana vai anana nanguli, "Ane kana rasambalemo, ala ka yaku ntalu sangu ante pae pulu salemo kutipale hau."

Jadipa niala ntomanamo ntalu ante pae pulu salemo bo haumo ira. Nakavapa sumai ri bulu nagavu ri jono sampoka, nangulimo tomana, "Kusambalemo iko, ana."

Nesana anana nanguli, "Ane mariamo jono sampoka sambalemo."

Jadi nisambale ntomanamo anana, ntalu sangu ante pae pulu kana ri palenamo. Nadunggapa ngana haitu nisambalena, nepogumo ntalu ri palena. Ri pepogu ntalu haitu, natikajamo tomana, navunjutakamo ri belana, nakabasaka guma, nabongo talinga.

Ntalu nepogu haitu najadi manu. Najadipa manu nikavantunamo tupuna (Ngana nisambale) talu-nggani. Sanggani nikavantuna naurimo bela mposambale ri tambolona. Karongganina nembangumo. Nembangupa, notesamo manu. nanguli manu, "Pakanoto rara, Pue." Katalu-ngganina nikavantuna. Nanotomo rara ntupuna. Nanotopa rara ntupuna neuunakamo manu, nanguli ia, "Hau kita, Pue?"

Nesana tupuna, "Iyo, manu!"

Jadipa haumo ira nolipa, kana ri kolumo manu. Nasae-sae ira nolipa, nikavaramo sou gero. Nangulimo manu, "Maturumo sii kita, Pue?"

Nesana tupuna, "Neemo, manu! Ledo mabelo kita maturu ri sii. Ledo naluu sou."

Nanguli manu, "Kana maturumo siimo kita, Pue. Nau sou gero hii, kana mabelo ngena. Ane maturu kana mogane."

Naturupa ira, noganemo. Dala nu ganena nanguli, "Makana-kana mpaturu yaku ri sou gero hitu damo matikajaka kada-kada nu binata mpengaya mosikanda-kanda ri soso nu banua. Ane memata yaku ngena riara nu banua belomo magana ante isi-isna." Nemataba ia riara nu banua belomo. Jadipa banua haitu najadi banua ponturoramo. Manu nanggeni ia pangane kana ri sia nte iamo, pae pulu salemo kana nipateokana manunamo.

Nasae-sae ia nonturo ri sia, nikava ntopoasumo. Nikavapa ntopoasu haitu, nanjili ia hau ri ngata. Nakava ri ngata, niulikana madika. Nanguli ia, "Naria banua sangu nikavaku rumai ri bulu ri mata nu binangga. Banua mai nabelo mpuu. Maria tupuna aga saito, mombine randaa gaya ante manu muni sambaa."

Nesana madika, nanguli ia, "Nakuya rapodava-davaka! Ri umbamo tona mobanua belo ri bulu?"

Nanguli vai ia, "Ledo aga davaku, Pue. Ane aga mamala, kita hau rapepeintata."

Nanguli vai madika, "Ledo nakana. Ledo ria topobanua belo ri bulu."

Nanguli vai topoasu, "Nakana mpuu, Pue. Ane madota komiu, kita hau rapeintata. Ane ledo makana ngena, patesimo yaku."

Jadipa nadotamo madika haitu hau. Dopa najadi hau madika haitu, notesamo manu ka tupuna. Nanguli manu, "He, Pue! Maria tona ngena tumai mantenge komiu. Ane mobereimo ngena komiu, meoremo yaku. Damo taiku kuboli ka komiu."

Dopa nasae nakavamo madika. Nakava madika haitu, ntuli nipobereinamo mombine haitu. Nobereipa ira haitu, nangulimo manu, "Bo nobereimo komiu hitu, Pue, hau meoremo yaku. Taiku kuboli ka komiumo." Taina naboli najadi bulava.

Nasae-sae ira noberei haitu, domo ira hau ri umba. Nonturo naroo ri siamo nangelo katuvuara. Nantalu, nituda pae, dale, kasubi, loka, nte tuda-tuda mpengaya.

Nasae-sae haitu maria anu nave-ave dako ri uluna. Kuli mpaе, kuli nu dale, kuli nggasubi, kuli loka, ante isi-isina munimo hanu naave. Ri ngata haitu da tempona naara, nakura pangande. Maria totua njamboko noure hau ri uluna. Bereina langgai nabongomo. Nanggava sou ntona ri dala, nesaimo ira. Nanguli, "Mamala mesai?"

Nesana tupu nu sou, nanguli, "Nakuya tano mesai?"

Nanguli totua njamboko, "Kami hii merapi uve. Nabaimo tambolo. Naaramo tai."

Nanguli vai tupu nu sou, "Kami hii napakasi, Pue. Ledo ria uve, ledo ria kandea. Bara aga tona tulou ri ulunapa maria."

Jadipa nopalakanamo totua haitu nanguli, "Haumo kami."

Nikavana sanjou-sanjou tona aga ivesiamo tesana nanguli. Pade nakava ri bavona, nikavana vai sou ntona. Nipekutanana vai, nanguli ia, "Mamala kami mesai?"

Nesana nu tupuna, nanguli, "Makuya tano mesai?"

Jadi nesaimo totua njamboko haitu pade nekutana nanguli, "Naria uve? Nabai tambolo, naaramo tai."

Nesana tupu njou haitu nanguli, "Pakasi, Pue, ledo ria uve, ledo ria kandea." Pade nituduakana. Nanguli ia, Bara aga tupu nu banua moitu bara maria uve bara maria kandea."

Nangulimo totua njamboko, "Ane ivetu tano, mapola hau kami."

Jadipa hau ira. Nakavapa sumai nekutanamo totua njamboko, "Mamala mesai?"

Nangepe suara haitu, nepeintamo tupu nu banua ante tesa natekaja. Nanguli ia, "Bo i Nina, tano."

Nirondenamo, "Kai tumai!"

Da ri tangga nioretakanamo, nikapuina sampe hau rara banua. Pade niulina, "Ane i Nina naria uve, naria kandea. Aga i Tata ledo ria uve, ledo ria kandea. Nee mompene tumai. Potondodomu rara nggapeo. Mariamo vero kami mangande maronto tulau ri tana, mangandemo komiu. Domo maria, domo.

Aga sampe ri siamo tesa tona njamboko. Aga talu-mbongi bereina langgai namatemo ranggapeo.

MPOLALOVE

(Abdul Muthalib Djaelangkara, Biromaru)

Naria saito langgai nosangaka Mpolalove, nonturo ri sangu ngata. Ri sabingga nu ngatana nonturo muni saito ngana mombine nosangaka Jirimai. Geira randua notengea. Mpolalove nasaro nanjayo ri ngata ntengeana.

Naria satempo Mpolalove nombaunaka tengeana i Jirimai hau nanjayo ri posusa. Tina ntengeana naboli ri banua, nanjeve ri ambe nggapeo banuana. Sintou geira nanjili dako ri posusa, Tina Jirimai dopa naupu nanjeve.

"Ri umba komiu, Ina?" Jirimai nangelo tinana.

"Ri sii yaku, ri ambe nggapeo da nanjeve," pesana Tina Jirimai dako ri ambe nggapeo banua.

"Nina..., pesavi tumai komiu ruru," Jirimai mbapokio tinana dako riara banua.

Nesana tinana, "Tonggoraka ruru, dopa naupu panjeveku."

Jirimai mbapokio tinana ledomo nosabara dako ri palantara banua, "Sampalai kodi aga, Ina, naria kupekutana ante komiu."

Nesana vai tinana, "Ulimo, damo kuepe dako ri sii."

Jirimai mbapekutana tinana ante kini nu rara, "Nina..., nuapa ntoto ranga nipoeya nu mombine?"

"Anu nipoeya ntoto nu mombine, ledo ria ntanina ane ia nopudi, navuu, ante nompangede. Haitu ntoto mai anu nipoeya nu mombine ri lino. Nakuya tano, ana?"

"Aaah, ledo nakuya, Ina, pakaupu panjevemu, Ina," pesana Jirimai. Nangepe pesana Jirimai, tinana nompopola panjevena.

Naupu haitu, Jirimai nombatale kasorona rara ntombi banua, talu kambi kumbana. Ri bavo kasoro nitalena vai ompa. Pade nialana samata ladi nikenina mpekadole ri kasoro. Ri sia i Jirimai nombasusu karona ante ladi, nobelamo karona ante raa nesuvu noili natiti ri bolo jaula nanavu hau ri kapeo. Tinana nongare, "Hee..., ana, potoveulu nabubu, nikuya?" Jirimai ledo nesana, ia namatemo. Ledo naosa rara ntinana, mompene ia hau rara banua, nikavana Jirimai rara ntombi banua nokambale, notempu raa, domo noinosa. Ladi nontinda nelosa ri taina.

Nanggita anana notempu raa, domo nisanina rakuyana, aga nantete notumangi. Ledo nasaе nesuvu basana:

"Iko namatemo, Jirimai.
Nanjososo rara ntoto yaku, Jirimai!
Nombadekeika iko, Jirimai.
Mpuu-mpuu nanjososo rara ntoto yaku, Jirimai.
Nombauli nuapa nipoeyamu.
Abalaa-abalaa nombarumpa anak!
Yaku domo manggita iko ngena.
O..., Jirimai, keni yaku nggamate!
Weremu nitasere nTupumo.
Yaku mapailumo."

Ledo nasae ia nongare mbapokio todea: "Oh, todea, sampsuvu sararaku, tulungi yaku! Kakavamo tumai! Tulungi ranga yaku! Peinta anaku namatemo!" Ledo nasae gangkana nakava puramo tona nekatunda. Gimba ntomate nitinti nu gabara, nantambaimo tona nakava. Todea nekutana-tana saba nipomate anana Jirimai ri umba anana naliu rarana nombasusu karona. Nesanamo Tina Jirimai ka todea:

"Pangane Jirimai hau ri posusa. Ledo nasae, ia nanjilimo nombapekutana yaku, 'Nuapa,' nipekutanana mai, 'anu nipoeya nu mombine ntoto?' Niulikumo, 'Anu nipoeya nu mombine ntoto ane ia nopudi, navuu, ante nompangede.' Haitu mai aga sabana ia nombasusu karona ante ladi ri bavo nggasoro. Aga domo nisaniku ane bara ri posusa pangane ia nombakaviasi anu nipoeya nu mombine mai, bo nitudu Lalove manjili dako ri posusa."

Panguli nu ada, ane tona namate nobela, tomate mai kana ralumu, ri umba ada rakaviasi pitu-eo pitu-mbongi.

"Mau nipomatena belana aga domo ia ralumu," Tina Jirimai nombaullika todea.

"Namala muni ledo ralumu, damo aga totuana," pesana totua nu ngata.

"Kuperapi ante komiu, sampsuvu sararaku, anaku Jirimai kana ratanamo eo hii muni," perapi Tina Jirimai nte tangina.

Nangepe basa Tina Jirimai, todea nompamulamo nompakagopa dopi rapodindingari, novia pokova, ante nokae dayo. Ri umba todea nasintuvu mbapasiayuna eva nombatovo kayu mbaso rapoviaka dopi. Sintou haitu Lalove nasesa muni novia suli/lalove.

Pokova naupumo nippovia, i Lalove dopa muni naupu novia lalovenia, Dindingari naupu munimo nippovia, dayo vesia muni naupu nikae ntodea.

Bara berimba nesanamo Lalove, "Ane naupumo dayo nikae, hau kuparesa ntani ruru." Lalove hau ri dayo, nakava ri dayo ia nanau hau rara dayo. Riara dayo ia ri rindi nu dayo nonturo nosulengga nanggengisi lalovenia. Ledo nasae nompenemo ia dako ri bolo nu dayo, kapola-pola nanjili ri banua ntomate.

Nombatongoraka todea nekatunda, bela Jirimai nitampunisi ante kapa ala domo moili raa dako ri belana. Naupu tomate nisompu, nisuaraka rara mpokova. Ri mpotauraka pokova nodademo Tina Jirimai nte tangina:

"Kaupunamo yaku manggita iko, Jirimai. Damo saitoku naboli, ooh Jirimai!"

Nesanamo vai saito todea, "Pokova nasadiamo ralemba, penontomo motumangi ane ledo pesuamo rara mpokova mosangganika tomate."

Ledo nasaé nakavamo Lalove ante mombatoya lalove ri pale njidina. "Kakanana Jirimai, ia ledo aga tenegeaku, ia bereiku. Kuperapi ante komiu njumangu-mangu, yaku mompanga ntani pade tomaté rasuaraka rara dayo," i Lalove mbaulika topokova ri bivi nu dayo.

"Ane vetu tano, ratongoraka iko maupu mopanga pade ratana tomaté," totua nu ngata nesana ri sinjorina.

Sintou Lalove naupu nompanga bara sakuya-ito todea nanau ri bolo nu dayo mombajoko tomaté.

Bara berimba nesana vai Lalove, "Yaku ri balenggana, tona ri balenggana pesavimo yaku mbagantina." Nitunggaina ia ri balenggana ala ia mombatomunaka tomaté ri bolo nu dayo. Nanau tomaté rara dayo, nijolona balenggana bo nidikana ri timpuna.

Tona nombajoko tomaté rara dayo nesavi puramo, damo Lalove saitona naboli rara dayo nombaporoa tomaté. Ia domo nadota mesuvu dako ri bolo nu dayo.

"Hii posintomu kami kaupuna ante komiu njumangu-mangu. Yakumo hii niposaba Jirimai namate... yaku sabana, tutuimo dindingari tuli taivumo nte tana kami."

Mau berimba todea nombapokio Lalove, mau berimba todea nombatagina, kana ledo nadota ia, kana maboli rara dayo mosangganika tomaté patujuna, ante taono, ante lalovenia. Njumangu todea nanggeni tomaté ratana nevali naeka.

Ledo nasaé, kana nitaivumo dayo ante i Lalove riarana. Potaivu dayo, nompamula munimo i Lalove nombatavuisi lalovenia.

Pitu-mbongimo saena rara dayo i Lalove ante Jirimai. Naupu pitu-mbongi saena, oni nu lalove domo nasova niepe onina. Kasapulu pata-mbongina saena, oni nu lalove nalipomo, domo ria sakidea niepe.

Nesanamo Tina Jirimai, "Podoa patapulu bo pata-mbongi hii podoa kaupunamo." Tuli netevaimo Tina Jirimai ka ngana-ngana ri podoa kaupuna mai, berimba sabana naria niulika eya mbaso nu mombine, ledo ria ntanina, nopudi, navuu, ante nompangede. Haitumo mai eya mbaso nu mombine. Ane ledo rapomatena eya mai kana nombavonju karota. Vesia muni langgai ledo nompokonona. Haitu mai saba nu eya nu mombine.

TADULAKO BULILI (dikarang oleh P. Lamanusu, Petimbela)

Ri tempo nggaulu naria sangu ponturo ri sangu bulu. Ponturo haitu sangana ngata Bulili. Ngata haitu nitasere maria sapulu kilo lako ri ngata Petobo vei-vei hitu. Katuvu ntodea Bulili notalua. Kasugia ngata Bulili nisani ri umba-umba, bo naria muni ri ngata haitu tatalu tadulako nosanga i Mokeko, i Bantaili, bo i Molove. Bo muni ri ngata haitu nisani saito randaa nagaya mpuu. Sangana natolele ri umba-umba.

Naria sangu tempo ngata haitu nikakava saito Madika lako ri kamagaua Sigi. Kakavana haitu nitarima belo ntodea ngata Bulili. Patuju kakava nu Madika, madota mangore sambulu ka randaa ngata Bulili. Sambulu Madika nitarima nte belo nu rara.

Susa poboti nipoviamo. poboti Madika ante randaa ngata Bulili naroa mpuu. Madika nonturo nosangganimo nte bereina ri ngata Bulili. Riara mpobanuara bo ponjambokora ledo nasirampi belo. Kaupuna Madika pangane madota manjili ri ngatana. Ri sangu tempo, Madika nerapi nte bereina hau manjilimo ri ngatana, apa naria urusana napari ntoto. Perapi Madika haitu nipoio nu bereina.

Kamailena haumo Madika nanjili ri ngatana. Dopa nasae nipalaisi Madika, noanamo bereina ngana langgai damo nagaya. Pompoanaka ngana haitu, dopa nisani Madika. Nasiromu totua-totua ngata nangelo isema hau raposuro mangulika Madika Sigi. Botu mpolibura nipelisira i Mokeko bo Bantaili. Ledo notanje-tanje suro randua pangane haumo, bo ledo sakuya kasaena suro randua naparamo nte banua Madika. Dopa nesua ri doyata, suro randua haitu niburarasimo nu Madika nte suara namangga, "He..! Nuapa paraluumiu nakava tumai?"

Nesana i Mokeko, "Neepa ruru, Pua. Dekei batua mesua, pade batua motesa."

Mokeko bo Bantaili ledo nidekei Madika nesua. Nangulimo Madika, "Ulimo lako ri situ patujumiuknakava tumai."

"Kami randua nakava tumai ri ngayota, Pua, nitudu ntotua ngata Bulili merapi kaasi nu raramiu, Pua, bara maria labi panteo rone ka anata, Pua, dako nipoanaka."

Nangepe tesa haitu, narau mpuu Madika bo ledo nipopoulira suro randua nerapi pangande ka anana. Nekavantu Bulili hau nanjumaka gampiri Madika ri balenggana. Nokumaa mpuu Madika nanggita karoso i Bantaili. Nompekiri Madika, "Ane eva haitu Bantaili, naria mami pangisanina."

Nanggita gampirina nakavaomo nikeni mpalai Bantaili, notinti gimbamo Madika, najadi tanda ntodea, ala masiromu pura toteana. Naliutaka haitu, Madika nompasiromu toteana mombaraga i Mokeko bo Bantaili. Peragara nasudu ri duyudala bo naluo. Mokeko bo Bantaili aga sampida mata nombakavantu duyungangane ri sambotenamo. Todea Madika ledo napola nangose duyudala. Salu haitu nipoposanga Salu Petempa, batuana salu haitu petempa i Mokeko bo i Bantaili.

Todea Madika Sigi nompapola peragana vai, sampe nakava ri petabuni i Mokeko bo i Bantaili. Petaara haitu nipoposangamo Petabuni, sii-sii najadimo ngata Petabuni. Peraga nipa polara vai. Maria sangu kilo kakavaona lako ri Petabuni najadi vai posieva mbaso bo ri siamo nadea mpuu totea Madika Sigi namate nosieva. Ri posievara haitu nipoposanga Pombeve. Pombeve batuana, pombeve tai liko nu balira.

Madika Sigi ledo nompakule neeva. Madika Sigi nombagaga i Mokeko bo Bantaili masiromu molib. Pegaga Madika Sigi nikakavaka i Mokeko bo Bantaili. Riara mpolibu haitumo, niala Madika Sigi loga nombatudu toteana hau nombasuaki ngata Bulili bo nombatunju banua-banua ntodea ra ngata Bulili. Todea ngata Bulili nadea nitavani ntodea Madika Sigi.

Tempo da nangande riara mpolib, nariamo tanda nakava nte Mokeko bo i Bantaili, eva nanguli riara ntaira "Nitunju ngatata!" Bo domo nte pekiri nandate, nekavantumo i Mokeko bo Bantaili riara mpangande. Kapola-pola nangova hau nombatutuaka ngata Bulili. Da nggavaona nikitaramo banua-banua ra ngata naupumo napapu bo toteana domo naria ra ngata.

Ri siamo mai kamalana Mokeko bo Bantaili niakalani Madika Sigi. Riara mpolipara pangane hau ri ngata Bulili, Mokeko bo Bantaili nosinggavaka saito topunggu. Topunggu mai nombaturanikajadia posieva ra ngata Bulili ka i Mokeko bo Bantaili. Nangepe tesa ntopunggu haitu, i Mokeko bo Bantaili sakidepa nalimp. Naupa ivesia, Mokeko bo Bantaili ledo noura pompekirira.

Ledo sakuya kasaena lako ri sia, Mokeko bo Bantaili niraga vai ntodea Madika Sigi bo nosieva, sampe tomate namate riara mposieva ledomo nitana. Ri tana posipatesira haitu nipoposangamo Kapopo.

Dopa sakuya kakavaona lako ri sia, namatemo saito tadulako Madika Sigi, sangana i Ntoraya, sampe nipoposangamo tana kamaten Rano Ntoraya. Riara mposieva pangane, totea Madika Sigi nidagi i Mokeko bo Bantaili. Todea ngata Bulili nantingayo balira.

(dikarang oleh Tei Sarikuna, Rahmat)

Naria tona nosampesuvu tatalu, nosanga i Ali. Sanga ntueina i Huse nte i Hasa. I Ali tona namau leke, nasanda buto. Nau sangu-sangaya anu nitudu ntotuana ka ia, ledo pura nadota. Niulika ia hau mangala kayu, aga nanguli ia, "I Huse nte Hasa mangala kayu bo manambu."

Nipakeni ntotuana hau mevavo. Nakava ri talua, i Huse nte Hasa nevavomo nte totuana, ia aga nonturo-nturo ri bavo nu bata, ledo nadota nevavo. Nasae-sae nabaimo tambolo, naaramo tai, nanjilimo ira hau ri banua. Nakava ri banua, nangandemo. Naupu nangande, niulika ntotuana vaimo i Ali hau mangala kayu. Aga nesana ia, "ledo yaku mangala kayu. I Huse bo i Hasa mangala kayu."

Nanguli i Huse bo i Hasa, "Kana hau kita, Ali. Nau aga mekeni iko, kana hau kita."

Nesana i Ali, "ledo yaku hau."

Nanguli vai i Huse bo i Hasa, "Kana hau kita. Makava sumai, nau aga maturu-turu iko ri bone, kamaimo mangala kayu." Jadipa nadotamo i Ali hau.

Jadi haumo ira nangala kayu. Kayu raalara nakavao sakide ante banua. Dala hau nekayu notaolo uve ntasi, atau nosinjambote. Jadi ira ane hau nekayu aga nosakaya. Nakava sambotena sumai niboliramo sakayara ri talinti ntasi. I Huse bo i Hasa hau nangelo-ngelo kayu rampe ri talinti. I Ali aga naturu-turu ri bone. Nasae-sae i Ali naturu, namonjomo ia. Nadeapa kayu niala i Huse bo i Hasa, nikeniramo ri sakaya bo nisavirakaramo rara njakaya. Naupu nisavirakara kayura, nisororamo sakaya hau manjilimo ira. Nakavaopa sakaya bo talinti, nilikeramo i Ali, nanguli, "Hee, Ali! Pembangumo, haumo kita!"

Nemata i Ali bo nembangu. Nikitana tueina i Hasa bo i Huse nakavaomo bo talinti. Jadipa i Ali notumangimo. Nanguli dala ntangina, "Hii, hii, hii! Aga berimbamo yaku? Ri umba dala kuose? Tueiku nakavaomo."

Nasae-sae nasudu rara i Ali, nalai ia rara kayu. Nikande tava kayu napoi, kana nikandemo. Nikandena napai, nitedaka. Aga ivesiamo, aga ivesiamo. Nasae-sae ia nolipa, nikavanamo banua i Raposasa. Nakava ia ri banua i Raposasa nangulimo i Raposasa, "Ikomo rii, Ali?"

Nesanamo i Ali, "Iyo."

Nakirimo tai i Raposasa. Nanguli dala nu ngirina, "Ha, ha, ha!" Jadi i Ali nonturomo ri banua i Raposasa. Nasae-sae ia nonturo ri banua i Raposasa, niulika i Raposasamo i Ali, "Moevu bengga," Nanguli i Raposasa ka i Ali, "Ane mapanemo ngena eo, kenimo hau ri poranona. Ane maria ngena mandala ntoto, ledo madota bengga hau, neemo ratumba njuu!"

Da sanggani, ronggani, dopa nakuya bengga. Nasae-sae, ia hau nanggeni bengga ri poranona, nitumbanamo bengga hau ri kandalana. Da ledo nadota bengga hau, da nibobana. Jadipa bengga nalonjomo. Ledo aga nalongo sangu, nalonjo pura sagimpu. Nitumba-tumbana domo namala mesore. Jadipa i Ali nanjilimo hau ri banua bo notumangika i Raposasa. Nanguli dala ntangina, "Hii, hii, hii! Domo nabelo bengga. Nalonjo puramo. Domo naria namala nesore. Ledo aga karona nalonjo, nalonjo nte balenggana. Damo ongena nesuvu."

Nanguli i Raposasa, "Hai, Ali, masala niuliku ka iko? Ane maria bengga ledo madota hau, neemo ratumba njuu."

Jadipa i Ali kana notumangimo, "Hii, hii, hii."

Nasae-sae Ali notumangi, nangulimo i Raposasa, "Aga itu, Ali. Tuumo masusa raramu. Damo hau rapepeinta bengga."

Haumo ira nompeinta bengga, Nakava sumai aga nikai i Raposasa nggonjilina, nesore puramo bengga, pade niiramo hau nanjili ri gimpu. Naupu haitu domo nidekei i Raposasa i Ali moevu bengga.

Nasae-sae, niulika i Raposasa vai i Ali, "Motataka jara kejo."

Jadi nitataka-takanamo ri soso-soso nu banua. Napanepa eo, haumo i Ali nompainu jara. Nakava ri uve nipainunamo jara bo nikenina sanggoto nanjili bo nisoonamo. Bo haumo ia nanjili ri uve bo netabuni ri kalenduna ri soso nu binangga. Dopa nasae, nakavamo topandiu. Nakava topandiu haitu, nakava saito netulu bo nibolinamo kapina, bo nevonjumo bo mandiumo. Aga ivesiamo ira aono. Tapi i Kapapitu ledopa nadota netulu aga nantaya-ntayamo. Nangulimo tuakana aono, "Petulumo vei itu, i Kapapitu."

Nesana i Kapapitu, "Eva ledo yaku metulu."

Nanguli vai tuakana, "Nakuya tano?"

"Eva neso-soa tolino."

Nanguli vai tuakana, "ledo ria tolino. Petulumo bo mandiumo. Haumo kita."

Nanguli vai i Kapapitu, "Eva ledo yaku metulu."

Nanguli tuakana, "Petulumo bo mandiumo! Haumo kita!"

Nanguli vai i Kapapitu, "Eva ledo yaku metulu. Eva neso-soa tolino."

Nanguli vai tuakana, "ledo ria tolino. Kana petulumo bo mandiumo!"

Jadipa i Kapapitu kana netulomo. Netulu ia, nibolinamo kapina bo novonjumo bo mandiumo. Dako nandiu i Kapapitu, nesuvumo i Ali netabuni bo nialanamo kapi i Kapapitu, nikenina mpalai. Tuaka i Kapapitu aono nanjili puramo. I Kapapitu nabolimo, apa kapina nikenisi i Ali mpalaimo. Nalai i Ali haitu, nikeninamo jara hau nanjili bo nitatakanamo. Haumo ia nomeka ri tasi.

Da ri dala, nialanamo vala sambesa, napolui nu mekana bo nialana muni vua nu kayu sangu rapoopa nu mekana. Nakava ri tasi, nisoonamo vua nu kayu bo nitendenamo rara uve.

I Kapapitu pangane kana netuntunimo, apa kapina nikenisi i Alimo. Nanguli i Kapapitu ka i Ali nerapi kapina, "Mai kapiku itu, Ali."

Nesana i Ali, "Nakuya bau le-le nanjaba?"

Nanguli vai i Kapapitu, "Mai kapiku tu, Ali. Nakavaomo dala nu roaku rou, domo kukava."

Aga nesana vai i Ali, "Nakuya bo mombine hitu aga pepulemo? Niulina bara nipokonoku ntotomo."

Jadi aga ivesiamo i Kapapitu mai nerapi kapina nte i Ali. Nesana i Ali aga vesiamo munimo nanguli, "nakuya bau le le nanjaba" ante nanguli "nakuya mombine hitu aga pepulemo." Aga vesiamo ivesiamo.

Nasae-sae nanjilimo i Ali hau ri banua. Nakava ri banua, notumangi vaimo i Ali ka i Raposasa. Nanguli dala ntangina, "Hii, hii, hii! Nuapamo raganggo ivei, bara mombine netuntuni mbottomo."

Nesana i Raposasa nanguli, "Ane aga itu, Ali, tuumo rapakasusa raramu. Da nariapa patokku nabaraka."

Dako ri sii rahaitu, niala i Raposasa patona bo niganena. Nanguli dala nu ganena, "Naiana patoku hitu nabaraka, kubobataka mesuvu ose sakaru."

Jadi nibobatakana patona haitu, nesuvu mpuu ose sakaru. Najadimo ponika i Ali bo i Kapapitu. Naupu ia ninika haitu, notumangi vai i Ali. Nanguli dala ntangina, "Hii, hii, hii! Berimbamo vei hitu, nobereimo hii, ledo nisani novia banua."

Nangulimo bereina i Kapapitu, "Ane aga itu, Ali, tuumo masusa raramu. Tabuluna kita nobereimo hii, rapesobamo movia banua mboto. Da nariapa patoku nabaraka." Nanguli i Kapapitu ka bereina i Ali, "Niovona pitu mbongipa meangga banuata ri karava moitu."

Nagana kapitu-mbongina, hau nibobatakana patona ri karava nituduakana ka bereina i Ali. Nakava sumai, niganenamo patona pade nibobatakana. Nanguli dala nu ganena, "Naiana patoku nabaraka hitu. Kubobataka majadi banua magana ante isi-isina." Pade nibobatakana, najadi mpuu banua nagana ante isi-isina.

Najadipa banua haitu, niponturoramo njamboko bo niala i Alimo tina tuamana ante tueina i Huse bo i Hasa monturo ri sia nte ira. Nakava ri sia, i Huse nipajadina kapala desi, i Hasa nipajadina distrik, i Ali najadi magau. Najadipa ira ntali sampesuvu mai naria puramo nтурона, nasanamo i Ali.

Nasae-sae haitu, naria puramo tina tuamana ante tueina ri sia ri banuana, haumo i Ali nanjayo-njayo. Patujuna bara metenge vai. Nasae-sae ia nanjayo, da purina hau nanjayo, niperapi i Kapapitomo kapina nte tina i Ali. Nanguli i Kapapitu, "Ala kaku vei kapiku tu, Tina i Ali."

Nesana Tina i Ali, "Nee! Marau ngena i Ali."

Nanguli i Kapapitu, "ledo kuala, aga kupepasi. Bara da matepasi, bara domo."

Nesana vai Tina i Ali, nanguli, "Nee! Marau ngena i Ali."

Nanguli vai i Kapapitu, "ledo kuala, aga kupepasi. Bara da matepasi bara domo, apa nasae gagamo."

Aga ivesiamo, aga vesiamo i Kapapitu nomperapi kapina ante matuana Tina i Ali. Aga ivesia munimo pesana Tina i Ali. Tapi nasae-sae, i Kapapitu nanguli ledo raalana, aga rapepasina bara da matepasi bara domo, kana niala Tina Alimo kapi i Kapapitu ka ia bo rapepasina.

Nialapa Tina Ali haitu, nipepasinamo. Nipepasina, da natepasi. Nipesobamo nantaya-ntaya ri laerava ri toto nu banuara. Nasae-sae nirasaina dopa ria kabalina atau kakuyana. Nipakalanganamo hau nevoro sampe hau nantuntuni tuakana nanjili ri banuana mboto.

Nakava i Ali dako nanjayo, nikavana bereina i Kapapitu domo ria ri banuara. Nakava ia nanguli, nompekutana tinana, "Mbamo i Kapapitu?"

Nesana tinana, "Rou, nevoromo."

Nanguli vai i Ali, "Nakuya bo nidekeimiu ka ia kapina?"

Nesana Tina i Ali nanguli, "Niulina vei, ledo raalana aga rapepasina, bara da matepasi bara domo."

Jadipa i Ali notumangi vaimo ka i Reposasa. Nanguli dala ntangina, "Hii, hii, hii! Aga berimbamo ivei? Bara mombine hii nalai mbotomo."

Jadi nanguli i Reposasa, "Masala niuliku ka iko, hee, Ali? Mombine aga rapanjayoka? To nuapana vai raeloka hanu?"

Kana notumangimo i Ali, "Hii, hii, hii!"

Nasae-sae i Ali notumangi, nangulimo i Reposasa, "Aga itu, Ali? Tuumo masusa raramu. Da nariapa patoku nabaraka."

Naupu haitu niala i Reposasa vaimo patokona, bo niganena. Nanguli dala nu ganena, "Naiana patoku hitu nabaraka. Kubobataka, mesuvu bulava sakaru," Pade nibobatakana patona. Nibobatakana haitu, nesuvu mpuu bulava sakaru pade nidekeikana i Ali.

Nariapa bulava haitu nidekei i Reposasa ka i Ali, nangulimo i Ali ka tona. Nanguli tesa i Ali ka tona, "Ane maria tona mompepate love, neemo rapepate. Sii bulavaku sakati. Ane maria tona mompapate ibo, neemo rapepate, Sii bulavaku sakati, Ane maria tona mompepate lale, neemo rapepate. Sii bulavaku sakati, Ane maria tona mompepate kalipopo, neemo rapepate. Sii bulavaku sakati."

Naupupa haitu, niulikanamo love, "Naiana love nitulungiku sakati bulava, rakenina yaku mevoro hau ri laerava."

Naupu haitu nikeni nu love mpuumo ia nevoro hau ri laerava. Nakava ri laerava, nikavana matuana ri puna mpangana. Nanguli matuana, "Pene kaku pangana, Ali. Ane ledo mamala nupene, ikomo rapompanga kami."

Nanguli vaimo i Ali ka ibo, "Naiana ibo, nitulungiku sakati bulava, pene ka yaku pangana." Nakava ibo bo nipenena pangana ka i Ali.

Naupu haitu, niuunaka nu matuanamo i Ali hau ri banuara. Nakava ri banuara, nangongomo poriapu hau mangandemo ira. Nanguli vai matua i Ali, "Ane ledo mambela suraya nu bereimu nualu nu pangande, Ali, rakandes kamimo iko."

Dako ri sii rahaitu nanguli vai i Ali ka lale, "Naiana lale nitulungiku sakati bulava, rapetuluna kaku suraya nu bereiku."

Naupu haitu, nakavamo lali bo nitulu ri bivi nu suraya. Netulu lale haitu, niala i Alimo suraya nipetuluna. Pasi-pasi nambela suraya nu bereina.

Naupu ira nangande hau ira maturu, Nanguli vai matua i Ali, "Ane ledo mambela vamba nu bereimu nupesua, Ali, rakandes kamimo iko."

Nanguli vai i Ali ka kalipopo, "Naiana kalipopo nitulungiku sakati bulava, rapetuluna kaku vamba nu bereiku."

Naupu sia nakavamo kalipopo bo netulu ri vamba. Pade nesua i Ali ri vamba nipetulu nu kalipopo haitu. Pasi-pasi vamba nu bereina.

Aga sampe ri siamo tesa i Ali.

Naria sangu tesa kajadia nggaulu, ri umbana sangu ngata nakodi nikenggenisi nu Madika. Naroso mpuu mposimpekunava ntodeana.

Riara nu ngata hii muni, naria tatalu tona novega rapa, nosangaka DEAKUTU, BUGILEPA, ante TOVASA. Geira tatalu hai namalamo rauli ledo naria pokarajaana, to buto rara. Pokarajaa geira hii aga nopinene sambanua-sambanuana, tuumo rauli ane naria toposusa, kana naeo ri kalampa nu uta geira tatalu. Ri umba susa naroa, ri sitomo pekadedera tatalu. Eva nuapa hia, nombalantu susa, nekou ka pangande.

Naria satempo, ri umbana ri banua nu Madika niepera vanii-vaniina posusa nanggavia ada nosangaka Posalia. Posalia hii, eva nuapa hia susa nu ada nambaso ntoto, sabana pitu mbongi-pitu eo naroa ri banua nu Madika. Mpetuli-mpengaya more-more nipetuduna nu Madika, evamo norego, novaino, nokakula, norabana, notindua ante naria muni toposileo manu. More mposileo hii, namalamo rauli more mpobotoro.

Dako ri samai pangane hia, topovega tatalu hii natetaja riara ntaina, madota muni mosileo manu. Naara pangane hia nopaka geira tatalu motimpo mangali manu tuama rakeni hau mosileo. Nakava mai ri banua nu Madika, nekadede puramo geira ri ngayo nu Madika. Ledo nasae, nekutanamo Tovasa, "Mbamo kita, Pua! Kita hii, naria paraluu kami ante kita, Pua."

Nesanapa Madika, "Raulimo jarita."

Nangulimo Tovasa, "Aga nu anu, Pua, kami tatalu hii madota muni mombasavu manu kami. Sakuya alona ane padagi manu kami?"

Nesanapa Madika, "Sema-sema ane radagi manuna, mombayari sapulu alima ringgi, ante manu radagimo rasambale ratunu, rakande ntodea."

Jadi pangane hia, nitarimaramo nggabotu nu Madika. Domo!

Nipamulamo nosileo. Eva ledo napumpu sangu roko nokeomo manu gi Tovasa samporoa. Nanguli mai Tovasa, "Ane vesiipa manuta, rabeta mpuumo kita. Da rabeta, da ratunu manuta. Nasoe mpuu kita hii, ledo nambela kotika nompalempa kada."

Jadi pangane hia manu gi Tovasa, Deakutu ante Bugilepa nidagi manu nu madika. Naara pangane hia, notinggulimo geira tatalu, hau naturu ri sou boa. Nakava ri sou boa, ledo napiri mata naturu, aga nombatanondoaka nompekirika manu nidagi ante nibeta sapulu alima ringgi. Nesanapa Tovasa, "Mbamo komiu randua! Madota komiu raporoa mangangga? Rapanganggata manu ri gimpnu nu Madika. Pelisi mami manu belo-belona."

Nikava nggabongina, nosimpakeni mpuumo geira nangangga. Nakava ri gimpnu nu Madika, nositudumo geira tatalu. Nangulimo Bugilepa ante Deakutu, "Ikomo, Tovasa, mekasua rara gimpnu nu manu."

Nesanapa Tovasa, "Neemo yaku mesua rara nu gimpnu. Sanimiu mbotomo yaku navasa hii, nakanjiru-njiru."

Nesana muni Bugilepa, "Neemo muni yaku hau mesua ra gimpnu. Apa bugiku nakakata. Manggaru njumboli ngena yaku. Sema mangisani bara naupe ngena gimpnu nu manu."

Nanguli Tovasa, "Ikomo, Deakutu. Nieva kutu nu manu kutu ri vuvumu itu mboi nambaso."

Nesanapa Deakutu, "Yakumo mesua rara gimpnu! Komiu randua manggita/nggita luona. Ane maria tona, dekei kode ka yaku."

Dako nisaka i Deakutu kada nu manu tuama, nokeo mpasangganimo bo nekaravemba. Natekajamo topojaga naturu ri sou nu manu. Nipatikuramo gimpu nu manu. Deakutu ledo nakapo nesuvu dako riara gimpu nu manu. Aga Tovasa ante Bugilepa eva bulu nu manu tavuisi nangova, damo nanoro balenggana.

I Deakutu pangane hia, nisakamo ntopojaga, nikeni ri ngayo nu Madika. Nakava ri ngayo nu Madika, nopakilumo topojaga, "Mbamo, Pua! Siimo lenje ntopangangga nisaka kami rara gimpu nu manu!"

Nesanapa Madika, "Paresa pakabelo ia itu. Bara aga maria roana."

Ledo naosa rara nu Madika, hau niperontona lenje ntopangangga. Nipeintana mai, natekaja Madika. Eva lenje ntona nosileo riavi. Nekutanamo Madika, "Sema sangamu?"

Nesanapa topangangga, "Deakutu sangaku. Tatalu kami sampovega."

"Ane vetu tano, panjilimo ruru bongi pangane hii. Maile mpadondo, pakeni roamu tumai. Ane ledo makava komiu tatalu, tadulakoku mangelona. Ane tadulakomo meelo ngena, ledo naria ampungina, kana meboba geira, aga koto bo lopu ratarimamiu."

Tinti valu mpadondona, nakavamo i Deakutu, i Bugilepa, ante i Tovasa ri banua nu Madika. Ledo nasae geira nonturo, npiresamo nu Madika, "Berimba komiu tatalu hii?"

Nesanapa geira tatalu, "Kami hii, Pua, mangakumo masala, merapi ampumo kami. Bara ratudu mokarajaa kami hii, ratarima pura kami, aga neemo ranga raboba kami."

Nekutanava vai sanganipa Madika, "Nuapa sabana komiu tatalu hii nangangga manu? Rakenimu ri umba manu rapanganggamiu?"

Nesana Tovasa, "Ratunu kami, Pua! Kami hii mpuu-mpuu to ara tai, da nibeta, da nidagi manu kami riavi."

"Ane vetu tano, kupekitunu ka komiu sambaa manu. Aga hii sangu kupopopali ka komiu. Sema-sema komiu tatalu ri tempona mangande ngena, da ranja mpangande momparisimo vasa, manggaru balenga, manggaru karo njumanggaro, raboba nu pato kayu nanono ri tutu banga, sampe moleju, sampe ia motalanggiri ri valea. Niepemiumo hukumana. Berimba, ratarimamiu?"

Nesana geira tatalu, "Ratarima kamimo, Pua!"

Nakavamo ri tempona natongomo eo, niperentamo nu Madika tadulakona nangala kandea ante uta manu, rakande gi Tovasa, Deakutu, ante Bugilepa ri kapanena. Geira tatalu nipakande ri doyata nu madika ri tempona eo naporosi. Nitambai muni kandea napane, uta nalala. Uta nioriapu ri kura kodi, nidika marisa pitu nonju kadeana, batuana pitu lite marisa tasa bayangi. Peintamo uve nu uta nalei eva kasaeja. Dako nienga i Tovasa soa nu uta, nosumbaimo sanggani. Petulana mai ri dila eva sumbere nu apu nganga. Nangulimo Deakutu, "Hii kita padé mandasa."

Nangulimo Madika, "Ane kutintimo tavatava, rapamulamo mangande."

Ledo nasae, tintimo nu Madika tavatava, gung...gung...gungng! Nonindi suara nu tavatava nomoni talu-nggani. Nipamulamo nangande. Tatalu tadulako nombajagai geira tatalu muni. Tadulako tatalu hii, nanggenggenisi pato nono. Sema ngena mompalumpaiki atura, manggava poboba mbo lima-mbelo ri tutu banga ntaputu.

Dopa nabagi randua pangande, nogoyamo balengga Tovasa. Nipeinta mai, Tovasa domo ria belona. Sumba natetutuimo, vasa nolevemo eva handu mbaso, sampe noluku ri bavo nu timpuna. Domo naria dala nu kandeal ralinjo ra nganga. Nuapa akala Tovasa?

Nerapi ia motesa sakide. "Mbamo kita, Pua! Namala yaku motesa sakide?"

Nesanapa Madika, "ledo makuya mantesa. Tora-tora kana rapakaupu kandeal."

"Io, Pua! Aga hii tesaku. Ane yaku majadi sorodadu, manopa mpuu yaku mepanaguntu. Vei pale ane mepanaguntu. Pale njidi ri kaulu, pale nggana mokobina, mata mekekere." Sampeakamo Tovasa pale ngganana ri toto nu onge ante sumba. Nepanaguntumo ia, paaaaaaang! Tajana mai pale ngganana, damo nopoo [nojepe] vasa nanavu ri timpuna nisisorona nu pale. Jadi pangane hia namala vai ia nangande, sampe naupu kandeana.

Nangulipa i Deakutu ante i Bugilepa, ""Nasalamamo iko, Tovasa. Damo kami randuapa hii nantalamaka kakata. Ini ri balengga, ini ri karo, eva topandiu. Kakatana domo nisani nanguli."

Nesanapa i Deakutu, "Mbamo kita, Pua. Namala kuumpu tesa roata, i Tovasa?"

Nesanapa Madika, "ledo nakuya. Kandeal kana rapakaupu."

Notesamo pangane i Deakutu, "Ane kuepe tesa i Tovasa, eva dopa nagana popakeana ane majadi sorodadu. Ane rapanaguntu ntona ia, mapasa balenggana. Ane panggavaku vai, kana naasepa nosongko vaja. Vesii mompake songko vaja, rua-ntapi, nidika vai jala-jalana."

Nipeinta mai i Deakutu, tano aga nanggaru balenggana. Dako ri samai pangane hia, nasalama munimo Deakutu nokaru balenggana.

Nanguli vaimo i Bugilepa, "Nasalama puramo komiu randua. Damo yaku saitoku dopa nanggaru."

Naara pangane hia, nerapi motesa muni i Bugilepa, "Mbamo kita, Pua. Namala kuumpu anu nitesa geira randua pangane?"

Nesanapa Madika, "ledo nakuya. Pokona kana rapakaupu kandeal rakande."

Jadi pangane hia, notesamo i Bugilepa, "Niepeku puramo tesa Tovasa ante Deakutu. Ane aga vesia majadi sorodadu, ledo naase nipeinta, ledo nagana popakeana. Ane yaku vai, magaya ntoto rapeinta, mosumanga, mavangga raantoaka. Apa yaku samagana kupake. Momparamula mompasua sepu ante sapatu, vesii mompasuana." Tano ia aga nanggaru kada ante buku mbulu. "Vesii muni mompasua puruka ndate ante baju, pade nipataka kaco nalei. Pade nipataka sulepe bini ante sapena." Tano ia aga nanggaru kope, tambolo, pale, njumanggaro nikaru pura.

Dako ri samai pangane hia, geira tatalu naupu pura kandeana, eva nipegali. Nesanapa Madika, "Mbamo komiu tatalu? Nikava nu akalamiu muni nangelo tesa, sampe namala komiu nomarisi vasa, nanggaru balengga ante nanggaru bugi ri karo." Nangulimo Madika, "Berimba komiu tatalu? Da rakavamu mangangga?"

Nesanapa geira tatalu, "Matobamo kami, Pua! Domo morua/nggani kami mangangga. Sangganinapa kami madota momperasa nganga, agina mokarajaa mboto. Domo kami metibuto rara."

Nanguli vaimo i Tovasa, "Mbamo iko, Bugilepa. Aginamo kita randua mekisunti ante mangande pakuli. Ala matoro vasa ante bugi ri karo. Ane iko, Deakutu, nagampa pakulimu. Ragau pura buluamu, raalonga, ala domo maria petabuni nu kutu.

Sampe ri siimo tesa ntopovega tatalu.

I RAJAMUDA

(dikarang oleh Tei Sarikuna, Rahmat)

Naria saito totua nonturo ri ulu nu binangga. Pokarajaana aga negogo. Ledo nobuya, ledo nobaju, ledo nopersuka, ledo nosiga, aga nopevo. Eo-eo pokarajaana aga negogomo. Nikava sambaa lamale, nikande. Aga vesiamo pokarajaana eo-eo.

Nasae-sae nikavanamo tumpa. Nialana bo niajuna. Dako ri sii rahaitu naongomo bo nauda rombamo. Nauda dako ri eo haitu sampe nabongi, sampe njambongi-mbongi. Notua ia hau ri ngata. Nakava ri ngata niirina bengga nu madika sagimpu. Ledo ria sangua nibolina, nikenina pura. Nikenina hau ri bulu, aono bulu niliunakana. Kapapituna bulu pade nibolina bengga ri sumai. Pade nanjili ia hau ri pokarajaana ri mata nu binangga.

Nakava ri mata nu binangga, kana vesiamo pokarajaana negogo. Nikava sambaa lamale nikande. Naeo mpadondo nitudu nu madikamo anana hau mounge bengga ri gimpur, rasuvuraka rapakandemo. Nakava ana nu madika ri gimpur, nikavana bengga domo ria. Nanjili ia hau ri banua. Nakava ri banua, niulikana tomania, "Domo ria bengga. Bara ri umba dalana nalai, ledo nisani. Ledo ria valeana nipeinta apa uda romba dako riavi sampe nabongi njambongi-mbongi."

Nanguli vai tomania, "Koi elo, hau ri soso-soso nu gimpur tu sampe hau ri longo-longo nu binangga. Pesoba peure binangga sanggoto, bara maria valeana."

Jadi haumo ana nu madika mompaelo bengga. Nakava ri gimpur nielo-elonamo ri sosona. Ledo ria valeana nikavana. Haumo ia ri longo-longo nu binangga. Sampe noure binangga ia sanggoto. Ledo ria nikavana valeana. Nikavana aga totua negogo. Nikava sambaa lamale, nikandena.

Nipekutananamo totua. Nanguli ia ka totua, "Ledo ria nikitamiu valea nu bengga? Bara maria tumai ri binangga atau bara ri umba maria valeana rikitamiu? Apa naria bengga kami nalipo, ledo aga nalipo sangu, nalipo pura sagimpu. Nielo kami dako ri soso-soso nu gimpur sampe ri longo-longo nu binangga sampe nouremo tumai nte komiu, ledo ria nikava kami valeana, apa uda romba dako riavi sampe ri bongi njambongi-mbongi. Jadi domo nisani valeana."

Nesana totua, nanguli ia, "Ledo ria nikitaku."

Jadi notesa-tesamo ana nu madika haitu ante totua. Nasae-sae ira notesa, nangulimo ana nu madika ka totua haitu, "Komiu bara rasanimiu mopaelo?"

Nesana totua, nanguli, "Ledo rapangaku, kaloropa manguli."

Nangulimo ana nu madika, "Ane ivetu tano, hau motua yaku ri ngata manguli ka tomaku."

Jadi haumo ana nu madika manjili hau ri ngata. Nakava ri ngata nekutanamo tomania. Nanguli ia, "Umbamo bengga?"

Nesana anana, "Ledo ria nikavaku. Nieloku pura, ri soso-soso nu gimpur sampe hau ri longo-longo nu binangga sampe hau ri uluna, niureku sanggoto binangga. Ledo ria nikavaku valeana. Nikavaku aga totua ri uluna. Nipekutananaku ante totua bara maria valea nu bengga rikitana."

Nanguli ia, ledo ria nikitana. Tapi niulikuka ia, bara rasanina mopaelo. Nesana ia, 'ledo rapangaku, aga kaloropa manguli."

Nesana tomana, "Ane ivetu tano, koi ulika tumai totua."

Jadi haumo ana nu madika mangala totua. Nikavana totua kana negogomo. Nikava sambaa lamale, nikande. Nakava sumai, niulikanamo totua, "Panguli ntomaku hau motua ri ngata komiu."

Nesana totua, nanguli ia, "Yaku hii ledo nasanda hau ri ngata. Nikitamiu mbotomo yaku. Ledo nobuya, ledo nobaju, ledo nopuruka, ledo nosiga, aga nopevo."

Jadi nanjili vaimo ana nu madika hau ri ngata. Nakava ri ngata, nekutanamo tomana, nanguli, "Umbamo totua?"

Nesana anana, "Rumai. Niulikukamo totua. Aga nanguli ia, 'ledo yaku nasanda hau ri ngata. Nipeintamiu mbotomo yaku. Ledo nobuya, ledo nobaju, ledo nopuruka, ledo nosiga, aga nopevo."

Nanguli tomana, "Ane ivetu tano, rakeni siga, rakeni buya, rakeni baju, rakeni puruka."

Hau vaimo ana nu madika nanggeni puruka, baju, buya, siga. Nakava sumai nte totua niulikanamo totua, "Sii purukua, sii baju, sii buya, sii siga. Panguli tomaku kana hau ri ngata kita." Nidekeinamo ka totua.

Nangulimo totua, "Kitamo, komiu ri kolu, damo ri puri yaku."

Hau mpuumo ana nu madika ri kolu, totua da ri puri. Tano ia ri puri mai nombaduru kuli nu dale ri dala, bo neparikantona. Nakava ri ngata nekutanamo madika ka anana, nanguli, "Umbamo totua?"

Nesana anana, "Da ri puri. Yaku nitudunamo nokolu. Nanguli totua, 'Damo ri puri yaku.'"

Nasae sakide nakavamo totua. Nakava ia nanguli, "Assalamalaikum."

Nesanamo madika, "Aleikumsalam."

Naupu haitu nonturomo totua bo nompangamo. Nalapupa pompangana, nekutanamo ia nte madika. Nanguli ia, "Aga sii kupekutana ka komiu, Pue. Bara nuapa nitevaika batua hii, rauli bo raepe."

Nesana madika nanguli, "Aga sii kupekutana ka komiu, totua. Apa naria bengga kami nalipo, ledo aga nalipo sangu, nalipo pura sagimpu. Nitiduku anaku mopaelo bengga. Nielona puramo ri soso-soso nu gimpu sampe ri longo-longo nu binanagga sampe noure hau ri uluna. Ledo ria nikavana, aga komiu nikavana. Nipekutanana komiu bara maria rakitamiu bengga bara ledo atau bara aga valeana. Nanguli komiu ledo nikitamiu. Pade nanguli anaku nompekutana komiu, bara rasanimiu mopaelo. Jadi aga sii paraluuku nipekialakuka komiu. Ane rakavamiu bengga pelisimiу mboto anaku papitu umbanana rapokonomiu rapobereimiu."

Nanguli totua, "Ane ivetu tano, ledo rapangaku, kaloropa manguli." Naupu haitu nigogo ntotuamo kantona. Nisuvurakanamo kuli nu dale anu niduruna ri dala pangane, bo nibite-bitenamo, pade nibilana, "Sangu randua, sangu randua, randua randua, o hamai ri buluna nagavu tano bengga. Rumai benggamiu, madika. Ri bulu nagavu-gavu moitu. Aono bulu niliunakana dako ri sii rahaitu, kapapituna buluna benggamo."

Jadi nitudu nu madikamo anana hau mompepeinta. Aono bulu niliunaka, kapapituna bulu nikavanamo bengga. Bo niirinamo bengga tumai ri gimpu pade napola ri banua. Nakava ri banua, nangulimo ana nu madika ka tomama, "Riamo bengga. Ri gimpu puramo."

"Ane ivetu tano, ratuduaka ntotuamo umbanana nipokono rapobereina."

Jadi nituduaka ntotuamo, I Kapapitu nipokonona rapobereina. Nituduakanapa pade niovomo ponika. Pitu mbongipa raponika. Nagana pitu mbongi, ninikamo totua ante i Kapapitu. Ri eo mponika haitu nipoposanga nu madikamo totua haitu i Rajamuda sangana. Najadi ira noberei haitu nakavamo sura ntona dako sangatana. Nanguli riara nu surana: "Tumai ira ngena makava manggeni anu rapopabotoka i Rajamuda. Apa i Rajamuda nisanina nopaelo anu le nisani-sani, anu nalipo. Nau damo anu ri lapi nu bulu, nisanina nangelo. Naria anu rakeni kami rapopabotoka i Rajamuda nte batua papitu. Ane mambela anu rakeni kami raboto i Rajamuda, maboli ka ira pura batua nikeni kami papitu hii rapobatuara. Ane ledo mambela ngena raboto i Rajamuda, ana nu madika papitu rakeni kami mpanjili rapobatua kami. Apa anu nioreka kami sambulumo aga nipopberei i Rajamuda."

Jadi nanggavapa tempona ira makavamo, nasadiamo madika ante ana-anana. I Rajamuda nasesamo rarana nolipa-lipa apa tona makavamo manggeni anu raboto.

Nanggavapa tempo eo nggakavara nalaimo i Rajamuda sampe nanggava binangga oge bo nokaavemo. Nangulimo ia, "Sakamo yaku, buaya. Sakamo yaku, bau gorangu." Aga vesiamo pangulina ia nokaave ri binangga oge. Nanggava rampe, nekasua ri rampe ledo nekai-kai aga kapola-polamo. Nanggava ri kale, nesua ri kale, ledo nekai-kai, kana kapola-polamo sampe ri tasi. Nakava ri tasi neumba ri bavona. Kaliu-liu nosinjumbaka lapala ntona nanggeni anu raboto i Rajamuda. Nakava ri kapala nompenemo ia riara nggapala. Naria tona saito ri savalikuna bo naria anu nibungu ri sia. Nipekutananamo tona, nanguli ia, "Nuapa nibungu-bungu haitu?"

Nesana tona nanguli, "Neemo rauli. Marau madika."

Nanguli vai i Rajamuda, "Nakuya, tano?"

Nesana vai tona pangane, "Anu rapopabotoka i Rajamuda."

Nanguli vai, "ledo makuya rauli. Ledo ria tona manguli apa kita sanggani hau manggeni."

Jadipa niuli ntonamo anu nibungu. Niulinamo, "Vua ntoboyo."

Jadi nisani i Rajamudamo anu rapopabotoka ia, tapi tona haitu mai ledo nisanina i Rajamuda nekutana haitu. Jadi kana nosangganimo ira hau rara nggapala. Napara ri pesampo nu kapala, nanaumo i Rajamuda dako riara nggapala, ledo nisani ntona haitu. Bo nelyomo i Rajamuda ra uve sampe niumba ri talinti. Nakava ri talinti nolipamo ia hau ri banuara. Nakava ri dala, nidurunamo kuli nu karatasa bo nipayikantona. Nakava ri banua, nekutanamo bereina i Kapapitu nanguli, "Dako ri umba tano komiu, Rajamuda?"

Nanguli ia nesana, "Dako nangelo pakuli."

Nasae sakide nakavamo tona nanggeni anu raboto. Nakavapa ira, notesamo. Nangulimo tona nanggeni anu raboto, "Kami hii tumai mantuntuni sura kami isaeo. Riara nu sura, kami nanguli maria ngena anu rakeni kami rapopabotoka i Rajamuda. Ane mambela ngena raboto i Rajamuda, maboli pura batua papitu nikeni kami hii rapobatuamu. Ane ledo ngena mambela, rakeni kami pura anamiu papitu majadi rapobatua kami."

Nanguli matua i Rajamuda, "Damo komiu mantasere mai, Rajamuda. Nariamo tesa niulira."

Nesana i Rajamuda, "Anu tu, ledo rapangaku, kaloropa manguli."

Nigogonamo kantona bo nisuvurakanamo kuli nu karatasa pade nibite-bitenamo. Pade nibilana, "Sangu randua, sangu randua, randua randua, ohh, vua ntoboyo tano nibungu." Pade nivole. Nivole mai, vua ntoboyo mpuu nibungu. Jadi naboli mpuumo batua papitu nikenira.

Naupu haitu notinggulimo ira. Notinggulipa ira, nasanamo poberei i Rajamuda bo i Kapapitu. Bo nosikenimo ira hau ri talua nompovia sou ri talua. Dopa nasaе naria vai sura ntona dako ri sangatana nanguli naria vai anu rakenira rapopabotoka i Rajamuda ante batua vai sapulu ampa. Ane mambela raboto i Rajamuda, rapobatuara vai anu rakeni ntona sapulu ampa. Ane ledo mambela, rakenira vai ana madika papitu ante batua nikeni ntona pangane.

Dopa nanggava tempona, nitunju Rajamudamo souna ri taluana. Bo niulikanamo matuana, "Rabalasimo sura ntona, raulika domo ira tumai, apa pakuliku napapu ante soumo."

TUTURA BO JARITA “BENGGA NAJADI NUA” (dikarang oleh Ngile Lamanusu, Banpres)

Pompamula tutura bo jarita hitu dopame kutenterani bo kututurani papola. Nantuntuni patuju nte nia nu pomarenta mompakatuvu mpanjili basa mboto, iamo basa "Kaili-Ledo". Apa nggapuri hitu, domo nisani belo ngana-ngana nggapuri notesa ante basa mboto, iamo basa "Kaili-Ledo".
Kapola tesaku hitu, iamo tutura bo jarita "Bengga najadi Nua" (Nua naria bo natuvu ri Sulawesi.)

Tesa ntotua, nggaulu manusia bo binata njumangu da napara povegara bo binata da namala nojarita eva manusia. Nasae-sae povegara haitu nabolimo. Manusia bo binata nosipobalimo, apa manusia domo nantuntuni jarita topompajadi ira, iamo Tupu. Apa manusia haitu nangepe tesa pebagiu nu ule. Kasae-sae ira nogamo bo nomulimo nadea-dea.

Sangu tempo Tupu nanguli ka manusia haitu, "He, manusia! Apa komiu nangepe tesa nu ule, domo yaku niepemiu, mompamula eo hitu komiu pesuvumo dako ri sii. Koimo hau ri ntanina mompaelo katuvumi mboto bo komiu kuposibali. Aga komiu manusia kudekeika kuasa ri njumangu dunia hitu. Belo ri anu natuvu ri bavo tana bo binata namala rapatesi bo rakandemi."

Itumo sabana belo tonji, belo binata mbaso ntanina navuramo ante manusia, najadi nalompu. Kasae-sae manusia nadea munimo mulira, nobagi-bagi munimo ponturora nompaelo katuvura.

Sangu tempo ira nonia movia posusa. Nangulimo saito totua nipobalenggara riara ngata haitu, "Ulika pura sampesuvuta tumai masiromu ri barugata molibu ka posusata."

Nasiromupa ira pura-pura ri baruga haitu, nangulimo totua haitu, "Kita movia posusa mbaso. Binata nuapa to rapatesita ala magana bo mabutu kita?"

Nesanamo tona dea haitu, "Bengga!"

Nanguli vai totua, "Ane ivesia, berimba akalata ala mamala rasakata? Apa bengga navuramo bo nalompumo. Berimba muni akalata manggeni tumai?"

Nesana vai tona dea, "Raraga, raaya bo rakamburo pade radiita tumai manjili ri baruga pade rasambale."

Pade nanguli vaimo totua nipobalenggara haitu, "Ane ivesia tano, majadimo kita movia posusa. Koi kandamo gimba, tandana mompamulamo mompasadia nuapa-nuapa rapake ri posusa, bo toporaga bengga, koimo moraga bengga."

Moni nu gimba haitu ivei, "Dung, gu, dung, dung, gu, dung, dung, gu, dung.... Nangepe moni nu gimba haitu, natekaja puramo binata bo nompekiri, "Nuapa nikandaka manusia gimba raitu? Bara movia posusa mbaso ira."

Ranja mpopekiri vesia binata, neliupa bengga haitu. Notesamo bengga tinana ka anana bo bengga ntanina ivei;

Bengga Tina (Birantua): "Hei! Epemiu gimba nu manusia raitu ri baruga. Nee, nee, bara kita hitumo to rasakara bo rapatesira rapakera ri posusa."

Bengga ntanina, "Bara makana tesamu tutu ngena. Jadi berimba kita hitu? Malai kita hitu, raragara muni. Ledo malai kita, mamate sangganimo kita ngena."

Notesa vai bengga tina (Birantua) haitu ka anana, "Komiu ngana, ane rapana yaku raraga bo rapatesi nu manusia ngena, komiu kana mosipeili. Neemo mosipodaa, bo neemo mosipovuu mata komiu. Mosikeniaka pakabelo komiu. Apa damo kaupuna bara kita mosinggita eo hitu. Domo ria sanupa kita mosinggava bo mosinggita."

Da ranja mpotesa ivesia ira, nikitaramo manusia lako ri buluna hau nanggaparai ira riara nggarava. Nieperamo manusia nanguli, "Hamaitu raragata! Bengga tina birantua maitu, apa naupumo kapoanana."

Bengga Tina, Birantua, "Kai! Yaku mpuumo to raragara! Yolo bo Yole, mogaamo kita. Domo mpuu kita mosinggava." Pade notumangimo bengga haitu bo nangova.

Domo nasintotoayu dala pangovara. Nantende bulu, notua ra njalu, nesua ra gumbu, nonjau uve, nanjili vai riara nggarava, notua vai ri talekera. Tempona bengga tinana haitu nangose talekena, ledo nipeintana ule sava nombabotu dalana. Nambela nijejena ule sava haitu. Nanguli ule sava, "Huh! Nasombo vai bengga haitu ia. Ledo nipeinta-intana kita noliu ri dala, kajeje-jejemo."

Bengga tina birantua, "Merapi ampu yaku. Ledo nikitaku komiu, ule, apa yaku niraga nu manusia."

Ule sava, "Nuapa? Niraga nu manusia? Nuapa nu manusia tu, nolipa kadengga-dengga eva pinoito. Mai yaku mangeva manusia, apa baliku mami ia."

Bengga tina, "Neemo ivetutu komiu, sava, apa natau ngena manusia, nadea akalara."

Ule sava, "Petaa ri situ ruru, iko. Nutara yaku mangeva manusia."

Dopa nasae nakavamo manusia ri sia, nipeintara ule sava ri dala bengga nengavu. Netaa puramo manusia nombaraga bengga, nompatiku ule sava haitu. Naria nangala kayu poboba, naria nangala batu raporempe sava haitu. Nidulu bobara bo nirempe batu ule sava haitu sampe namate.

Da ranja mbadulu boba ule sava haitu manusia, domo nipeintara bengga haitu nalaimo nantuntuni talikuna natudu ri binangga. Nakava ri binangga, nonjau bo nokaavemo bengga haitu nakavao pade nesore bo nantende bulu sampe ri pantaolo bulu dopa sanggani nikalau nu manusia. Kajadina domo niraga mpapola bengga haitu. Nanjilimo ira pade nangelo bengga ntanina vai pade nikenira mpanjili, nikamburora pade niumbura nakava ri baruga.

Bengga Birantua pangane, nolompumo ri pantaolo. Nasae-sae domo nisanira dala manjili. Nasae-sae ia, nagumbumo buluna, tanduna nombali najadi nakodi bo nompanoa hau ri purina, nombali najadi "nua". Siamo bengga bo nua nasimbayu pokarona, kalupana, tambolona nosai nabula. Balenggana ledo naria posinjalana. Posinjalana sakide aga, pokarona, pobuluna bo potanduna.

Nasudu ri siimo tutura bo jarita ntotua, "Bengga Najadi Nua" (Anoa).

VALESU ANTE KALIBAMBA
(dikarang oleh Demi Bonga, Banpres)

Naria saeo, valesu ante kalibamba nosiuunaka hau mekaloyo riara nu limburu binangga.

Nanguli valesu ka kalibamba, "Mekaloyo kita, Amba?"

Nesana kalibamba, "Neemo. Maonga ngena kita."

Nanguli vai valesu, "ledo. Rapesoba ntani ruru, bara maonga bara ledo."

Nanguli kalibamba, "Ane vetutu tano, kita haumo ri binangga."

Naupu nanguli vehaitu, haumo ira ri binangga. Nakava ri binangga, nangulimo valesu ka kalibamba, "Pekaloyomo, Amba!"

Aga nanguli kalibamba, "Ri umba yaku ri kaulu. Yaku aga niuunaka hii!"

Nanguli vai valesu, "O....io, yaku ri kaulu apa yaku neuunaka."

Naupu nanguli vehaitu, haumo valesu ri bavo batu mbaso pade nangulimo ia ka kalibamba, "He, Amba! Kanoto yaku motingganavu."

Naupu nanguli vehaitu, notingganavumo valesu hau riara nu limburu. Nasae sakide velesu notingganavu. Domo naria nikita nu kalibamba ia neumba ri bavo nu uve. Domopa naria valesu neumba nikita nu kalibamba, nevoromo kalibamba hau ri toto nu limburu anu nipotingganavu nu valesu pangane. Nakava ri toto limburu haitu, niepe nu kalibambamo valesu nerapi tulungi rasoreaka ia dako riara nu limburu. Jarita nu valesu nerapi tulungi ivei, "Soreaka yaku, Amba!"

Nanguli kalibamba, "Neepa ruru."

Nanguli vai valesu, "Soreakamo yaku hii, Amba!"

Nanguli vai kalibamba, "Neepa ruru, salekopa."

Nanguli vai valesu, "Kana soreakamo yaku hii, Amba!"

Nanguli vai kalibamba, "Neepa ruru, salekopa."

Nanguli vai valesu, "Kana soreaka mpuumo yaku hii, Amba!"

Nanguli vai kalibamba, "Neepa ruru. Salekopa-salekopa.

Nangepe jarita nu kalibamba "salekopa", nekutanamo valesu, "Magana sakuya leko tano pade musoreaka yaku hii, Amba?"

Nesana kalibamba, "Magana pitu leko."

Nekutana vai valesu, "Sakuya lekomo yaku naave hii, Amba?"

Nesana kalibamba, "Talu-lekomo komiu naave tu, Esu!"

Nanguli valesu, "Masae gaga tu, Amba! Domo kupakule hii. Nabosumo taiku nanginu uve."

Nanguli kalibamba, "Domo masae ntoto mai, ledo nakavao nanggava polekona vaimo."

Nagana kapapitu lekona, valesu naave, nangulimo kalibamba, "Naganamo pitu-leko komiu naave tu, Esu! Tapi ledo mamala kusoreaka komiu."

Dopa nasae ntoto kalibamba nanguli vehaitu, nesore mbotomo valesu dako riara nu uve. Nanggitapa valesu nesoremo, haumo kalibamba nombatutuaka ia. Nakava ri sinjori nu valesu, nekutanamo kalibamba, "Nakuya matamu nalei tu, Esu?"

Nesana valesu, "Nakuya vai hii! Mata ntobia ledo malei!"

Nangepe pesana nu valesu nongirimo kalibamba. Nanggita kalibamba aga nongiri, naraumo valesu ka kalibamba. Naraupa valesu, nalaimo kalibamba pade nosimpogaamo ira.

TOPOLINO TOLIA (dikarang oleh Demi Bonga, Banpres)

Naria ampa tona nosampovega. Ira nosanga TOPENGGE, TOLENDI, TOBIA, ante TOKASO. Ira ampa mai notolia ri mata binangga Manggalapi. Toliara bo limapulu matana. Potoliara muni mai naganamo saminggu tempona hau ralino.

Nangulimo i Tobia ka i Tokaso. "Ralinotamo toliata le, Tokaso?"

Nesana Tokaso, "Anumo. Maipia kita hau molino?"

Nanguli vai i Tobia, "Maile. Ulika i Topengge ante Tolenda, maile kita hau molinomo."

Naeo mpadondo, nakavamo i Tokaso, i Topengge, ante i Tolenda ri sou i Tobia. Naupu nanggalivo, nangulimo i Tobia ka ira tatalu, "I Tokaso manggeni toko, i Tolenda manggeni kanjai, i Topengge ri puri, yaku ri kaulu."

Naupu nanguli eva haitu, haumo ira noure binangga Venunioge. Nakava ri Bambaru Balo, nesaimo ira sabingga panggai noure salu kodi, pade nendake sabingga panggana. Nasavi ri oru notuntu sampe nakava ri pegolina hau ri mata binangga Motou sabingga panggana.

Naliu mata binangga Motou, nendake vai ira sampe nesavi ri buntina ri Dama. Pade notua sampe natudu ri mata binangga Motou sabingga panggai. Naliu mata binangga Motou sabingga panggai, nikavaramo lumbuna naluo anu natopa niuli lumbuna ri mata Motou.

Naliu lumbuna haitu, nakavamo ira ri posovo binangga Manggalapi sabingga panggana ante sabingga panggai. Tapi ira noure vai hau ri binangga Manggalapi sabingga panggana sampe nakava ri matana. Nakava ri bambaru, niboliramo baku bo napolamo ira hau nolino tolia.

Dopa nakavao ntoto ira nalai dako ri bambaru, ledo nisani-sani sampe sanika nerumpamo sangu nua anu nambela toliamo, tapi napudu. Nirumpana i Tobia, tapi ledo nambela. Nisaka i Tobia tanduna bo nosibagamo i Tobia ante nua.

Nanggita i Tobia nosibagamo ante nua, nompenemo i Tokaso. Nikenina nompene muni toko. Vesia muni i Tolenda, nikenna mpangovamo kanjai. I Topengge nabolimo. Nangova, ledo nagasi. nompene ledo namala. Kaupuna i Topengge aga nongare ri belana ivei, "Berimbamo yaku hii, le...?"

Nangepe i Topengge nongare, nangulimo i Tobia, "Apa berimba aga nongare, le? Nabayasa gaga kalanggaina tu, le. Umbamo i Tokaso ante i Tolenda? Pekunava ruru yaku hii, le!"

Nesana Tokaso, "Neepa ruru, le. Pakasavi ntani yaku ri panga kayu hitu."

Nesavipa i Tokaso ri panga kayu nipopenena, nibununamo nua, tapi ledo nambela. Aga napola ri bata kayu santanina. Nanggita toko haitu, nantambaimo pobilisi nu nua. Niduliakana i Tobia, nokadului natudu ri ranjalu. Nokadulipa i Tobia, i Topengge nibaga nu nuamo. Nongaremo i Tokaso dako ri panga kayu nipompenena ka i Tobia, "Mamatemo i Topengge le, Tobia...?"

Nangepe i Tokaso nongare eva haitu, nasalisa i Tobia nembangu bo nompari nendake hau mbatulungi i Topengge. Nakava ri sia, nitampa i Tobia tambolo nu nua sakidepa napudu. Nobelapa nua haitu, domo nipakulena nebaga. Kaupuna nua haitu namatemo.

Namatepa nua haitu, nanaumo i Tokaso. Nanjili munimo i Tolenda. Nasiromupa ira, nisamparamo nua. Naupu nisampara, nisodaramo ri panga nu kayu bo napolamo ira.

Nakava ri tolia paratamana, ledo nambela. Vesia muni tolia karanduana, katataluna, kaampana, sampe kasapuluna, ledo ria nambela. Nakava ri tolia kasapulu sanguna pade nikava tolia nambela ibo. Tapi ibo haitu ledo nialara, aga nipopalaira. Naliu haitu, napola vaimo ira hau mompeinta tolia ntanina.

Nakava ri tolia kasapulu randuana, ledo ria naombe sampe ri tolia katalupulu alimana pade nikavara vai dalodo dako namate. Nikavarapa dalodo haitu, nangulimo i Tobia ka i Topengge ante i Tolenda, "Mabolimo komiu randua mosampa daloda hitu. Yaku ante i Tokasomo ruru mapola hau molino. Ane maupumo ngena rasampamiu, sodamo ri panga kayu hitu pade mapola komiu metuntuni."

Naupu nanguli vehaitu, napolamo i Tobia ante i Tokaso hau mompeinta tolia sapulu alimapa. Nikavara tolia sapulu amppa ledo ria naombe. Tolia kalimapuluna pade nikavara nua pomava dako nambela ntoto.

Nanggitapa i Tobia ante i Tokaso, nekaravembamo nua haitu madota malai, tapi ledo namala apa kadana natesoo mata nu tolia. Nekaravembapa nua haitu, nangulimo i Tobia ka i Tokaso, "Bunumo mai, le, Tokaso!"

"Neepa ruru, le. Mompene ntani ruru yaku."

Nangepe pesana i Tokaso eva haitu, niago i Tobiamo toko dako ri pale i Tokaso pade nibunukana nu nua. Nibunu i Tobia nua, ledo nambela aga nambela balimbi nu kayu lepaa. Nisanipa nu nua ia nibunu, nantambaimo pekarawembana. Nirumpina i Tobia tapi ledo nabote apa kadana natesoo mata nu tolia. Nerumpapa nua haitu, nangulimo i Tobia ka i Tokaso, ""Koi ala tumai ruru kanjai nte i Tolenda le, Tokaso!"

Nakavapa i Tolenda, nitudu i Tobiamo ia mombabunu nua anu nambela tolia. Aga nesana Tolenda, "ledo mabia yaku mombabununa, le, Tobia! Aginamo komiu mombabununa."

Nangepe pesana i Tolenda eva haitu, naraumo i Tobia. Niulina ka i Tokaso ante i Tolenda, "ledo ria gunana komiu nipoimporoaka tumai nolino. Aga nosisarumaka."

Naupu nanguli vehaitu, nialanamo kanjai ri pale i Tolenda bo nibunukana nua. Nibunu i Tobia, ledo vai nambela, aga napola ri bata kayu nu kanjai. Nanggita kanjai ri bata kayu, nantambai ntotomo pekaravemba nu nua. Nirumpana vai i Tobia, tapi kana ledo nabote apa kadana natesoo mata nu tolia.

Nanggita nua haitu nerumpa. nompenemo i Tokaso, nangova munimo i Tolenda, nabolimo i Tobia saitona ri sinjori nu nua nompekirika berimba akalana sampe mamala nu nua anu nambela tolia haitu. Toko ante kanjai hamai ri sinjori nu nua puramo. Raala ledo mamala apa nua nerumpa.

Nasae sakide, nakavamo i Topengge. Nekutanamo ia ka i Tobia, "Ri umbamo i Tokaso ante i Tolenda, le, Tobia?"

Nesana Tobia, "Tuumo raelo todoyo bayangi gahaitu! Ledo ria gunana nosimporoa ante ira tumai nolino aga nesarumaka."

Naupu nanguli vehaitu, nitudu i Tobiamo i Topengge hau mangala lauro. Ledo nasae ntoto nakavamo i Topengge ante ndole nu lauro mputi. Nakava ri sia, niilo i Topenggemo lauro. Naupu niilonan, nidekeinamo ka i Tobia, pade niaya i Tobiamo ka nu nua. Namalapa niayara, nitajaramo mapara ante ira. Naparapa ante ira, nangulimo i Tobia ka i Topengge, "Pule ri kayu hitu ruru sampuli supaya ledo moara. Komiumo motaja, le, Topengge. Yaku mosambalena."

Naliu nanguli vehaitu, haumo i Tobia nombatutuaka nua anu niayara pangane. Nakava ante nua, nisaka i Tobiamo tanduna bo nipayungoanamo pade nisambalena.

Nanggita nua nisambale i Tobiamo, nanaumo i Tokaso dako ri kayu nipompenena. Vesia muni i Tolenda nakavamo dako ri petabunina. Namatepa nua nisambale i Tobia, nangulimo i Tokaso, "Kita rasampatamo, le!"

Nanguli muni i Tolenda, "Sampamo. Maupu rasampa, manjilimo kita."

Aga nanguli i Tobia, "He, le! Neemo aga matau mosiparenta. Apa kita tumai molino, ledo tumai mosiparenta, tapi kita tumai nangelo bau rakandeta mpasanggani."

Nangepe potesa i Tobia eva haitu, nangulimo i Topengge, "Nambela ntoto jaritamu, le, Tobia! Kita tumai rahitu ledo tumai mosiparenta tapi tumai mangelo katuvuata mpasanggani."

Naupu i Topengge notesa, nisamparamo nua. Naupu nisamparama, nikeniramo hau ri bambaru. Nakava ri bambaru, nitaparamo. Naupu nitapa, nangulimo i Tobia, "Nabai puramo bau nitapata hii, le! Kita rabagitamo."

Nanguli Tokaso, "Bo rabagimo, ya."

Naupu nibagi, nisuarakamo riara nu dalira mboto. Naupu nidikana riara nu dali, nanjilimo ira hau ri banuara mboto.

Naupumo tesa **topolino tolia**.

SABANA TAI NU LAGA NATIO¹

Ivisiamo panguli nu tesa vei nariamo sangu ngata. Ngata hai ngata nu laga. Ngata Binggelada sangana. Madai karoana ngata Binggelada hai. Panguli nu tesa, pura-pura laga ri ngata hai sangga mbaso taina, nabengge pura. Ngata hai naria saito Madikana nianggataka ntodea nipangala patuju. Madika hai nipokono ntodeana ri Binggelada hai pura.

Naria sanggani Madika hai nompasiromu toteana. Naria anu raulina. Visiamo nikava nu eo nitanda nu Madika, nasiromu puramo toteana. Nakavamo Madika nosiga kasaeja nikeni ante kambasoana. Madai kagayana nikita nggavao nesavi ri jarana najampi ngguni nabone java namala tarina. Tadulakona nojara muni rinjidi nggana nu Madika. Ivisia Madika namosumo ri kasiromua, nitomui vai nu tadulako ntopeaju. Pade niajuki nakava ri baruga. Namadai karoana apa nitambai muni totea nanggati ante notape palena.

¹ SABANA TAI NU LAGA NATIO Dikarang oleh A. Panggagau, Toaya, Sindue

Aga sampalai Madika nonturo, pade neangga nompopondodo todea, apa ia mojaritamo.

Nangulimo Madika: "E...anaku pura-pura...epemiu! Naria anu kutenteraka ka komiu." Todea nondodo puramo, mangepe anu rauli nu Madika kara.

Nesana vai Madika: "Kupatoraka komiu,...naiya ngatata hii niponturo nu lagata, nadeapa laga mombinena pade laga langgaina. Kuperapi ante komiu pura-pura, ledo mamala moberei ante anu ledo laga. Sangadina mbale laga mboto. Ledo makuya moberei melabi dako ri saito. Isema-sema ledo mangepe petevaiku,...kana maria ngena bala rakavana. Ane ledo karona mboto raturungana, muli nu mulina kana mombokava." Aga haimo hai petevai nu Madika. Naupu hai Madika nanjilimo, bo nagaro puramo.

Todea nompariara mpuu nuapa niuli nu Madikara. Laga mombinena nasituju puramo ane rapopomarue nu bereina. Ivisia muni laga langgaina damo dotana noberei nadea.

Nariamo saito laga langgaina nabibo mpuu ri ngata hai, sangana i Lagauntu. Naiya i Lagauntu hii kabilasa mpanjayo ntoto ngena. Ledo ntoto niepena nuapa niuli nu Madika.

Ivisiamo pangane i Lagauntu hii naria natepanjayo ri sangu rano. Nikavanamo hamai sangu ngata nu tumpa. Randaan ri ngata hai sangi topodade pura. Bo i Lagauntu topongei mami, nariamo saito tumpa randaan nosikana matamo nte ia.

Nangulimo i Lagauntu : "E...Umpa, namomi mpuu ngena iko itu...madota ledo madota, kana kupoberei iko!" Tano tumpa randaan hai i Umpamomi sangana.

Nipobereinamo i Umpamomi hai. Naupu niboti nikelinamo mpanjili ri Binggelada. Madai karau ntotuana apa anana i Lagauntu nompoberei ledo sangga laga. Aga nompoberei tumpa. Ivisia muni laga ntanina narau puramo nte i Lagauntu. Pade ia ledo ntoto naria sesana nipokarauka ntotuana ante todea. Aga niepena mpopoирi bayangi nuapa niulina pura.

Naroomo geira njamboko ri banuara mboto. Nabelo mpuu posikenina ledo naria nosisala. Ane hau mandiu kana mosingganimo. Visia muni ane hau manggita anu karoana, kana mosikai konjilimo.

Naria sanggani geira nanjayo-njayo ri bivi nggarona. Ledo nisanina nikavanamo geira sangu ngata. Ngata hai naroa mpuu, ngata nu lamale panguli ntona. Apa namagamo nolipa nonturomo geira ri bivi nu dala. Nikita geiramo nadea mpuu randaan nu lamale nolipa nolilive. Pade singga gaya. Bo nikava lamalemo i Laga topongei nggaraka ante todea mata muni, dota-dotanamo nanggita randaan hai. Pade randaan pura hai nakadiki bo nanjodi. Ledo nisalaina eva lamale nabai nte uve.

Ivisiamo i Umpamomi hii nompariara bayangimo nanggita ampe nu bereina apa natalanjoro ntotomo.

Nangulimo i Umpamomi: "Laga,...umbana nipokonomu randaan nu lamale hai?" Natekaja mpuu i Laga, timbana nisapa liona. Bo i Laga tona nipi mami matana, ledo naria nabali ingguna; aga negoli nekutana ia nte bereina: "Apa nakuya tano,...madota iko kupopomarue?."

Ledo muni nitavari i Umpa pekutana i Laga hai, niulinamo: "Madota yaku mupopomarue,...aga kuperapi...mupakasangu banua."

Visiamo tesa hii, najadimo nipoberei i Lagauntu saito randaan nu lamale hai. Sangana i Maleura. Aga naliu niboti nikelinamo i Maleura nosambanua ante i Umpamomi.

Ane hau ri talua, nikenia saito bereina, pade nibolina saito moriapu ri banua. Visiamo itu saeo-saeo panggaviana. Nangulimo tesa hii vei, ane poriapu i Umpamomi panguli i Laga ledo narasa.

Mau nantonomo uta poriapu i Umpamomi, kana ledo narasa niulina. Ane aga namala domo rapetami-tamina.

Ane poriapu i Maleura, nabelo mpuu pesua mpangandena. Ane panguli nu tesa, mau naupumo utana da nidilapinapa banga nu uta hai. Karasana vei uta poriapu i Maleura hai. Tumo rauli ane moriapu talebe mpoge, utana kelo nibale nu lamale, domo nirampe matua noliu. Visiamo panguli nu tesa.

Naria sanggani i Lagauntu hii nolipa nggavao, ledo nikenina nau saitoi bereina. Nibolina pura ri banua. Berei randua hii nasana-sanamo nonturo ri tambale.

Nangulimo i Maleura: "E, Umpa...elomiu vei kutuku tuaka,...madota komiu!"

Bo i Umpamomi tobelo rara niukanamo kutu nu maruena i Maleura hai. Visiamo pangane, hii nangelo kutu nekutanamo i Umpamomi: "Male,...berimba sabana poriapumu uta bo narasa gaga nikande nu bereita i Laga? Nuapa ntoto nigalokamu, Male?"

Nesanamo i Maleura: "Kabiasaku noriapu uta hai, Umpa...ane ninavukumo santa, nipoporendeku vai ruru. Ane narendemo...nokanavumo yaku riara nggura hai. Nasae sakide yaku nonango-nango riara uta hai sampe nosilele rasana. Ane narasamo...pade nesore yaku. Bara visiamo hai bo narasa ntoto nikande i Laga poriapuku."

Tano i Umpamomi hii nompariara mpuumo nuapa niuli i Maleura. Visiamo pangane ri saeona nambelamo bagiana moriapuka bereina. I Male ante i Laga hau ri talua. I Umpa noriapumo ri banua. Nangongomo kandea nitaundana vai kura nu uta. Hii nompanaki apu, hii nompekirisi nuapa niuli i Male. Nikitana namalamo ranavu santana, niduanamo ntono hai. Nitora-torana vai jarita i Male ane ranavumo santana rapoporende ruru. Nasae sakide nikitana narendemo santa. Domo nompekiri...nokanavumo ia riara kura norende hai,...he nuapa jadina, karaka-raka tumpa riara nggura nu uta.

Ledo ntoto nasae, nakavamo bereina ante maruena i Maleura. Pade i Maleura hii muni, aga kakavana ri banua hau vai mandiu ri karona. Domo ria sesana apa nisanina i Umpamomi mompakande bereina.

Visiamo i Lagauntu hii kapea-peamo rapakande i Umpamomi. Domo nitahana ara ntaina. Neangga ia hau nanggita bereina. Nikitana ri paturua, ri avu, ledo ria nikavana. Ledo muni nisani bara hau ri umba. Nanau ri tana nipekutana nte sinjori, ledo muni nikitana.

Kaupuna nikeni nu rau ante ara ntai, nompari-mpari nompene ri banua napola ri avu. Nakava ri avu niala pingga, nisondu kandea. Niala banga niungga kura nu uta. Madai katekaja i Lagauntu,...nadungga ntumbale ia ri bivi nu avu. Nasae sakide ledo nanoto rarana. Kanoto nu rarana, domo ria ara ntaina. Madai pantorana bereina i Umpamomi namatemo hai. Nompamulamo hai i Lagauntu hii domo ria dotana nangande. Mau nikuyapa nu bereina i Maleura nanguli mangande, ledo ntotomo nadota ia. Aga nialana pompou tai nu bereina i Umpamomi, nipoukana taina. Ane maaramo taina nitedemakana vai pompou taina hai. Aga haimo itu panggaviana saeo-saeo.

Kaupuna tai i Laga nambaso pangane, kasae-sae katio-tiomo. Sampe nantia ntotomo eva tai nu laga nikitata visii.

Hiimo hii cilakana anu niuli nu Madika ri ngata Binggelada saeo hia ledo niosekana. Haimo hai sabana tai nu laga sii-sii nikitata natio.

UMANTENDE²

² UMANTENDE dikarang oleh Lahmudin Yoto, Palu

Naria saito langgai dako ri salapina nakava tumai ri lembana madota mantarima pangisani (meguru kakaba). Nakava ri sangatana, kalebarana sanga nu ngata nikalauna hai Tanggiso. Ri Tanggiso hie naria sangu sou mpobalu sangkara nikasiromu ntodea nokuvava, nompalera rara, nompasau lenge naupu nantui povia nantamo. Ri sou mpobalu sangkara, ante kopi, bo tehmo hie, nipesai ntosalapina ipangane. Ivetu nakava ri sinjori nu sou hai nidekeina tabe ka tona nadea hai, "Tabe, mba komiu torilembana? Mamala yaku mekutana?"

Nesana tona ri sou mpobalu sangkara, "Mamala! Nuapa mupekutana itu?"

"Ri umba tona namala nipeguruka kakaba ri ngata hie?"

Bo tona nadea ri sou mpobalu sangkara hai topongei pura, nituduakara banua i Lajurei. Ri ngata hie nisan pura ntona i Lajurei hai topokuvava. Leria saeyo le nongei, leria poviana ntanina bo ledo muni naria pangisanina. Banua i Lajurei nantaniaka nakavao sakide ante banua ntodea, nangepe pesana ntona ri sou mpobalu sangkara hai, tosalapina ipangane nosukuru ntoto bo notarima kasi, pade negoli hau ri banua Lajurei. Veitu nakava ringayo nu tangga banua Lajurei i Umantende tosalapina hai nongare nompadekei tabe, bo nekutana tupu banua, "Mba komiu? Naria tupubanua?"

I Lajurei riara banua natekaja nangepe suara ntorata hai, rara ntaina nanguli, "Eva torata baru hii, dako hie niepeku suara ivesia." Tapi ia neanga muni dako ri ponturona, bo nesana, "Naria! Isema ritu ri tana? Nakava ante nia belo atau nia daa? Ane ante nia daa nee macapa mpajeje ngisi ntanggaku! Ane ante nia belo kamai tumai kutomunaka ante anu belo muni, bo ante sana nu rara."

Tosalapina nosangaka i Umantende hai nesana nanguli sangana, "Yaku Umantende, tumai mantunggai komiu ante nia belo."

Dako ri ngayo nu vamba nipeinta Lajurei Umantende hie mamala rapongeika. Nipokiona nompene, "Kamai tumai pompene tumai."

Umantende ante damba nu rarana nitarima i Lajurei nompari-mpari nompene, nakava riara banua nipoponturo bo nipekutana Lajurei, "Berimba kareba? Nuapa nia belo nikavamuka tumai damo nakavao dako ri salapina nangose dala ntua ntende sampe nakava rilembana hie?"

Nesana Umantende, "Kareba belo! IVEI, yaku hie bo tumai ri lembana merapi tulungi ante komiu. Ri ngataku hamai, nagado tona nosimpagoka kadera nu magau, apa magau kami namatemo. Jadi nadea tona madota nonturo ri kadera nu magau. Magau kami hai le naria sampesuvuna, le naria anana, jadi isema mabia nosibaga mosimpagoka kanturoa nu magau, bo ledo radagi-dagi bo nakaba, iamo majadi magau. Hai sabana bo yaku nakava tumai ri lembana hie, madota meguru pangisani ka kaba. Nipekutanaku ante todea ri sou mpobalu sangkara hamai, nituduakara ka yaku banuamui hie. Jadi merapi tulungi ntoto ranga yaku ante komiu, pagurumi yaku ala mamala yaku mosibaga ledo radagi-dagi, ala mamala yaku majadi magau ri ngataku, mau nuapa sambuluna kuturusi pura."

Nesana i Lajurei, "Oooh itu tano sabana bo iko nakava tumai. Ane aga itu anu ledo napari, ledo ntoto nakujere, kupaguru ntoto i Umantende ala mamala mosibaga le radagi-dagi, ala makaba ala mamala majadi magau ri ngatana mboto. Ledo muni naria nompake sambulu, aga anu neemo mukalingasi, pakabelo pantoramu, neemo ntoto mokedo raramu maeka mau sakide, apa ane mokedomo raramu maeka, ri situmo tempona iko radagi. Uli sanga nu Tupu riara ntaimu, ALLAH. Neemo mukabasaka, itumo pangisani mbaso. Maile bobaya kita mosintomu ri ambe mpuna nu lengaru. Kutambai bo kucoba bara majadi bara ledo. Ngena hie pangosarakamo ruru,

pakasana paturumu bongi, maile bobaya dopa meonga eo mosingga vamo kita hamai, ledo mamala mosingga hilau."

I Umantende nangepe nuapa niuli i Lajurei, nipariarana ntoto. Nangosaraka ia belo-belo, nipakanyamana paturuna bongina hai ala mamala ia memata bobayana dopa meonga eo. I Lajurei bongina hai nipasadiana mamimo pato rabobakana i Umantende mompacoba pangisani nidekeina aga ante ngei-ngei hai bara najadi bara ledo. Geira randua mboi naturumo. Nakavamo watuna bobayana, i Umantende nembangummo nirasaina nabobaya, iamo hii nipakasanana rarana nitorana mpanjili pura nuapa niulika i Lajurei ka ia, pade nolipa ia hilau ri ambe mpuna nu lengaru mbaso anu le nakavao dako ri banua i Lajurei.

I Lajurei nembangu munimo. Niepena i Umantende hilaumo ri puna nu lengaru, nialana pato nipasadiana ribongi bo nituntumakana i Umantende hau ri puna nu langaru. Nakava hamai i Lajurei nongare nompokio i Umantande, "Mba iko, Umantende?"

I Umantende nangepe sangana nipokio i Lajurei, nesana, "Hii yaku... kamai ri sii!" I Lajurei netudu.

Umantende narapa hau ante i Lajurei, nirasai i Lajurei Umantende narapamo ante ia nipo simpovayakana anu niulina ka Umantende riavi eona, "Pakabelo pantora! Neemo ntoto mokedo raramu maeka mau sakide, apa ane mokedomo raramu ri situmo tempona iko radagi. Uli sanga nu Tupu rara ntaimu, Allah. Neemo mukabasaka. Itumo pangisani mbaso, sinina olo-kolo anu nipajadina pura. Natundu pura ante parentana. Jaga! Pasadia! Kucoba! Neemo mekakai. Ane madua, tamalaka."

Nianggataka i Lajurei pato nikenina hai nibobakana puna ntundu i Umantende, damo nopogu bo noguntu i Umantende nosumboli, niepe ntoto suara i Umantende, "No...uuuh...nantamalaka duana bo nembangu."

I Lajurei nanggita i Umantende nembangu nanguli, "Tora bo tamalaka."

Nikabasakanan vai poboba ri tanga bengo i Umantende, damo noguntu vai i Umantende nadungga, nasimbayu muni ante kadunggana pamulana suara i Umantende, "No...uuuh...nantamalaka duana bo nembangu."

Nitudu vai ia, "Mantora bo mantamalaka."

Katalu-nggani kana nibasaka i Lajurei vai poboba ri kuntu i Umantende. Damo nopogu vai pato netuu ri kuntu i Umantende. Peboba katalu-ngganikana hie, nirasai i Lajurei ntoto patona eva nanjudu kava ri buku nu mui i Umantende. Kadunggana katalungganikana muni hie i Umantende domo neangga, domo muni nosuara tapi da nokainggu. Bo niulika i Lajurei, "Itumo pangisani mbaso pobaku manjili ri ngatamu."

Naupu nanguli jarita hai, i Lajurei negolimo nanjili hau ri banuana. Rara ntaina nanguli, "Itu bagiamu. Yaku le nisaniku nuapa tumai mupeguruka." Nakava ri banua ia naturu domo nipadulina i Umantende.

I Umantende hamai ri ambe nu lengaru nopasimbuku neangga, eo neberemo. Manu notingganavumo, tonji nomonimo. Pantora i Umantende le nalipo nuapa niuli i Lajurei ka ia. Nanoto ntoto riara ntaina bo ri untona. Damo nipaenjenja dala niosena nanjili hau ri salapina. Kaupuna nakava muni ia ri ngatana, valea mpoboba i Lajurei domo nirasaina, peanggana nabelomo, nirasaina nesua mpuumo pangisani nidekei i Lajurei ka ia. Ri banua nitesakana ka bereina, berimba kandasana watuna ia nantarima pangisani dako ante i Lajurei. "Talunggani mami yaku nadungga ntuobo nambela pato mpocoba i Lajurei, tapi nitulungi Ntupu pangisani nidekei i Lajurei najadi mpuu. Veitu petevai i Lajurei kaupuna niepeku, eva domo nirasai ku nuapa. Nipasimbukku nembangu bo nipaenjenku dala nolipa nanjili sampe nakava risie."

Nangepe jarita i Umantende hai bereina nadambamo, rara ntaina nanguli, "Mamalamo i Umantende rasavu mosimpagoka kadera nu Magau." Bo nitesakana kareba ri ngata salapina hai, ka i Umantende. Nadeamo tona namate, nisavu nosimpagoka kadera nu Magau.

Nangepe hai i Umantende nekutana ante bereina, "Jadi naupumo posisavu nosimpagoka kadera nu Magau hai?"

Niuli bereina, "Dopa. Saeyopa. Maile damo i Tapuntina saitonanaboli. Ane maile ledo maria tonarasadavuna ante ia, bagianamo kadera nu Magau."

Nesana Umantende, "Ane iveitu tano yakumo majadi bali Tapuntina maile. Tinti sakuya posisavu mompamula?"

Niuli bereina, "Tinti sasio!"

Kamailekana ri tana narava bo naluo, pangulita ri sii tanalapa, nikasiromu ntona nantara tona rasavu mosimpagoka kadera nu magau. Naroamo todea nakava, i Tapuntina nariamo ri tatanga nu tanalapa nasadiamo nompopea balina. Todea ri bivi nu tanalapa mboi nosipekutana isema vai bali i Tapuntina ngena hie..? Apa ane pantorara eva domo ria Toma Langgai nabelo, naupu puramo nidagi i Tapuntina. Tapi naria saito nanguli, "Niepeku i Umantende nakavamo dako ri lembana neguru pangisani kakaba. Ngena hie vei, ia tumai mangeva i Tapuntina."

Todea ntanina natikaja nangepe jarita niuli nu roana hai bo nepekutana, "Nakana mpuu itu..? Nee mongei-ngei!"

Nesana ia nanguli, "Kareba hai nakana, ledo yaku nongei..!"

Da naase-ase geira, nosipekutana, neongamo i Umantende ri sinjorira ante tarina nasadiamo rasavu bo nepekutana, "Ri umba dala mesua hau riara nu tanalapa..?"

Todea ri bivi nu tanalapa nesana nantuduaka dala, "Hamai."

I Umantende veitu nangisani dala mesua hau ri tatanga nu tanalapa. Netaa sampalai nompakasana rarana bo nompakabelo pantorana, pade nolipa nesua hau ri tanalapa. I Tapuntina ri tatanga nu tanalapa nasadiamo ante Pada ri palena. Nanggita i Umantende nesua aga nopale boa nongiri bo nanguli, "Hiimo tano baliku ri eo kaupuna hii, ngana da riavi le nisanina nuapa, nasiate munimo meevo. Kamai tumai iko, kupandasa risie, ala musani berimba Padaku nompatesi tona natuari eva iko itu."

Nangepe jarita i Tapuntina natakaboro hai, i Umantende ledo netaa, aga namaju nompakarapa hau ri ngayo i Tapuntina. Naara pangane hia i Tapuntina natambai kabilisina nanggita i Umantende ledo naeka aga narapa ri ngayona, bo sampesanika nitoya i Tapuntinamo Pada. Nisoekana i Umantende narapa ri ngayona hai, bara limanggani nijojonanompasoe karo i Umantende, tapi i Umantende le nakuya-kuya. Nisoena vai ri kada i Umantende, ri timpu, ri kope, ri bambara, ri pale, ri tambolo, ri tambuke, kana le nabaka mau sakide i Umantende. Nabutomo karo i Umantende nisoena, nitosuna, nitimbena, dako ri ngayo, dako ri bengo, dako ri sabingga njidi, dako ri sabingga nggana, dako ri ambena, dako ri bavona, kana ledo nakuya-kuya i Umantende.

Kaupuna i Tapuntina nalenge mbotomo nompagoso i Umantende, damo kangasa-ngasa domo nipakulena nokainggu, damo nagampa i Umantende nangala Pada ri pale i Tapuntina bo nitimbekana tambolo i Tapuntina. Aga sanggani nitimbena, kapoa-pola nogaa balengga dako ri karo i Tapuntina. Ri siamo katekaja ntodea pura-pura ri bivi nu tanalapa nanggita balengga i Tapuntina natetimparaka bo nokaduli-duli. Norate pura tona nanggita, bo nanguli, "Nadeamo

Toma Langgai nangeva i Tapuntina, dopa ria pabeta saitoa, damo i Umantende hie pabeta nompadagi i Tapuntina. Natantu mpuu najadi pangisani i Umantende."

I Umantende nanggita bata i Tapuntina domo nokainggu, nongare ia nompokio todea, "Heee kamai! Aliakamiu bata i Tapuntina. Kaeka lovu bo tana."

Nangepe jarita i Umantende hai, alima tona nokakendo hau ri tatanga nu tanalapa, ampa noanggataka karona, saito noanggataka balenggana anu nogamo dako ante karona pangane. I Tapuntina nitanamo, i Umatende da neanggapa ri tatanga nu tanalapa nompopea balina, bara mariapa tona mangeva ia. Sampe nanggovia i Umantende neangga hamai, domo naria tona nesua ri tatanga nu tanalapa nangeva ia. Todea sampe nanggovia muni ri bivi nu tanalapa nantongoraka bali i Umantende, kana domo naria. Kaupuna todea nasintuvwu bo nesua pura hau ri tatanga nu tanalapa bo nongare pura i Umantende rapajadita magauu bo nianggatakara i Umandende nikenira nogulili riara ngata. Naara pangane hia nakava ri ngayo nu banua i Umantende netaa geira. Nituura i Umantende hamai bo nongare pura vai geira, "Hiimo magau kami! Magauta pura ri ngata hie."

I Umantende neangga ri tatanga ntodea nompaanggataka ia ri ngayo nu banuana hai, nondodo ia sampalai bo nojarita, "Mba komiu todeaku pura anu nasintuvu nompaanggataka yaku najadi magau. Pondodo pura ruru sampalai, epe yaku mojarita. Kamai kita manjili puramo hau ri banuata mboto mangosaraka mompasau lengeta saeo bujuru neangga ri tanalapa nompopea tona nisavu, isema makana majadi magau. Bo nasintuvumo komiu nompaanggataka yaku najadi magau, kuperapi ante komiu, todeaku, panjili puramo ruru. Da nadeapa povia ratingayota maile, maihua, bo eo-eo makava tumai, mompakabelo ngatata hie." Nangepe jarita i Umantende hai, todea noundu pura bo nagaro sanggani mboi nanjili ri banua mboto pura.

Berei i Umantende nadamba ntoto nantomunaka i Umantende. Nisaninamo bereina nianggataka ntodea najadi Magau, nikapuina i Umantende pakatede-tede. Naupu hai, niulikana i Umantende, "Pakabelo mompagajai todea nompaanggataka kita. Neemo rapakasusa todea nompaanggataka kita. Neemo rapakabaka rara todea, turusi nuapa rapokonora. Neemo povia anu naporayu todea neanggataka. Pakeni todea mantui povia belo. Tuduaka ka todea dala nakana, ala mamasahoro ngatata rasani nto sangatana."

I Umantende nangepe jarita niuli nu bereina hai, noundu bo nesana ia, "Kupariara ntaika anu niulimu itu."

Saeo, rua-eo, talu-eo, saminggu, rua-minggu, talu-minggu, sambula, rua-mbula, talu-mbula naliu. Le nirasi, sampaemo i Umantende najadi Magau nanggeni todeana. Ngata nabelomo, todea nasanamo, povia todea nabelo pura. Pae najadi, kaluku nabelo poviana, dale nituda ntodea nabelo muni haselena. Sinina tuda-tuda ntodea nabelo pura poviana.

Naria saeo i Umantende nonturo-nturo ri ngayo nu banuana, bara berimba sampsanika nitorana i Lajurei ri lembana. Pombarasaina eva dopa nagana kamagauna ane dopa rabalasina pombadekei i Lajurei ka ia. Eva nirasaina indana ante i Lajurei. Haimo hai sabana sampe ia nojanji riara ntai, "Kana kubalasi kabelo i Lajurei."

Kamailekana nipasiromuna todeana. Niulikana berimbana sabana bo ia namala nompadagi i Tapuntina. "Itumo komiu todeaku pura, kuuli ka komiu, yaku hie naria indaku hamai ri lembana ante tona nosangaka i Lajurei. Iamo hai nompaguru yaku bo namala nompadagi i Tapuntina, sampe yaku nianggatakamu najadi magau. Jadi kuperapi ante komiu, todeaku, rasulembuta mpasanggani mombabalasi belo i Lajurei ante yaku hai. Berimba nasituju komiu?"

Todea nesana, "Nasituju!!!!"

Nipapola i Umantende jaritana, "Ane ivetu, maile rapasiromuta anu rakenita ka i Lajurei. Isema naria paena manggeni pae, isema naria dalena manggeni dale, isema naria kalukuna manggeni

kaluku, isema naria cangkorena manggeni cangkore, isema naria tambuena mangeni tambue, isema naria kasubina mangeni kasubi, isema naria tomolokuna manggeni tomoloku, isema naria gampayana manggeni gampaya, isema naria lokana manggeni loka, isema naria ganagana manggeni ganaga, isema naria manuna manggeni manu, isema naria intalu nu manuna manggeni intalu, isema naria tovauna manggeni tovau, isema naria bimbana manggeni bimba. Aga domo japi ante bengga, apa itu rapake mombakaraja tana popae bo pavia ntanina. Jadi maile bobaya masiromu pura kita ri bantaya ante anu rakenita ka i Lajurei ri lembana. Dako hamai kita mobarangka, dopa meonga eo."

Naupu nojarita ante toteana hai, i Umantende nanjili hau ri banuana. Niulikana bereina, "Maile kita hau ri lembana manggeni toteata ante panggenina mboto pura mboi sakide, rabalasikata belo i Lajurei ante yaku."

Kamailena, da bobayana nobbarangkamo i Umantende ante toteana bo ante panggenina mboto pura, anu nitevai i Umantende rakenika i Lajurei. Naroa ntoto geira nobaresi hilau ri lembana. I Umantende ante bereina niapi nu tadulakona rinjidi ngganana nolipa ri ngayo nokauluka dala.

Tinti sapulu sangu nakavamo geira ri lembana. Tona ri lembana natekaja nanggita i Umantende ante toteana noliu ri ngayo nu sou mpobalu sangkara napola hau ri banua i Lajurei. Nakava ri ngayo nu banua i Lajurei geira netaa. I Lajurei ri banuana da naturu. Sampesanika natekaja nangepe suara ntona nadea bo naroa ri ngayo nu banua. Nipakanotona rarana nitalingaina pakabelo suara ntona nadea hai, niepena eva naria suara i Umantende. Rara ntaina nanguli, "Masilakamo yaku! I Umantende nakava ante roana nadea, bara madota mebalasi dua nu rarana watu nicobaku nggaulu."

Niepena vai suara i Umantende nongare nompokio sangana, "Mba komiu, Lajurei? Tupu banua, hii yaku nakava ante toteaku."

Nicoba i Lajurei netadilo dako ri bolo nu rindi banuana, nipeintana i Umantende ante bereina niapi nu tadulakona ri njidi ngganana ante toteana nobaresi ri bengona. Nipakabia i Lajurei rarana. Nibukana vamba nu banuana. I Umantende veitu nanggita i Lajurei ri ngayo nu vamba, kapola-pola nokakendo hau ante i Lajurei eva bulu manu nitavuisi, bo nekase ia ri tangga. Eva le naupu ngisi ntangga nijejena, nakavamo ia ri ngayo i Lajurei. Nikapuina i Lajurei pakatede-tede. Niekina i Lajurei dako ri kalimpi kava kada, pade nantaputu ia. Napanga ia nantaputu pade neangga ia ri sabingga nggana i Lajurei bo nianggakana pale ngganana pakalanga-langa. Bereina, tadulakona, ante toteana aga nakasumara nanggita i Umantende. Nitangara i Umantende i Lajurei pade negoli nitanggarana toteana bo nojarita ia, "Itumo komiu toteaku, hiimo tona nosangaka i Lajurei niuliku ka komiu. Iamo hii nombadekei pangisani nipobakuku nanjili hau ri salapina bo namala yaku nangeva i Tapuntina bo pabeta, bo nianggatakamu yaku najadi Magau."

Todea nangepe jarita i Umantende noundu pura. I Lajurei ri sabingga aga nakasumara muni. Nipapola i Umantende jaritana, "Jadi sinina anu nikenita dako ri salapina itu. Keni mpompene pura tumai riara banua hie."

Todea, tadulako, berei i Umantende nangepe jarita i Umantende hai, nolipa hau bo nompene pura hilau riara banua i Lajurei ante anu nikenira. Veitu kaupu ntodea i Umantende nompene riara banua i Lajurei. Veitu muni kaombo nu banua i Lajurei, namate i Lajurei, namate i tadulako, namate pura totea, namate berei i Umantende, namate muni i Umantende.

TUTURANA ASALA NU KANDEA³

³ TUTURANA ASALA NU KANDEA dikarang oleh A. Panggagau, Toaya, Sindue

Naiya ngata Kaili hii pangisanita pura naluo mpuu ngena. Toponturona muni nompengaya basana. Naria Topoledo, Topotara, Topodaa, Topodoi, Topounde, Topo Torai. Nadeapa ngayana domo rauli pura. Visiamo tutura hii mombajaritani tutura ntokaili topobasa Torai. TopoTorai anu ratuturani hii, ponturoana ri bulu nu Sindue. Pura-pura tona ri Sindue nangisani tuturana. Visia mami, sabana ri Sindue najadi tuntu ntodea.

Panguli ntotua naiya Kagaua ante Magau pura ri ngata Kaili hii, dako ri bulu pura asalana. Ivisiamo tutura hii mombajaritani naria sangu ngata ri bulu nu Sindue. Sangana ngata Toposo.

Da dopa nosangaka Kagaua ri ngata hai, naria mamimo nidekei nu Tupu sangu tanda tuvu. Visiamo panguli nu tutura naria tanda tuvu sangu hai, Kakuasana Tupu sampesani natebare najadi pata-mbare.

- Sambare :najadi tona (mombie)
- Karua-mbarena :najadi seta.
- Katolu-mbarena :najadi karampuu.
- Kapata-mbarena :najadi viata.

Tona mombinemo hai panguli nu tuturana haimo simulajadi nu tona ri Toposo hai. Ia munimo niuli Tomanuru. Itumo sabana nuapa dotana ane niperapinamo nte Tupu, pura-pura sangi nadupa.

Niperapinamo ante Tupu, ia radekeika randua ana, saito langgai saito mombie. Ngana randuamo hii nomuli-nomuli, najadi nadeamo tona ri ngata Toposo hai.

Apa nadea gagamo tona ri ngata Toposo hai nianggatakamo saito tona anu niepe jaritana najadi Magau geira. Ngata Toposo pangane nibali munimo sangana najadi Kagaua Toposo Bulu Molanto. Magauna natopamo niuli Kagaua Toposo Bulu Molanto.

Visiamo nidagi nggasaena Kagaua Toposo hai kadea-deamo tonana. Naiya ngata ane tonana nadea gagamo, nadea munimo rapasadia kandeana. Momparia kande ntodeamo hai najadi vua mpekiri nu Magau hai. Nerapimo Magau ante Tupu ala radekeina dala berimba momparia kande magana rakande ntodeana. Nariamo sambongi nangipi Magau.

Nariamo panoto dako nte Tupu nangulika Magau, kana rasambalena saito anana rapajadi kande rakande ntodea. Ivisiamo Magau hii nombakavamo pecoba dako nte Tupu. Pecoba hii mpuu-mpuu Tupu madota mompeinta kava riumba katapa nu Magau.

Ivisiamo pecoba nTupu hii nitarima nasana nu Magau. Ledo naria susa nu rarana. Panoto hii kana rapopasanikana ka bereina ante ana-anana.

Nipasiromunamo anana papitu ante bereina. Nangulimo Magau: "Nipasiromuku komiu pura, naria anu kuulika ka komiu. Visii-sii yaku nompekirika tona ri Kagaua hii nadea gagamo. Berimbamo momparia kande rakande ntodea ri Kagaua hii?"

Naupu nanguli jarita hai, Magau nondodo vai sampalai. Pade nipapolana vai jaritana: "Naiya susa sesaku hii, yaku nidekeika nTupu ante nianggatka ntodea najadi Magau ri ngata Toposo hii momiasiayu toteana. Berimbamo ngena ane tonana kasae-sae kantambai-mbaimo deana !"

Nondodo ruru ia pade niulina vai: "Itumo nipasiromuku komiu mombajaritani talu ngaya:

- Sangaya :Kaara ntodea.
- Karua-ngayana :Momparia kande ntodea.
- Katalu-ngayana :Yaku nidekei nTupu panoto.

Anu katataluna hai najadi puna nu jaritana. Niulinamo ka bereina ante ana-anana: "Nuapa batuana panoto nidekei nTupu hai?"

Bereina ante anana ledo ria notingo saitoi. Visiamo tomana nekutanamo saito-saito anana. Nipamulanamo nekutana dako ri anana lumbua, niulinamo: "Madota rasambale rapajadi kande rakande ntodea ri Kagaua Toposo Bulu Molanto hii?" Anana lumbua hai ledo nadota.

Nipekutanana vai anana kaaonona, ledo muni nadota. Pade nilinjana ri anana katataluna, kaalimana, kaampana, ledo ria saitoi nadota. Saitopa naboli dopa nipekutana ntomana, ana karanduana. Ri sii tomana nondodo ruru, apa aonomo nipekutanana ledo ria saitoi nadota.

Nanggita tomana nondodo hai, anana aono anu naupumo nipekutana pangane nasesa puramo rarana. Nihekirinamo geira belaka tomana mangalamo dotana ngena. Ane sampsuvuna saitopa hai ledo muni madota, kita pura hii domo rapelisina.

Domo ria saitoi nojarita, nondodo puramo. Mau podau manavu domo raepe. Tinana damo uve matana notiti. Tangina damo nisuarakana riara ntaina. Bara visiamo niulika eva potumangi nu bengga. Nasae sakide geira nondodo pura.

Nasae sakide, riara geira nondodo hai sampsansi nojaritamo anana karanduana hai, niulinamo:

"Tomaku nipakaogeku,...tinaku nipokonoku ntoto,... ante tuei tuakaku nipotoveku,...kudekeikamo karoku,...nyawaku,...ante nuapapa rapodotamiu nte yaku, ana oteamiu hii, toma tinaku. ...Yaku madota ntotomo rasambalemu...rapajadi kande,...mompapola tuvu majadi kande rakande ntodea...ri Kagaua Toposo Bulu Molanto hii."

Naupu nojarita hai nondodo vai ruru. Eva nidundusi nu uve rara ntomana ivisia niepena mai kadota nu anana rapajadi kande nu toteana. Sampalai aga nondodo, nanguli vai ia:

"Toma toveaku,...tumo masesa komiu,... yakumo anamiu mombasoretaka komiu dako ri ntamo mpekirimi. Panoto dako nte Tupu, ivisia kantamona. Kuperapi doa nte Tupu,...ala radekeina maloga,...marava ante mareme dalamiu,...manggeni toteamiu,...ri Kagaua Toposo Bulu Molanto hii!"

Geira nangepe jarita hai naondo puramo rara geira ante naasi puramo mata geira. Damo tomana ledo nabali ingguna, aga nompekirika anana hii mpuu-mpuu ana dunia ahera. Nangulimo rarana, "Bara hiimo hii niulika ngana patuju ntotua; ngana masalama aherana."

Naupu ngana hai nojaritaka tomana, nipegolina vai tinana. Pade nipasinjorina tinana bo naturu ri timpu ntinana. Niulinamo jaritana nangulika tinana: "Perapikamu doa yaku, nina,...ampungimiu yaku, nina,...halalakamiu...uve njusumiuk nikandeku, nina!" Nondodo vai sampalai pade nipapolana jaritana:

"Madai-dai kandasamiu, nina, nanggeni yaku,...sasio mbulana labi riara ntaimiu, nina...pade nipakambasomiu yaku. Nina.....ampungimiu ntoto yaku, nina. Neemo berimba-rimba komiu ane domo ria yaku, nina. Panggaupunamo perapiku nte komiu, nina,...ekimiuk yaku, nina!"

Madai kaondona rara ntinana, nianggatakanan balenga nu anana bo nikapui ntedena...pade nieki rorina nte tangina. Domo nitahana ondonu rarana ante asi nu matana nanggita anana domo masae mompalaikamo geira pura. Domo ria nitamaka geira tangira, notumangi puramo sambanua. Damo tomana ledo notumangi, tanda katapana nte Tupu. Nasae sakide geira notumangi hai pade nipopondodo ntomana.

Bara aga sakuya eona, Magau Toposo pangane nompasiromumo toteana. Niulikanamo ka toteana isi kasiromu hai. Madai katekaja pura ntodea nangepe mai Magau geira mompatesi saito anana rapajadi kande. Pade rakande ntona ri Kagaua Toposo Bulu Molanto hai satutumparano. Ledo ria saitoi tona bo ledo nanguli Magau geira, madai-dai pantorana ka

todeana. Mau damo berimba kakajana dala,...mau damo rapatesikana anana, ane mompakabelo todea,...kana rakaviana. Domo ria pompakulea ntona eva pompakulea nu Magau geira.

Naupu nopakiluka todea, nipokionamo vai anana meangga ri sinjorina, pade nituduna mojarita. Nangulimo tomana: "E anaku...pojarita sakide iko,...jarita kaupunamo...ante jarita popalakanamu nte tonu ri Kagaua Toposo hii!"

Nojaritamo ngana hai, niulinamo: "E,...komiu todea pura,...eo hii kita mosimpogaamo. Perapikamiu doa yaku masalama. Komiu pura mabolimo...yaku,...ngena hii malaumol!...Damo mosinggava kita...ane mariamo yaku ri karomiu pura."

Aga naupu nojarita, haumo ia ri anu nipasadia mamimo ntomana raposambaleka ia. Ledo ria napari-pari mai nikita ntodea. Aga kakavana hamai kaliu nggaturumo noluna bata. Ane todea nomporo mata puramo.

Ledo nasae...nakavamo tomana ante taono ntada. Nangulimo tomana "Rapou matamu ana." Nanguli anana: "Tuumo rapou matakku,...tomaku! Dekeimiu yaku...manggita raaku sampalai rasabiki ntodea."

Visia nakavamo sana nu rara ntomana, nikenggenisinamo balengga nu anana hai,...nidikanamo taonona ri tambolo nu anana....pade niganena. Nasae sakide tomana nogane.

Aga kaupuna gane.....nikoyonamo tambolo nu anana hai. Ledo naria nabia mata ntona nanggitana. Pade ngena nisambale hii ledo ntoto sakidei nekakai.Sampalai aga domo ria nyawana.

Aga kakabasakana nyawa nu ngana hii, nitampa-tampa vai ntomana sampe naoya nte buku-bukuna. Isi ante buku naoyamo pangane, nigelona vai nu tana ante bone ante nuapapa naria ri sinjorina. Najadimo bulu kodi anu nipasigalo pangane.

Naiya anu nobulomo hai nigane-gane vai nu Magau. Naupu niganena pade nialana sanggaku-sanggaku nitadeakana ri pasu pata-mpasu. Nadea ngganina visia pade nitudukana todea mangala sanggaku-sanggaku bo rakamburaka ri karavana. Naluo ntotomo kakava nu tana nikamburaka ntodea pangane. Visiamo nikavia geira sampe naupu anu nobulu kodi pangane.

Mpuu-mpuu perapi doa nu Magau hii nitarima ntoto nu Tupu. Ledo ntoto nasae, sampesani kakuasa Tupu, natuvumo tuda-tuda mpengaya riumba nikaria nu raa, isi ante buku ana nisambalena pangane.

Tuda-tuda hai nariamo: -Bailo

- Dale
- Pae pulu
- Tuda-tuda noisi ri tana
- Nompengaya vua nikande

Tuda-tuda pangane kasae-sae kambaso-mbasomo ante domo nisani kadeana ante nalanga puramo. Pade ledo ntoto nasae novua puramo. Madai kadambana todea, hau puramo nangulika Magau.

Nangulimo Magau: "Naupa mpasanganimo kita pura. Naiya kandea nakava hii, ledo dotaku bo ledo muni dotamiu pura. Hiimo niulika kambasona ante kakuasaNa Tupu, ledo ria pagangkana."

Ivisiamo pangane Kagaua Toposo Bulu Molanto hai domo ria naara todeana. Magau nipokono bo nipotove ntodea ntoto .

Hiimo pagangkana tutura asala nu kandea ri tana Kaili hii, nipotuturaka topobasa Torai ri Sindue.

ASU NTE TAVEVE⁴

Ri tempo nggaulu pura-pura binata da novega. Naria saeo ira nasiromu nibalenggai nu singa. Riara nu kasiromura haitu, pura-pura binata ntanina nakava puramo, damo unta dopa nakava. Nangulimo Singa ka Asu, "Koi tomunaka vei Unta, Asu!"

Nanguli Asu, "Dopa nisaniku lenje Unta ngena hii, Pua."

Nanguli Singa, "Unta ledo nasimbayu ante binata ntanina. Ia nombukotu bengona."

Nangepe jarita Singa, domo nompekiri pakandoe Asu. Kaliu-liu nangowa hau mombatomunaka Unta.

Nakava ri tatanga dala, Asu nosintomu ante Taveve. Nanguli Asu, "Hee, roa. Damo komiu nipopea-pea."

Domo nompekiri pakandoe, Asu ante Taveve nangova hau ri kasiromura pangane. Nakava hamai nangulimo Asu, "Siimo Unta, Pua."

Aga nesana Singa ka Asu, "Binata nikenimu tutu ledo unta, aga taveve."

Nangepe pesana nu singa, nongiri puramo binata ntanina ka Asu. Nanggita binata ntanina nongiri puramo ka ia, nipeintanamo taveve pakabelo-belo bo nangulimo ia ka Taveve, "Hee, Taveve, nepotodoyo tano komiu."

Nesana Taveve, "Ledo yaku nepotodoyo, aga komiu nangunaka yaku tumai."

Nangepe pesana nu Taveve vesia, niraganamo Taveve. Tapi Taveve nompene hau ri lolo kayu. Nanggitapa Taveve nompene ri lolo kayu nangulimo Asu ka Taveve, "Hee Taveve, mantepuu eona hitu sampe kasae-saena yaku ante komiu ante muni muliku ante mulimu muni mosimpobalimo."

Haitumo saba Asu ante Taveve nosibali sampe hitu-hitu.

TESA TUTURA RANDUA TOPOASU⁵

Jombi bo Tumpaka tona ntali tuei nitudu madika moasu nanggeni kanjai bulava. Haumo ira randua rarakayu. Kasavi nu eo, neragamo asura nasae mpuu, neraga nombalenge pade namala. Namatepa bavu tuama mbaso nikovaramo randua bo novia bambaru rapaturura bongina haitu ante motapa bau nipouliira pangane.

Naeo mpadondo hau vai i Jombi nanjua rarakayu nanggeni asu. Tueina naboli ri bambaru nompakabai bau ri tapala bo nantongoraka tuakana. Ledopa sakuya kasaena, kira-kira sungge toromo eo, naria niepena suara ntona dako ri kakavaona eva aga limbayona nerengge ivei: "HE HE HE HEEE!! Kukande bau! Kukande ante topotapa bauu!!" Bo nitalingaina belo-belo peonga suara ntona pangane, bara dako ri umba asalana. Bara sakuya nggani niepena suara haitu, aga ivesiamo. Kasae-sae kapara-parra. Nesua mpuu ekana. Niparoona rarana ledo namala, nalai ia netabuni ri soso nu bambarura netalendu ri kavunina.

⁴ ASU NTE TAVEVE dikarang oleh Edwin Palintorue, Maranata

⁵ TESA TUTURA RANDUA TOPOASU dikarang oleh Lewi Lamanusu, Rejeki

Nitadilona mpaliole-ole ala rikitana bara berimba lenje ntona nerengge pangane. Nipeintana mai, "HU!! Bo nasodo kambaso ntona haitu. Haitu mamimo LONGGA. Hai? Ane ledo yaku nalai pangane ri bambaru, natantu nikandesinamo. Peinta vei bau ri tapala nikandena niurupina santosu sanganga. Epe kirona buku nilopona. Neili tumai nipeintaku ngisina eva baliu. Aga ledo nikitana yaku saba nalendu. Kabosuna eva tumba nu vanau, bengona eva kalea kapekana, damo nasovu hamai nonturo netubengosi.

Dako ivesia napanga sakide neongamo i Jombi nekutana, "Ri umba puramo bau ri sii? Domo ria sakidea naboli. Tantu nikandesimu puramo."

Nesana i Tumpaka, "Ledo nikandesiku. Naria bara nuapa neonga pangane, tona mbaso." Eva tesa ri bavona nipasimbayuka ntueina ka ia. "Peinta itu pangandena."

"Ledo nakana! Davamu! Peinta, ane yaku ri sii pangane nibunukumo. Nabayasa tano iko! Nalenda! Nabanggu! Nebangga taimu!"

Nesana ia, "Ane ivetu tano, iko maile maboli ri bambaru. Yaku hilau manjua rarakayu manggeni asu."

"Iyo! Ivetumo, ya!"

Kaeona, ri eo katalu-eonamo, tuakanamo naboli ri bambaru. Ivesia nonturo nasana-sana niulina, "Nakana mpuu tano niuli ntueiku." Nariamo suara niepena da nakavao eva nitesa ka ia. Tapi ia nasadiamo netabuni ante kanjai bulava. Nipeintana mai, ia mpuumo haitu nonturo ri avu netubengosi. Nitinanakina mpaliole-ole sampe napara, bo nibununa. Damo noridi nontinda kanjai ri bengona nikenina nangova hilau nalai.

Ledo nasaе kaliutakana pombabununa haitu, neongamo i Tumpaka nesombalaka, "Berimba kareba?"

"Nee, le! Nakana mpuu niulimu. Naria mpuu neonga tapi nibunukumo hau nipalisakanamo kanjai."

Jadi, nondodo ruru ira sampalai notesa nompakaliangu bo nompakasana pekiri. "Ivei, le. Rapovempaneka ruru asu bo rapakande pakabosu taina ala neemo malai, raboli ri bambaru. Hilau ratututa dalana, apa ane malipo kanjai madika, masala kita." Nitutura mai valeana, eva tava ntea kapekana. Bata ri dala nisepana nokaduli. Lauro ri dala narantasi nirumpana. Pitujalu salu nivotera, pitu-oru oru nigolira nombatatu valea pangane, nanggava bolo bo nokanavu hilau. Nangelo akala ira, berimba sampe namala mantuntuni dala ntona nibunura pangane hilau nokanavumo ra bolo.

Nialara sambesa lauro langguku ndate, bo nitatakara tampana ri kayu niulura hau ra bolo rapanaura hilau. Haumo ira notoya lauro nanau natudu ri lolo mpangana, bo novuluso ri batana nasompo ri tana. Nokangali ira nosimpekutana, "Ngata ri umba tano nipeongata?"

Nipeintara tona dea ra ngata, mombine-mombine damo norore noluda pae, pade hilau nitotoakara bo nipekutanara, "Mokuya tano komiu nombayu nadea gaga?"

Nesanamo mombine, "O, kami hii mosusa sangata, susa ntamo rapovia."

"Posusa nuapa tano?"

"Poloso madika nadua ntamo."

"Ri umba tano madika?"

"Riara banua hitu."

"Mamala hilau rapeinta kami?"

"O, ledo mamala hilau rapeintamiu."

Jadi ira randua mai, ledo nepangala nitagi. Saito naboli ri tana, saito kana hilau nompene ra banua naupa nitagi. Nipeintana mai, "Sia mpuumo tomadua. Haitumo tona mbaso nibunuku! Inta vei kanjai dopa nabitu ri bengona. Aga naturu ntuobo bo nabelo."

Nitampaduna bengo nombabituaka kanjai, nikeni notingganavu. Nelumara bo nekakai matemo madika nangintimaka duana. Jadi ira randua pangane kapola-pola nangova nompalaisaka kanjai nompari-mpari nompene ri bata mpangana. Eva nisuka ira nendaimo ri lauro, napudumo puna mpangana nikimbari ntona. Napolamo ira nompene ri lauro nesavi ri tampana potatakara pangane. Nipeintara, "Nakuya tano lauro hii nanini, eva marantasi?" Tano tandana kadea ntona neraga nompene muni ri lauro haitu. Nompeinta lauro mapudu-pudumo, nitampasira. Nanavu pura toperaga damo noneke natudu ramai. Nanjilimo ira hilau nantotoaka asura ri bambaru paturura.

Sanggaeo mpisina, nanggalivomo ira motinggulimo hilau mantotorou madika mombadekei kareba, eva nuapa niposinggavakara rarakayu.

Jadi sampe ri siimo kaupu tesa tutura RANDUA TOPOASU.

I NGGIBO NTE I YUKU⁶

Tesa hii povega i Nggibo nte i Yuku. Saeona geira randua hau nanjayo-njayo ri bivi nggarona. Nipeintara pangane hia ana nu loka nansampo ri bivi nggarona. Nesanamo i Yuku, "He, Nggibo! Kita vei raalata ana nu loka hia, agina ratudata."

Bo noiyomo pangane i Nggibo, nisumbuakaramo ana nu loka mbo sampuu mbo notuda mbotomo pangane hia.

Ri saeona i Nggibo hau nanjayo ri talua i Yuku. Nikavana i Yuku nomperava vayo nu lokana. Nekavedakamo i Nggibo, "He, Uku. Nuapa puramo nikare-kare njakamu eva domo ria pangosarakamu?"

Nesana i Yuku, "Peinta mbotomo vayo nu loka damo nagumbu kavokona."

I Nggibo, "Nagaya mpuu nu lokamu. Damo nagumbu tavana eva aga nariomo matakunanggitana."

I Yuku, "Ja lokamu ta berimba munimo katuvuna?"

I Nggibo, "E...lolo...lolo...kidi."

I Yuku, "Nabelo vai tano topatalua vesitu."

Ri saeona vai pangane hia, hau vai i Nggibo mbatotoaka i Yuku ri taluana. Nikavana i Yuku mbaperava-rava vayo nu loka, nekavedaka vai i Nggibo, "Halo, Uku. Bo nopusumo tano lokamu eva aga naveromo veuluku nanggitana."

Nesanamo i Yuku, "Ja lokamu Nggibo, berimbamo ta karebana?"

⁶ I NGGIBO NTE I YUKU dikarang oleh RAPIAH, Pevunu, Kec. Dolo

I Nggibo, "E...lolo...lolo...kidi."

I Yuku, "Berimba ta topotalua, mololo...lolo...kidi aga matuvu loka ane vesitu?"

Ri saeona vai pangane hia, nanjayo vai i Nggibo ri talua i Yuku apa nitaserena mbelaka matasamo ngena loka i Yuku. Eva nisuka vesia kakavana, nipeintana loka i Yuku narangguni puramo ri lolona. Ja i Yuku hii da nasesa rarana nantora loka natasa puramo. "Bo kita hii, le nakaso. Berimba vai mangalana?" Da vesia-sia neongamo i Nggibo tokaso. Navoe mpuu rara i Yuku nanggita i Nggibo neongamo pangane hia. Nositudumo ira, i Nggibo mompene, i Yuku mompasiromu pade raposikandera randua. Vesia kabotu njaritara.

Nompenemo pangane hia i Nggibo, bo damo nakako rarana, damo nakadiki ia nompene. Le nasae nasompomo ri lolona, aga ri umba rara, eva nitoli lana rarana, apa aga hiimo nitongo-tongorakana mbatatopo loka i Yuku matasa, apa lokana namate pudumo.

Nasae-sae pangane hia...eva aga napangamo topompene loka, eva le ria serena mbanavusaka loka. Netingoamo pangane hia i Yuku. Natekaja mpuu i Yuku mbapetingoa i Nggibo aga nomperasa nangande. Nongaremo ranga i Yuku, "He, ranga Nggibo! Navusaka kaku tumai ranga sanu loka itutu itu ha!"

Aga nuapa nipesanaka i Nggibo, "Lokanamo hii torasa-rasana." Naliu mpuu rara i Nggibo.

Nongare vai ranga i Yuku, "Mau aga kulinamo itu, ranga, munavusaka ka yaku tumai!"

Aga nuapa nipesanaka i Nggibo, "E...kuli-kulinamo hii torasa-rasana."

Bo nabuka ta rara i Nggibo, kasi ranga i Yuku novoeti tandokona, ja i Nggibo hii nomperasa njuumo ri lolona. Nigalisina pura vua nu loka i Yuku. Mau kulina nigamoyana pura. I doko deo! jombe ara! lou tai! sanda rara! vau rara!

Kapupuna pangane hia, i Yuku nte dua nu rarana hau nompasiromu avo rapoviaka tarampa rapantoka bata nu loka. Nasiromu pangane hia avo bo niombina nipovia tarampa bo nipantopantona ri bata nu loka bo nongaremo i Yuku pangane hia ka i Nggibo, "He, Nggibo! Pokavisoso ngena ane manau iko, hamo."

Noiyo munimo i Nggibo pangane hia, le nisanina nuapa batua mpetudu i Yuku, apa ia nabosumo taina.

Nokavisoso mpuumo pangane hia i Nggibo nanau, apa ia nte sumbaana munimo. Berimba nabosu gaga tai. Kakavana ri bata nipantopantona nu tarampa, damo nosere kuli ntaina nobela nisai ntarampa. Ngare-ngarena i Nggibo, nekavulela nekakai.

I Yuku pangane hia nompari-mpari mbakonjoraka balenggana bo domo notingo-tingo ri vayo nu loka. Damo eva tabingga nipatuobo. Ngare-ngarena i Nggibo nopaelo i Yuku. Naosapa rarana nonturomo ia ri bavo ntablingga apa nalengemo nggendo hau, nggendo tumai. Nountumo pangane ia bo nongare, "...Uku?"

Nesana i Yuku, "...uu."

Nongare vai ia "Uku!"

Nesana muni i Yuku nipountuna, "...uu."

Ngaya-ngayana mata i Nggibo nompaelo ri umba topesana, eva aga ri kapurukumo topesana. Nongare vai ia, "Ukuu!!"

Nesana muni i Yuku ri kapuruna, "...uuu."

Bo nippetirona tavuna bo nikarausina, "Nadoyo ta tavu aga nepongeika. Aga ia nesanaka." Ningareakana vai sanganipa, "Ukuuuu!!!"

Nesana muni i Yuku, "...uuuuu!"

Bo nagigi rarana, nialana datu bo nivunjukana tavuna. Dopa nekavantu ia nekavulela vai ia, apa tavu nabembe nirutu nte datu.

Neongamo pangane hia balengga i Yuku bo nojaritamo ia ka i Nggibo nede, "Aginamo itumo kita hia nee mangoa gaga, majombe gaga, navau rara. Kitamo tupu nu loka damo nalenge nompatuvu. Novuapa, ikomo nogamoyana, noome mpakoyana mau aga kulina, le namala ninavusakamu ka yaku. Ja berimba pangane posibotusa? Mbo rakande mpasanggani, kate iko navau gaga raramu. Aginamo domo yaku movega ka iko! Navau gaga raramu! Liu rara! Pai ate! Sina nggaroke! Bolo tundu!"

Notumangimo pangane i Nggibo bo nerapi ampu nte i Yuku, "Merapi ampu yaku, Uku! Domo yaku madoyo. Matobamo yaku, kana movega mpuu ranga kita. Domo yaku majombe gaga. Domo yaku mangoa. Domo yaku mompatuvu tamboloku mboto. Ampungi ranga yaku, Uku!"

Bo i Yuku tolulu rara, niampunginamo i Nggibo bo nipangajarina vai i Nggibo, nanguli, "Kuampungi iko, Nggibo. Aga domo ngena rapovia inggu doyo ala raporoa ntona kita. Apa ane navau rarata, nasanda rara manggavia, le ria nuapa rakavata. Eva itutu-tu ya: motudamo loka pangane hia, ee... aga lolo...lolo...kidi. Nanggita mai pangane hia tuda-tuda nu roa nabelo katuvuna bo natasa ri lolona, neumbamo rara da mangakupaka anu ntona. Navaumo rara, nigamoya pura. Itutmo itu silakamu nte yaku. Kita tulau mompakulisi belamu aga domo mpuu ngena madoyo. Apa ane kupalamba iko, mamate mpuu iko ante belamu, da tai itu nabobari pura. Mbanapa tavu nabembe nirutumu nu datu. Le ta nisanimu yaku aga nipountumumo."

Nte tangi-tangina i Nggibo nerapi ampu nte panjoso nu rara bo nopinda, "Domo ntoto ranga yaku madoyo."

TESA TOBURO BO TOBONGO⁷

Tesa hitu nombatesaki kajadia ri tempo nggaulu. Tesana, naria randua tona nosampesuvu, sangana i Buro bo i Bongo. Sampe nipoposangaka i Buro bo i Bongo sabana lako ri pompoanaka ira randua naburo bo nabongo mami lako riara ntinana.

Naria sangu tempo ira randua nosimpekutana. Nanguli i Buro, "Berimba, Bongo, nuapa rapoviata maile?"

Nesana i Bongo, "Hau mangganopu kita maile apa domo naria bauta. Napai vaimo ngangata hii."

Nesana i Buro, "Ivetumo ya, apa aga iko mata nu dala hau rakayu tu, Bongo."

"Iyo ya."

Iwetu kabongina novia bakumo ira randua pangane. Nangongomo, domo. Niparikaramo pura nuapa nikenira maeo mpadondo. Da nabobayana nembangumo ira randua nompanesi talebe

⁷ TESA TOBURO BO TOBONGO dikarang oleh P.Lamanusu

nipogagara. Tempo da nangande, nanguli i Buro ka i Bongo, "Rakenita muni asuta, le, mbelaka maria binata ri kaparana ri dalata ngena."

Nesana i Bongo, "Ane ivetu tano, pakande pakabosu muni asuta."

Nesana i Buro, "Iyo."

Naupupa ira nangande, nabelomo kaeona. Nangulimo i Bongo ka i Buro, "Haumo kita. Kalamo baku, Buro, yaku motate dala ka kita bo mosimbuaka sopu."

Hau mpuumo ira randua nesua rakayu, kana ante asuramo sambaa. Nasaemo ira nolipa dopa ria nuapa-nuapa nikitara. Nanguli i Buro dako ri puri, "Metaa ruru kita mangosaraka, Bongo. Nakavaomo polipata, dopa naria porasita apa domo masae bara matongomo eo."

Bo nangosarakamo ira sampalai. Naosarakapa lengera, nolipa vaimo ira. Dako polipa-lipa nangulimo i Bongo, "Buro, bara nuapa navuri maitu ri lolo kayu, da nakavao sakidepa?"

Nesana i Buro, "Kitamo, rakitata pakapara."

Ivetu nakava ri totonamo, nipetingoa i Bongomo, "He ngguyumo, Buro! Nee makanano!"

"Iyo. Berimba sema mompene, kana ikomo, Bongo. Yaku le nekita matakii hii."

Nasadiamo i Bongo mompene, nisaelenamo sopuna bo bakuana. Nanguli ia ka i Buro, "Ane mompenemo yaku ngena, epe-epe ngena ri umba porumbuna. Risitu nukalau! Ane mobusimo manavu ngena, bobamo!"

Nesana i Buro, "Iyo."

Nompene mpuumo i Bongo nanjaele sopuna nte bakua nu vilana. Ri umba porumbu tava nu kayu, ri situ kalau i Buro. Bara berimba pekanggenisi i Bongo ri lolo nu kayu, nakabasaka palena. Kaliu-liu nanavu ri sinjori i Buro, pobusina petuu mpoboba i Buro. Niepene, nibobana, nonguu mpomanusia. Nigareranamo, "Hama! Manusia tano. Ledo i Bongo mamimo hitu? Mamate mpuumo iko, Bongo!"

Naupa mpuu bo naria sambaa asu nikenira. Nanjilipa i Buro pangane hia, damo lelo nu asu nikanggenisina nanjili. Ri umba niose nu asu, ri situ muni niose i Buro. Raranggarui niose nu asu, raranggarui muni niose i Buro. Rarabingge niose nu asu, rarabingge muni niose i Buro sampe nakava ri souna. Nakavapa ri souna mai, nigarerana karona bo kadana njumangu karui bo bela notinggaduli ntapumpu dala. Tobongo namate nibobana pangane, ledomo nitana sabana aga ira randua sanjou bo ledo naria tona nosinjori bo nosingga parai nte ira.

PATESA TONA NJAMBOKO⁸

Pamulana ira njamboko nantalumo rapotuda kasubi. Jadi ira haitu anara papitu kadeana. Kandeara aga kasubi, pade kasubi mai naboli damo pitu-mpu. Nompekirimo toma nu ngana pangane hii, notesamo ia ka bereina, "Berimbamo kita ngena? Pangandeta aga haitu mpuumo."

Nesana bereina mombine, "Agina ralipositamo anata hau ri mata binangga, apa domo rapakuleta mompakande anata."

Tempo ira notesa haitu, tanga bongina, tano ngana tuei kaupuna ntoto nangepe potesa ntotuana. Jadi naeo mpadondonapa, nikaeramo kasubi. Naupu nikae, nidakaramo hanu rapogagara, hanu

⁸ PATESA TONA NJAMBOKO dikarang oleh M.K. Kanjinaba

rapobakura. Naupu sia, haumo ira ri mata binangga, kana tuei kaupuna ri puri. Nakava-kava sangu kilo nibolina kasubi santubi. Aga vesiamo ira nantuntuni binangga.

Nasae-sae pangane nielorama tina bo tomara, tunggai nielora domo nikavara. Nangulimo tuei kaupuna, "Manjilimo kita!"

Nangulika tuaka-tuakana ka tueira, "Iyo."

Navolimo ira pangane, nanggava-nggava sangu kilo kana naria kasubi tanda nu dala. Naupu sia dopa nasae kakava ntomana bo tinara, nakava munimo ira ri sou.

Nakava pangane, nikae vaimo kasubi rapovelera bo rapokaturura. Naupu nangande, naturu puramo, tano tomara bo tinara njuu-njuu nompekirika anara. Nakava tanga bongi, nipeintara anara nalurumo namonjo. Nanguli vaimo tomara ka bereina mombine, "Maile mpadondopa rapakakavaopa mombaliposi anata." Tano tuei ntoto kana niepena potesa ntotuana.

Naeo mpadondopa, nikae vaimo kasubi. Nipakangongora vai rapogagara bo rapobakura. Naupupa ira nangande, haumo ira noure binangga nantuntuni toma bo tinara. Nakava-kava sangu kilo, tuei kaupuna nomboli kasubi santubi. Aga vesiamo hau nombatuntuni totuara. Nakava ri mata binangga, nikeni-keni mpombalikomo ira. Kasae-sae nielorama toma bo tinara, domo naria. Pade nopaelo dala nggavoli vaimo ira. Nanguli tuei kaupuna, "Mavolimo kita." Nipeintara tanda ri dala santubi-santubi kasubi kana naria. Naupu vesia, dopa nasae kakava tomara bo tinara ri sou, nakava munimo anara.

Nasusa mpuumo rara ntoma bo tinara haitu, apa kandeara damo pata-mpu kasubira. Nangulimo tomara, "Berimbamo kita hii?" notesaka bereina. "Apa pangandeta damo haitu mpuu."

Nesana bereina mombine, "Kana rakaetamo ruru kasubi, apa ledo naria anu ntanina."

Naupu haitu nialara vaimo rapokaturura. "Nasusa mpuumo rara, apa maeopa kasubita damo talu-mpupa ria. Ane vesia tano, kana rapakamonjota vai ruru."

Pade motesa ira njamboko raliposira vai anara, "Mailepa vai ngena rapakakavaotapa manggeni anata hau ri mata binangga." Tano tuei pangane dopa namonjo.

Jadi naeo vaimo pangane, nikae vaimo kasubi. Nangongopa, nangande puramo ira. Nikenira sanu kasubi rapobakura, pade haumo ira nantuntuni toma bo tinara, kana tuei kaupumo ri puri. Nakava-kava sangu kilo, nibolina vai kasubi santubi rapotanda nu dala mavoli ngena. Aga vesiamo nggalako-lako pangane. Da vesia-sia nakavamo ira ri mata mpetina. Da narasa nolipa nielora toma bo tinara, domo vai naria. Nangulimo tuei kaupuna ka tuakana, "Domo naria i nina bo i tata. Hau navoli vaimo ira."

Nantuki binangga, nantuntuni tomara bo tinara kana tuei kaupumo ri puri. Kaupuna pangane, nipeintara domo naria kasubi, tano kasubi nikande nu tonji kalikoamo. Jadi ira pangane domo nikavara nu dala, apa kasubi nikadesi ntonjimo. Nasae-sae ira nangelo dala, aga nanggava banua ntupu kayu. Nakava ira pangane, nipekutana ntupu kayumo, "Dako ri umba tano komiu?"

"Kami hitu nalipo, domo nikava kami nu dala."

Ira haitu naaramo taira. Naasimo rara ntupu kayu nanggita ira. Novelemo tupu kayu ka ira. Nangongopa, nipakande ira papitu pangane. Naupupa ira nangande, domo nidekei ntupu kayu ira manjili. Nesana tuei kaupu, "Dopa kami sii apa kami da mopaelo toma bo tina kami. Kana haumo kami ruru."

Nesana tupu kayu, "Ane kana vesia tano, koimo komiu."

Ngana papitu pangane nopalero dala vaimo ira. Nipaelo-paelora dala pangane, ledo nikavara. Nasae-sae naara vaimo taira. Nanguli tuei kaupu ka tuakana, "Nuapamo rakandeta ane vehitu?"

Nesana tuakana, "Kana molipamo kita sampe rakavata nu dala." Da vesia-sia pangane, nosinggavaka harimau ira. Kaupu-upuna pangane, ngana tuei ntoto nosibagaka harimau. Aga ngangana nisemparakana, nipangalana dilana rakandera. Naupu nikandera nu dilana pangane, haumo ira nopalero dala vai. Kasae-sae aga nasala ndala ri banua nu longga vai ira haitu.

Nikava ngana papitu ri banua nu longga aga bereina mombine. Nakava ngana pangane, nitalodusi nu longgamo nte anana papitu muni. Nasae-sae sakide, nakavamo bereina langgai. Nangulimo bereina langgai, "Ri umba tolino nesoaa-soa uh...uh...?"

Nesana bereina mombine, "Naria niloduku ria rahaitu nte anata."

Nangulimo bereina langgai, "Berimbamo ngena kita mangalana?"

Nesana bereina mombine, "Ane mobili ngena, anata, ane ledo mobili ngena, tutumo raalata ratunu."

Longga notesa haitu niepera. Nanguli longga namonjo puramo, tano dopa. Dopa nasae ira notesa, nakavamo ira njamboko nombagarera tambolora. Tano bili ana nu longga papitu nivolesi ngana tuei nggaupu pangane nipobilikana ira papitu. Naeo mpadondonapa, niunggeraka nu longgamo. Nesuvu bo nangova pura, tano aga anara mboto nambela nitunura. Kajadi-jadina niraga nu longgamo ngana papitu pangane. Nangova ira haitu nesua ri bolo nu kayumo. Kaupu-upuna nipeintanakasi nu longgamo ira ri bolo nu kayu. Kasae-sae namonjomo longga pangane. Nesuvumo ngana tuei kaupuna nombabuka sapatu longga, namalapa nipasuanamo. Naupu haitu, nirondenamo tuaka-tuakana. Nakavapa, niulikanamo, "Tatalu ri pale ngganaku, tatalu ri pale njidiku." Nanguli ngana tuei, "Ane kutampadu ngena kada nu longga pakaroso mekingginisi."

Naupu vesia, nitampadunamo pade nevoromo ira papitu pangane. Longga ipangane, nalei matana nembangu. Kaupu-upuna notumangimo longga apa sapatuna nikenisi ngana papitumo ipangane.

Netuumo ngana papitu pangane ri banua nu madika. Nakava ira pangane, nitarima nu madikamo, mokarajaamo ira ka madika. Nipeinta-inta nu madika ngana tuei ntoto natau mpuu. Kaupu-upuna tuakana aono najadi todea biasa, aga tuei kaupuna najadi madikamo.

Aga ri siimo kaupuna.

BANTILUKU ANTE IBO⁹

Naria saeo Bantiluku ante ibo nosiunaka motuda loka. Nanguli ibo ka bantiluku, "Motuda loka kita, Uku?"

Nesana Bantiluku, "Anumo, maipia kita hau motuda loka?"

Nesana Ibo, "Sambara. Bara maile, bara eona hitu, jadi pura."

Jadipa haumo ira notuda loka ri bonde i Bantiluku. Nagana saminggu nosipekutanamo ira. Nanguli Ibo ka Bantiluku, "Nakuyamo lokamu, Uku?"

Nesana Bantiluku, "Noloomo."

⁹ BANTILUKU ANTE IBO dikarang oleh Demi Bonga

Nekutana muni Bantiluku ka Ibo, "Nakuyamo lokamu, Ido?"

Nesana Ibo, "Lolo kidi, lolo kidi."

Nagana ka roamingguna nekutana waimo ibo. "Nakuyamo lokamu ria, Uku?"

Nesana Bantiluku, "Notawamo." Pade nekutana muni Bantiluku, "Berimba munimo lokamu ria, Ibo?"

Nesana Ibo, "Lolo kidi, lolo kidi."

Nasae-sae ira nosipekutana aga wesia njuumo. Pesana nu ibo "lolo kidi-lolo kidi". Kaupuna loka nu ibo namatemo tapi loka nu bantiluku nowuamo.

Nowuapa loka bantiluku, nangulimo Ibo ka Bantiluku, "Kita hau rapeintata wei lokamu, Uku. Anumo."

Jadipa haumo ira nompeinta loka Bantiluku. Nakawa hamai, nangulimo Bantiluku, "Pene kaku ruru lokaku, Ido."

Nesanamo Ibo, "Iyo."

Nakawa ri loona nompepasamo ibo nangande wua loka bantiluku. Nasae sakide nanguli Bantiluku, "Nawusaka kaku hanu, Ido."

"Neepa ruru."

Nanguli wai Bantiluku, "Nau aga sangu."

Nesana wai Ibo, "Neepa ruru. Kukande nte sangupa."

Nanguli wai Bantiluku, "Nau aga kulina."

Nesana Ibo, "Kulina nggu podoi."

Nanguli Bantiluku, "Ane wesia tano, nau aga toduna."

Nesana wai Ibo, "Toduna nggu podoi."

Nangepe pesana i Ido wehaitu, jadipa i Yuku nakodimo rarana. Nidikana saiya ri bata loka bo niulina ka ibo, "Ane manau komiu ngena, Ido, nemo manau ri adena, panau ri tunduna."

Nesana Ibo, "Apa nakuya tano? Ledo nakuya. Iyo, Uku, kuturisi jaritamu."

Naupu nangande loka, nanau mpuumo Ibo tapi ledo niturusji jarita i Bantiluku. Kaupuna i Ibo nambela saiya i Yuku, Nambela saiypa i Ibo, netabunimo Bantiluku ri tambe nu tabingga konau. Natudu ri tana domo naria i Bantiluku nikawana Ibo ri belana pangane.

Jadipa Ibo haumo nonturo ri bawona tabingga anu nipetabuni Bantiluku bo nekutanamo ia, "Ri umba komiu, Uku?"

Nesana Bantiluku, "Ri sii yaku, Ido."

"Ri umba?"

"Ri sii."

Nangepe pesana i Bantiluku aga ri toto mponturona, nisarumakana aga tawuna nesana. Pekutanana wai sangganipa, "Ri umba komiu, Uku?"

Nesana Bantiluku, "Ri sii yaku, Ido."

Niepena pesana i Bantiluku aga ri bela-belanamo ri toto mponturona. Nitimbaunamo tawuna bo nadunggamo ia.

Nangepe ibo nadunggamo, nesuvumo Bantiluku bo nekutana ka Ibo, "Nakuyamo komiu, Ido?"

Nesana Ibo, "Tumo kananao, Uku. Yaku nanringoa eo nasoomo." Naupu nanguli wesia, namatemo Ibo.

TESA PANJAYOKU HAU RI MANGGALAPI¹⁰

Mpae pitupulu bo papitu (1977) yaku hau ri Parigi, Desa Sumbersari, Bonebulu. Nakava sumai, naria sampesuvuku sumai ri Bonebulu nadua, nikeni hau ri Sumbersari rapakulisi. Eo nggakava kami haitu ri Bonebulu niepe kami ia nikeni hau ri Sumbersari. Hau nipeeinta kami. Nakava kami, nantamo mpuu duana. Nosimpotesamo manggeku nte ira sumai nosimpekutana. Nanguli tesara, "Berimba ane rakenita hau ri Bonebulu?"

Nosimpoimo ira. Jadipa nikenimo hau ri Bonebulu eo haitu apa nikitara nantamo gagamo duana. Dako nakava ri Bonebulu, naponjimo, atau nalelakamo nosana. Dopa muni najadi nitana eo haitu, apa do masae manggoviamo. Damo rapomailena pade nitana. Naeo haitu pade nopatana. Naupu nopatana rapomailena vai pade hau ri Olonjongi ri Desa Lemusa, hau notambu dayo manggeku. Navoli lako ri Olonjongi, nanjilipa nodala vai ri Gangga. Da ri Gangga, niepemo karebana ira lako ri Tambarana nakava ri Bonebulu. Tapi eva dopa naroso rara, apa topotesa dopa natantu. Nasae-sae niepe, nakana mpuu, naria ira nakava ri Bonebulu. Jadi haumo kami ri Bonebulu. Nakava sumai, naria mpuu nikava kami ira bara sakuya ndua.

Nosinggavapa nipekutanakumo ira, "Riumba sampesuvuku?"

Nesana ira, "Le nisan kami."

Bara sakuya nggani nipekutanaku, aga ivesiamo pesanara. Tapi yaku dopa naupu raraku da nekutanapa. Sampe niuliku, "Ane aga tono, ledo kupekutana njuu komiu. Saba nisaniku sampesuvuku. Itumo yaku kana nekutana njuu. Ane rasanimi, neemo ratabuniaka, kana rauli ka yaku."

Nesana ira, "Domo ria ira rumai."

Nanguli yaku, "Mbamo tano?"

Nesana vai ira, "Rou nantende ri bulumo."

Nanguli vai yaku, "Ane rou nantende ri bulu ira, masae vai pade tumai?"

Nesana ira, "Le nisan kami. Ledo nopalakana ira nalai. Le nisan-sani, dako vesia nalaimo ira."

Dako sii rahaitu nipekutanakumo ira, "Maipia komiu manjili hau ri Tambarana?"

¹⁰ KAJADIA RI KARO MBOTO dikarang oleh Tei Sarikuna, Saleh, Palolo

Nanguli ira, "Eo salasa."

Jadi nipekutanaku vai ira, "Ane makava ri Tambarana ngena komiu, domo mantende hau ri bulu?"

Nesana ira nanguli, "Hau mantende muni manjayo."

Nipekutanaku vai hanupa, "Ane makava hitu, dopa mapara komiu hau?"

Nesana ira nanguli, "Ane makava sumai damo momaya kaosanaka maga nu kada, bo haumo."

Nangulimo yaku, "Ane ivetu tano, ane mamala, hau muni yaku saito."

Nanggava eo niovora ipangane, haumo kami ri Tambarana. Nalai dako ri Bonebula, aga nolipa nggada sampe nakava ri ngata Laibagu nanggoviamo. Jadipa naturumo kami ri ngata haitu. Naeo mpadondo, nolipa vaimo kami sampe nakava ri ngata Malakosa. Nakava ri Malakosa, nasae sakide pade nakava jonson. Jonson haitu nijanjira mami tupuna anu nipesavira da tumaina. Nakavapa jonson haitu, nesavimo kami. Pesavi kami haitu, kira-kira tinti sasio eo. Sampe nakava ri Tambarana bara naliumo tinti ampa apa nantamo panggeni ntupu nu jonson, ose rakenira dako ri Laibagu hau ri Poso.

Nakava ri Tambarana netaamo jonson, apa mesaimo kami. Netaapa jonson haitu, tumaimo sakaya netomunaka. Dako nanau yaku dako riara nu jonson, nakabalasemo. Nisarumakaku bara domo mandala uve, tano bara molabipa sanggapoyo. Nakabalase yaku haitu, dopa natudu bone kadaku, nanginu uvemo sakide. Ri sii rahaitu pade nisaniku uve tasi napaga.

Jadi nakabalase haitu namome/nabangga pura purukaku ante baju. roaku ledo ria nabangga apa ira ledo nakabalase. Kapola-pola nendai dako ri jonson hau ri sakaya. Naupupa kami nesavi hau ri sakaya, nesoremo sakaya hau nakava ri bivi nu talinti. Nakava sumai ri bivi nu uve nanaumo kami bo nolipa nggadamo. Nantende hau ri bavona, apa ponturora sumai ri bavona ante ngata. Nakava kami sumai nanggoviamo. Dopa nasae nabongimo. Nabongi haitu naturumo.

Bara sakuya mbongi sumai ri Tambarana, nirasi naosanakamo maga nggada, Jadi haumo kami noure binangga Tambarana. Palai kami daki ri Tambarana bara dopa tinti aono. Ledo nasaro gaga kami netaa. Sampe netaa naara tai bo nangande. Naupu nangande nolipa vaimo. Dopa nikava kami pesorena naedemo eo bo nauda rombambo. Jadipa nenontomo kami.

Naria sou ntupu ngata ri Tambarana hamai ri ulu nu binangga Tambarana, ledo nambaso aga kodi-kodi. Aga sukana saito naturu. Naupa naria kaluku nituda ntona tupu nu ngata Tambarana ri ulu nu binangga haitu. Haitumo niala kami tavana, nipoata nu sou, bo nipoompa nu roaku. Yaku aga naturu ri bavo nu kayu ronggote nipanene popolangga kira-kira sapulu senti olona. Ane ledo rapopolangga, ledo mabelo rapaturu apa kayu ledo nambaso. Sanggani negoli nompakanoto rara apa ane masala mpegoli aga manavu apa nebunggoli kayu. Naupa ivesia paturuku, kana nabelo sakide. Nasusapa vai paturu nu roaku, apa ira aga naturu ri tana. Ri tana haitu nompayo uve. Nasae pade nabai. Nau nivokemo tava nggaluku nipoompa, kana da namomepa naturu, sabana uve naoge nalinju. Jadipa ira ledo nasiayu kamonjora.

Naeo mpadondo noure vaimo kami sampe nakava ri pesorena. Nakavapa ri pesorena, nesoremo kami nendake ri bulu. Pade negoli hau ri binangga nu Maetani. Nakava ri binangga, nevotemo kami. Naupa naria lelea apa binangga naoge bo nauda muni sabingga. Nakava ri sambotena sumai, nangandemo kami. Naupu nangande nolipa vaimo apa nompari-mpari sabana ri olona haitu niulira vei, "Ledo ria tava rapovia sou. Sampe naria tava napara ri binangga nu Salubanga. Bo ri olona haitu muni, nakura muni kayu rapapu, pade tanana nagege, sabana nadea uve mpemata."

Jadi nolipa-lipa kami haitu mai, naudamo nipari kana domo nikava ri binangga Salubanga. Da ri olona haitu naedemo eo. Jadipa kana naturu vesiamo kami. Tava nipo sou aga nipasiruru sakide-sakide, apa nakura ri olona haitu. Ivesia muni kayu rapapu aga nielo-elo bo naria nikava nte sanggoto nigaloka kayu mata. Naupa ivesia kana najadi muni apu kami nipompakangongo pangande ante baku.

Naeo mpadondo kami, nolipa vaimo kami. Nasae-sae nikava kamimo binangga nu Salubanga, pade nevoté kami hau sambote sumai. Naliu binangga haitu niure kamimo binangga norona Manggalapi. Dopa nakavao pourena, nikava kamimo pontalu nu tonji momua. Nakavapa ri sia, netaamo kami bo nokae ntalu. Nikava kamipa bara sakuangu kadeana. Nenontomo kami nokae. Pade nangala kayu bo nompadumpu apu. Nanakipa apu, nipakangongo ntalu. Pompakangongona aga nituvu ri balo. Nangongopa ntalu, nangandemo kami. Naupu nangande nolipa vaimo kami.

Nakavao-vao sakide kami nolipa, nikava kamimo bengga lompu. Jadi naekamo kami apa ledo ria petalili. Nompene kami ri lolo nu gompa. Bara nanggita kami haitu, nalaimo ia. Jadi napolamo dala kami. Dopa nasae kami nolipa, netaamo kami bo novia soumo apa mabongimo.

Nabongi haitu naturu ri sia vaimo kami. Naeo mpadondo pade nolipa vai nantuntuni dala noure salu sampe ri matana. Nakava ri matana, negoli hau vai ri sanjaluna. Nonjalu vai saluna haitu sampe nakava ri binangga. Nakava ri binangga haitu, niure vaimo binangga haitu sampe hau ri uluna. Nakavao pade nanggava pesorena. Nesore haitu nendakemo kami hau ri buluna. Ri pendakena haitu, nandasamo niepeku sabana naaramo tai. Madota mangala uvu, ledo najadi apa nasaramo rara, naedemo eo, apa da nakavaopa niulira sou.

Jadipa kana nipaentermo dala nolipa. Sampe nakava ri sou nabongimo. Jadipa naturumo ri sia kami. Bongina haitu nangandemo kami pade naturu. Naupa damo naara tai, aga nisuka nangande, apa baku domo naoge. Naupu nangande, naturumo.

Naeo mpadondo nolipa vaimo, hau ri sou rakalau apa sou paturu haitu da sou ri dala. Tapi domo nakavao dako ri sou paturu haitu. Kira-kira sanggoto eopa nolipa, nakavamo. Nakava kami sumai, naupa da naria kadue ri doyata. Nikaemo bo nitunu nipompari-mpari apa naaramo tai. Nangongo haitu nikandemo. Da nangande-ngande, nakavamo i Lae. Nakava ia haitu, notesa-tesamo kami nte ia nosimpekutana nanguli, "Ri umba puramo roamiu?"

Nesana ia, "ledo nosisan."

Nipekutana vai, "Dako ri umba tano komiu?"

Nesana ia, "Dako ri sou."

Pade nepekutana vai, "Hau ri umba tano komiu?"

Nesana ia nanguli, "Nanjayo-njayo, notarayo."

Nasae-sae notesa nipekutanaku vai ia, nanguli yaku, "Ri umba gi Toma i Yole?"

Nesana ia nanguli, "ledo nisaniku. Aga i Yole naria nte tinaku. Tapi ledo nosanjou kami, sanjouna muni ira."

Nasae-sae notesa haitu, nanguli ia hau manjilimo bo niuunakanamo yaku. Nanguli ia. "Haumo kita? Modala manjayo-njayo motarayo."

Nesana yaku nanguli ka ia, "Dopa ruru yaku tulau. Da nadua gaga kadaku." Pade nanguli yaku ka ia, "Ane mosingga ngena komiu, ulika ira tumai rapeinta yaku apa dopa nisaniku dala."

Naupa notesamo yaku ka ia, eva dopa naroso raraku, Sampesani ledo raparasayara. Naupa naria gambaraku nikeniku santau. Nipakatukumo hau ka ira, supaya maroso rarara, nakana mpuumo tano ia rii. Jadi naupupa haitu, haumo ia.

Nasae-sae nitongoraka dopa ria ira neala. Nagana katalu-mbongina, dopa ria neonga. Niuunakakumo roaku mekeni hau ri sou niponturo i Yole, apa ia nisaninamo.

Naeo mpadondo katalu-mbongina haitu, nangandemo kami. Naupu nangande, nolipamo kami hau ri sou ponturo i Yole haitu. Nakava kami ri sumai, nikava kamimo gi Toi Yole da nangande. Tano ira nangande haitu rapogagara hau mealamo. Dako vesia nakavamo kami. Jadipa, domo najadi ira hau neala. Nakava yaku haitu, nangulimo Tina Yole, "Nuapa raala tumai? Berimba bo rakava pura ri lapi-lapina?"

Nesana yaku nanguli, "Nanjayo-njayo, apa nalentoramo rara."

Naupu haitu notesa-tesamo. Tano ira mai sampe naulia hau neala, naulia muni kareba nakava nte ira. Apa ira da hau ri sou mpomanggi. Nakava petevaiku pangane, haumo Yole nantuntuni tina tuamana bo ledo muni nisanina ri umba rapomanggi tina tuamana aga nilosona. Nakava ri salu, aga noure, aga nonjau nopaelo kuva nipogame. Nasae nielona pade nikavana. Nikavanapa haitu, nitesanamo ka tina tuamana. Niulina ka tina tuamana, "Naria manggeku nakava. Tapi dopa nakava ri sou ponturoku. Da rumai ri sou mbaso. Nitevai ia tumai, hau raala vei ia, apa dopa nisanina dala tumai."

Nieperapa tesa haitu, nanjilimo ira dako ri sou mpomanggi hau ri sou ponturo i Yole pangane. Haitumo sabana sampe ira naulia nakava neala.

Jadi nakavapa yaku sumai nosangganimo yaku nte ira. Roaku nekeni pangane hia, aga sambongi ia sumai nanjilimo ia hau ri sou kakava kami pamulana/paratama. I yaku nabolimo ante ira tona nitunggai kami.

Bara sakuya mbongi naliu haitu, niuunakakumo i Yolo mosimporoa ka yaku hau mantunggai roaku nekeni ipangane hia. Nakava sumai, notesa-tesamo yaku ka ira, "Ane manjili ngena, motua hau ri Tambarana kai peintamiu vai yaku. Neemo ngena damo rapomailena komiu pade hau. Mbelaka da manjayo yaku."

Naupu haitu, naeo mpadondo nanjilimo kami bo i Yolo. Nakava sumai ri sou, nosiunakamo kami ntali vega hau mosuge ri mata nu binangga Manggalapi.

Naeo mpadondo haumo kami nosuge ri mata nu binangga haitu bo nitevaikumo ira ri sou. Nanguli yaku ka ira, "Ane makava ngena tona meulika, ulikamiu rapopeana yaku. Ane makava tona ngena meulika hau motua ri Tambarana, ulikamiu rapopeana yaku, apa yaku da hau manjayo."

Naupu notesa haitu, nolipami kami. Nakava ri binangga nouremo sanggoto bo nosugemo. Ri eona haitu, aga sanggayu masapi niala kami. Apa naedemo eo bo nauda muni sabingga. Namalapa masapi haitu, novia soumo kami. Naupu novia sou, nitelamo apu. Nitela-tela apu pangane hia, sakide-sakide ledo manaki apa nauda. Apa ledo ria kayu nalega. Damo duruka ntoko nisaya nipompanaki apu pade nanaki.

Naeo mpadondo hau vai kami noure. Nakava ri uluna domo naoge baku. Jadipa notovo konauomo kami bo nipanggi. Roa-mbongi kami ri sia. Naupupa pomanggi haitu, nalai vai kami hau sanjaluna, tapi da mata nu binangga haitu pura. Nakava ri salu haitu, noure kami sampe nakava ri matana pade nendake ri bulu. Patuju kami haitu, madota manggita ramana sabingga hau. Nasavi kami ri bulu haitu, nikita kami da nariapa vai bulu to nalangana. Panguli kami da haupa vai kami. Nituntu-tuntu kami bulu haitu mai nikita kami aga nakavao-vaomo bulu to

nalangana haitu. Jadipa kami domo napola hau. Tano bulu nituntu kami haitu pantao noromo. Apa ledo nikita luona, nakulimo.

Jadipa kami notuamo hau rara njalu apa nanguli roaku haitu da hau manjovo Manggalapi pura. Nakava ri salu haitu, nonjaumo kami sampe nakava ri posovo uve naogemo, bo naede munimo eo. Novia soumo kami bo naturu vesiamo.

Nabongi haitu, nipeintaku bula nebonda, dako ri matana, nasolo hau ri layana. Naeo mpadondo nipeintaku eo nebonda dako ri matana nasolo muni hau ri layana. Nangulimo rara ntaiku, "Berimba ngena goli nu binangga hitu?" Aga dopa niulikuka roaku. Tapi nariamo bata nu raraku, bara domo ngena binangga hau ri Manggalapi.

Nalanga sakide eo haitu, nouremo kami hau nosuge. Ri sii rahaitu pangala kami masapi bara sakuya nggayuna kadeana. Bo ri sii rahaitu muni pade nisaniku nabasa nangande bau masapi.

Nabongi haitu navolimo kami dako nosuge, nitapa kamimo bau masapi haitu. Puri kami namonjo, ledo nisani kami bara nuapa nombataja bau ri karavana. Damo naeo mpadondo pade nikita kami bau haitu ri karavanamo. Nikandena munimo sakide tapi ledo naoge. Nangulimo kami, "Bara nuapa nangande?"

Naupu haitu nanggalivomo kami bo hau nonjaumo. Nakavao-vao ponjauna, nikitaku nadeamo lauro mputi. Nangulimo yaku ka oaku, "Bara domo ngena binangga hau ri Manggalapi hitu."

Nesana roaku nanguli, "Binangga nu Bulu Tido hitu." Jadipa kana hau vaimo kami nonjau.

Nasae-sae nikita-kitaku kana nadeamo lauro mputi. Nanguli vai yaku ka roaku, "Domo binangga hau ri Manggalapi hitu. Nadea gagamo lauro mputi nikitaku. Apa pourena dako ri Tambaraname sampe negoli ri binangga nu Manggalapi neure sampe nakava ri matana, ledo ria sambesa lauro mputi nikitaku. Bara aga binangga hau ri Palolomo hitu. Apa nikitaku pebonda nu eo robongimo kita naturu ri uluna, aga dako ri matanamo pebondana, nasolo aga hau ri layanamo."

Nangulimo yaku ka roaku, "Berimba kita ane mesore hau ri kabatana bo mendake ri bulu? Ane manoto rarata manggita luona?"

Jadipa kami nesore mpuumo ri kabatana. Dako niose kami haitu aga lonta nu nua rara njampune. Nodilo ri tambena nekasua. Nagumbu ri tambena niompa ri bavona. Aga ivesiamo sampe nakava ri bulu. Ledo notate. Ane napii gaga, aga niboba ntoko. Ane karoku niumangu nababari apa ledo nobaju. Nompotove baju ala neemo mabite. Ane tonda nikalaku, nabite pura vambana, nikai ntimplo nikeni nekasua. Nakava kami ri bulu, nanjilokimo eo. Naupa muni nggoviana haitu ledo nakulimo. Nipeintaku naria eva bonde nakavao nikanoto ri lobuna. Naria muni naputi sangu-sangu nikitaku, eva japi kambasona. Nangulimo yaku ka roaku, "Bara banua ri Tangoamo moitu. Naria eva bonde nikita. Naria muni naputi-puti eva japi."

Jadipa roaku haitu nikanotona munimo. Nanguli ia, "Nakana mpuu."

Da ledo nalanto belo, nompene vai kami ri lolo nu kayu nangganoto pakatantu. Natantupa haitu, nanaumo kami. Pade nokalimpataua kami hau ri toto nu binangga niponjau kami ipangane. Nanggava lobu ntana sakide netaamo kami apa nabongimo. Domo najadi novia sou, damo nipatunda ivesia tava nu lauro. Nau kayu domo nadea niala. Domo natumutoa apu bongina haitu. Naupa muni ledo nauda bongina haitu.

Nabongi haitu eva ledo nasiayu kamonjoku, sabana nompekirika dala mpanjili. Neemo neemo ngena ledo mambela dala da hauna raose manjili apa ledo notate. Anu nipokaja aga ri pantao noro, apa ane masala mpesai ledo mambela mata nu binangga hau ri Manggalapi, tantumo aga mategoli ri binangga sabingga tumai vai. Ri sii rahaitu sakide nasusa pompekiriku.

Naeo mpadondo da naruyo notuamo kami hau rara njalu. Dopa nakava rara njalu, nikava kamimo nua nangande vua nu vongu. Nibunu nu roaku ntoku, ledo nambela. Aga nangova netotoaka. Jadipa roaku haitu nontoyamo ri vala. Yaku neangga ri belanamo. Nakava ri totoku, netaamo nua haitu. Ratimbe, ledo mabote. Kira-kira tatalu metere kakavaona nte yaku, Jadipa nibunuku nu sarompomo. Ledo nabaka aga nontumbu/nesupa. Dopa muni nalai nua haitu, damo nangenga soa pade nalai. Ivesia ane nua dopa nisanina manusia. Ane aga nepeinta, ledo ia nalai, ane dopa niengana soa. Ane nienganamo soa, nalaimo ia.

Nakava rara njalu, nonjau sampe natudu posovo ri binangga ninjau kami eva riavi. Nakava ri binangga, noure vaimo kami, tapi domo nakavao. Nanggavamo pesaina dala kami da tumaina. Niure kamimo salu ninjau kami da tumaina haitu sampe nakava ri matana. Nendake nasavi ri bulu, naupa muni nituntuni kami dala kami da hauna, ledo ria nasala apa ledo nitate, sampe negoli hau ri mata nu Manggalapi.

Nakava kami ri kasavina dako ri Manggalapi, nabongimo. Naturu ri sia vaimo kami. Bongi paturu kami haitu sakidepa domo moapu apa naotimo lana nu colo. Naupa naria dama nikeni kami. Nasalisa nagengge/navaya nipompanaki apu.

Naeo mpadondo notuamo kami hau ri binangga nu Manggalapi. Nakava ri binangga nonjaumo kamu sampe nakava ri pesorena. Nesoremo kami hau ri sou. Nakava ri sou notesa-tesamo kami nte ira nikava kami ri sou. Notesa-tesa haitu, nipekutanakumo ira, "Nariamo tona dako ri sii nanguli hau motua ri Tambarana?"

Nesana ira nanguli, "Nariamo. Niulina vei, eo salasa hau motua." Nikava kami haitu naliutakamo. Apa kami eo arabaa pade nakava. Naeo eo kamisi niuunakaku vai roa, hau mompepeinta sou nikava kami. Apa ri sumai nipetaara. Nikava kami damo belana. Tano najadi mpuumo ira notua eo salasa. Hau kami haitu naturu sumai munimo sambongi, apa naedemo eo. Mavoli domo makapo, mabongimo makava.

Naeo mpadondo nogaamo kami. Yaku nanjilimo hau ri sou nikakavaku. Roaku hau ri souna munimo nompepeinta roara rumai apa ira ledo nosanggani, aga sanjou sauo. Nakava yaku ante roa nikakavaku nekutanamo ira, nanguli, "Najadimo ira rou motua?"

Nesana yaku, "Najadimo, domo ria nikava kami."

Ri sii rahaitu yaku nompekiri, nanguli riara ntaiku, "Aga berimbamo ngena yaku hii? Isemamo kutuntuni hau manjili? Apa roa rou mokolumo. Bara tona nikava hii, eva dopa ria pompekirina manjili hau ri ngata." Jadi dako ri sii rahaitu, nosimpakenimo hau nanjayo-njayo novunju/novatika.

Nasae-sae nosimporoa haitu, notesa-tesa vaimo. Nasae-saemo tesa, nekutanamo yaku, nanguli, "Berimba panteseremiu bo berimba pombarasaimiu? Sakuyamo kasaena komiu nonturo ri sii ri bulu?"

Nesana ira nanguli iveau, iveau. Pade nasae notesa-tesa haitu, nekutana munimo ira, nanguli, "Berimba-imbamo kareba hau?" Nipekutanara pura sampsuvu-sampesuvura ri umba-umba naria Pade niulira muni ane ri anu berimba-berimba karebana, ane ri anu, berimba muni karebana.

Nesana yaku nanguli iveau, iveau. Nuapa nisaniku niuliku munimo ka ira. Sampe niuliku muni, ane ri anu iveau, iveau, ane ri anu iveau, iveau muni.

Jadi nasae-sae notesa haitu, bara nariamo posinggavana, nariamo pogoli mpekirira. Mosinggani ante yaku manjili ri ngata. Dako ri sii rahaitu, notesa-tesa simbo ira mboto, nanguli, "Ane aga kita totuamo, da naria belona. Tapi ane mamatemo ngena kita, damo ngana bayangi maboli, tantu

domo rasanira dala nanjili hau ri ngata, bo maeka munimo ira apa domo rasanira bara manggena bara sampsuvuna atau sararana. Tantumo melabimo kasusana."

Dako ri sii rahaitu mai, ira notesa-tesa nosimpoiyomo manjili ri ngata. Ri sii rahaitu mai navoemo sakide pompekiriku apa nariamo roa mosinggani hau manjili ri ngata. Apa ane dopa maria roaku hau manjili, nirasaiku eva nasusa ntoto niepeku. Apa sakuyamo kasaena hii ledomo nangandengande gara. Nau poroko aga tambako mbaso. Naupa naria ana ntambako natuvu. Aga haitu nisepi-sepi tavana, nitoyo bo nitapa. Nangau haitu pade niporoko. Aga nibungu nu kuli nu dale. Ri sii rahaitu nirasaiku eva nasusa mpuu. Ane nanjayo-njayo hau rakayu, ane naupumo kuli nu dale damo nibungu tava nu bomba, apa sia tava nanipi sakide. Ane tava nu kasimpo ledo nabelo, navau, aga nalenggavu rara. Haitu pura nipompekiriku sampe nasusa raraku. Naupa mpuu nariamo dotara mosinggani ante yaku manjili hau ri ngata. Ngata nipokonora rakalaura aga ri Palolo apa nangepe ri Lembantangoa nitalumo bo nipoviamo banua rapajadi ngata. Aga ri situ naria dotara monturoka.

Nosimpoiyopa ira haitu, nanggalivomo kami. Nalaimo kami dako ri bulu ponturora haitu, hau nantuntuni dala kami dako nosuge isaeo hia. Apa dako ri sii rahaitu nipanggita kami talua ante banua ri Lembantangoa. Tapi dopa natantu ntoto bara Lembantangoa bara ri umba. Apa niepe niuli ntotua vei, "Binangga dako ri Mamgalapi, binangga hau ri Palolo nipoisintomukana." Haitu sampe naoge bata nu rara kami kana ri Lembantangoamo banua nikita haitu.

Jadipa kami haumo nonjau binangga haitu, sampe nakava ri Palolo. Ri ponjauna haitu nakava ri posovo netaamo kami, mangelo konau apa nakodimo baku. Netala haitu, niboli kamimo panggala kami bo haumo nangelo konau. Ledo muni kami nosandala, aga nobagi-bagi. Naria hau noure salu, naria muni nesore ri kabatana. Yaku hau nonjau ri layana.

Nakava ri layana, nikavakku konau. Nasae niogaku ledo natudu kuruvuna. Jadipa nanjilimo yaku hau ri posovo pangane. Nikavaku ri posovo, domo ria panggeni nu roaku. Aga noure yaku, aga nonjau nompepuna dala nu roaka. Ledo ria nikitaku valeara. Ri sii rahaitu nasusa vaimo raraku. Nangulimo riara ntaiku, "Aga berimbamo ngena ane domo kukava roaku? Tantu saitokumo sambongi rarakayu."

Nasae sakide nakavamo roaku tumai manjili panggalaku apa ira novia soumo ria ri bavona. Apa yaku niulikara mosimporoa nte ira hau mangala nua nibunura. Apa ira hau noure salu pangane hia nanggava nua. Nibununa bo namala. Haitu hau niala kami. Santanga roa kami novia sou.

Nakava ri sou nipovia nu roa kami, naedemo eo. Nabongipa haitu, notapa nuamo kami bo naturu vesiamo. Naeo mpadondo notovo konauamo kami bo nomanggimo. Talu-mbongi kami naturu ri sou haitu. Nariapa baku, nonjau vaimo kami. Nakava ri layana sangganipa vai kami nomanggi, apa nakodi vaimo baku. Talu-mbongi vai kami ri sia pade napola.

Nalai dako rahaitu, sambongipa kami ri dala nesuvu ri Sibaga. Nakava kami ri Sibaga, nikava kamimo sou ntona bo nipekutana kamimo tupuna, "Ngata ri umba hitu?"

Nesana tupuna nanguli, "Dopa naria sanga nu ngata hitu. Da kapala ri Berdikari nombakangginisi." Pade nipekutanamo tupu nu sou haitu, nanguli, "Dako ri umba tano komiu?"

Nesanamo kami, "Dako ri Tambarana."

Pade nipekutanana vai kami, nanguli, "Hau ri umba tano komiu?"

Nesana kami, "Hau ri Rejeki."

Pade nanguli vai ia, "Tantu naria sampsuvumi ri Rejeki."

Pade nesana kami, "Iyo, naria."

Naupu notesa haitu, nipekutana kamimo dala, "Ri umba dala mapola hau?"

Nituduakana ka kamimo, nanguli ia, "Hau rara bonde haitu. Motua makava ri dala mbaso."

Naupu haitu nopalakanamo kami bo nolipamo nantuntuni dala nituduakana haitu, sampe nakava ri dala mbaso. Nikavapa kami dala haitu, nituntuni kamimo sampe nakava ri Rejeki.

Nakava kami ri Rejekii salamatamo apa naruyomo (kira-kira santanga papitu). Nakava kami haitu, kapola-pola yaku nesua hau ri avu i Minggu ante toko, ante panggala dopa nitulu-tulu. Nanguli ka ia, "Tomunaka sampsuvumiu naria nosinggani nte yaku."

Pade nesuvu ia ri karavana/doyata. Nikitana naria mpuu roaku. Sampangepe ira gahaitu [tona naria ri sia], kami nakava ri sia, tumai puramo netotoaka. Nakava ri sia damo noiyove eva tonji geli nantako vua mpoli. Topongirina nongirimo, topotesana notesamo, toposisalungguna nosisalunggumo, toposikapuina nosikapuimo, apa lentora simbau nasaemo. Ledo nisani-sani dako ivesia nakavamo. Haitumo sampe nosimpodamba gaga. Ane bunga ri doyata i Minggu, naoya pura, atau nakoto pura nipositaja hau tumai, apa sampsuvu nakava pura netotoaka.

Bara sakuya mbongi nakava ri sia, haumo kami ri Banpres manggita banua. Bara maria maloga bara domo. Nakava kami sumai nikita kami naria banua naloga anu niponturo ntona tapi nipalaikanamo. Pade notesa-tesa kami ante balengga ri sumai, ane mamala kamimo monturo ri banua naloga haitu. Nesana balengga nanguli, "Ledo nakuya."

Naupu haitu notinggulimo kami ri Rejeki vai. Bara sakuya mbongi kaliuna, haumo kami ri Banpres ante roaku dako ri Manggalapi haitu, bo naria muni sampsuvu ri Rejeki haitu nosinggani hau nangala banua ri Banpres. Nakava ri sumai, nomperava doyatamo ira bo nonturo ri siamo. I yaku notuamo hau ri Maranata.

Nakava ri Maranata bara sakuya mbongi, pade nendake hau Raranggonau. Nakava Rarangonau notesa-tesamo ante roa-roa hamai. Apa ira nompekutana kareba, nanguli, "Berimba kareba dako ri Manggalapi?"

Nesana yaku nangululi, "Nabelo."

Nasae-sae notesa haitu, nangulimo yaku, "Naria roaku dako ri Manggalapi rumai nangala banua ri Tangoa."

Dako ri sii rahaitu naria munimo ira dako Raranggonau bara sakuya njou hau nangala banua ri Banpres. Sampe sii-sii naria naroomo hamai, naria muni notingguli hau Raranggonau. Roaku dako ri Manggalapi pangane hia, naroo ri Banpres munimo tapi noayo hau ri Manggalapi vai, apa nisanira sumai tana naluo, lembana nabelo.

Sampe eo pangane hitu, nadeamo njouna tona nonturo naroo ri Manggalapi.

Sampe ri siamo tesa dala mpanjayoku dako ri Maranata hau ri Tambarana napola hau ri Manggalapi sampe nesuvu ri Palolo.

TESA PANGEVA BALANDA¹¹

Ri mpae sanjobu sioatu bo randua (1902), peevo i Labaresi bo i Lalove nangeva pomarenta nu Balanda. Nuapa sabana bo ira nangeva poparenta nu Balanda mai? Sabana nipekirira randua

¹¹ TESA PANGEVA BALANDA dikarang oleh J. S. Silinawa Labaresi, Rejeki

hitu hii, ledo nanoa parenta nipajala nu to sangatana hitu, ledo ria kakanana, mpuu-mpuu natenggo panggeniakara nesua ri ngatata.

Jadi, nolibu ngata atau boyo. Boyo hitu hii nturona ri bagia nu buluna, ledo ri tana lembana nipoboyara tempona haitu. Naupu nolibu ira saboya mai, nibotusi nu libu pangane hia, nasintuvu pura tesa nu totua-totua ri boyo mai, kana raevata parenta anu ledo nanoa nikeni ka kita. Ri situmo nitesa berimba akalana kita mangeva tona napanagantu ante kita aga sopu, tavala, bo guma. Nanguli i Labaresi bo i Lalove, tona nituduakara najadi nanggeni ira, ivei, "Ntanina lako ri parevata hitu, akalana, ane ri dala mabiko ngena rakae ntimali-mali rapetabunita, ala neemo raktara kita. Ane moliu balita mai, damo metosu ase kita, meili ri sabinggana metosu-osu muni tona ri sabinggana ante tavala. Ledo mambela kita rapanaguntura, apa kita nalendu tana nikae. Nipanaguntura aga nambela tana, apa kita nalendu ri bolo ntana."

Nosioseaka puramo tesa nangoseaka tesa nu balenggara tona nipajadira balengga riara mposieva. Ntanina lako ri bente nipoviara mai, naria muni nipovia ane nabiko dala bo nabingge; nisore vatu mbaso lako ri bavona, noliu bali pangane mai pade nitentesi posoo vatu. Nokaduli vatu, nirumpa nu vatu pura bali noliu, naboli damo nte saito-ito, pade nipaleliusira, nitampa nu guma bo naria muni pareva ntanina. Nipakera saiya nipovia lako ri balo niombi pakatada. Haitumo mai pareva nipakera mangeva topeparenta ledo nanoa.

Nitasere sio-mpae nenggakayu, Tadulako randua haitu nosanga i Labaresi bo i Lalove, nanggeniaka tona nangeva topeparenta natenggo mai. Riara sio-mpae mai, ira niraga-raga nu Balanda nenggakayu. Nariamo napanagantu nu Balanda, namate, nipakasangu dayo nte randua sampe tatalu tona. Naria muni napanagantu ledo nabaka, niboba ledo namate. Nielora akala sampe mamate. Nuapa akala nu Balanda? Nitana tuvura pade namate manusia pangane hia, tanda kasoa nu Balanda neparenta. Naupa ivesia kasoa nu Balanda neparenta, ledo ntoto naluu rara i Labaresi bo i Lalove manggeniaka tona nangeva topeparenta anu ledo nanoa mai.

Ri mpae sanjobu sioatu bo sapulu sangu (1911) randua Tadulako ri Tana Kaili hitu hii nanggulomo sakide karosora neeva sabana nadeamo nikande nu akalara, iamo toBalanda, apa damo ira nenggakayu mai, ledo nadota niparenta. Nipekiri nu Balanda nagampamo damo sakide ira neeva. Raeloka akala sampe rasaka balenggara haitu. Apa nipekiri Balanda, tona ri lembana pura-pura ri tambe parentaramo. Jadi nitudu nu Balandamo kita mboto nompakeni dala hau ri Manggalapi nanggeni surudadu nu Balanda. Ri situmo randua Tadulako hitu hii, natesaka niakalani toBalanda ri mpae 1911 bo nikenimo ira nipatani hau ri ngata Jawa (Nusa Kambangan/Cilacap) ponturo ntona neeva.

Sampe eo hitu ledo nipakavoli nu Balanda, ledo ranga nodayo ri ngatana mboto eva Tadulako Tana Kaili haitu. Jadi ane rapekiri ntoto kambuku nu tesa, Tadulako randua haitu, i Labaresi bo i Lalove hii, iramo hitu hii nompekirika kakana-kanana ante kanoa-noana raseaka, sabana nompekirika kapola katuvua nu muli-mulita ngena. Apa ledo katuvuata nu manusia hii aga natuvu ri pantuduaka pale to santanina. Kita kana matuvu ri pantuduakata mboto. Batuana, rasanita mboto mangelo dala nggatuvuata. Ledo manjarumaka aga lako ri roamo mombadekei dala nggatuvuata, kana raelo mboto berimba dala nggatuvuata. Apa kita nipatuduki mami lako ri manusia dako najadi nipajadi nu Alataala, kana mesuvu ini pade manggava pangande. Kambukuna, kana mompaelo mboto dala nggatuvu natuvu ri dunia hitu hii.

Ngata ri Lando, ngata ntotua, ngata nokolu.
Ngata nambaso, ri situmo tona neeva, ledo nadota raparenta.
Tadulakona i Labaresi bo i Lalove nisaka, nikeni ri Jawa.

Siimo hii kaupu nu tesa sampe sii-sii nitarimatamo berimba vua kakaa nu baga Tadulako randua haitu. Vuana nirasaitamo belona bo kakanana niparenta to sangatana, bo niparenta simbo kita mboto.

Nitasere patapulu bo aono mpaе (46) kita, panguli basa Indonesia, namaradeka. Nirasaita mbotomo belona posiparenta mboto hitu, kira-kira 46 mpaе, nopuna lako ri sintuvu mpasanggani, iamo punana ntoto, "PANCA SILA". Puna nggosena nikingginisita, kita mboto nosiparenta, hitumo hii patuju nu Tadulako ri Tana Kaili hii, sangana naria nitulisi riara nu tesa hitu.

TEMPO KAGERO NGATA RARANGGONAU¹²

Katuvu manusia ri dunia namala nirapaka eva eona ante bongina. Sabana nuapa anu nirasaita nosinjambei-mbeiki tempona nasana bo nasusa. Ivesia muni anu nabelo bo nadaa nirasai pura riara ngatuvuta.

Evamo anu da nakapo nipeinta bo nirasai kami ruru iamo tempona ngatata Indonesia nijeje ntona lako sangatana. Ira nejeje kava ri soki-soki ngatata nipesayora pura sabana patujura mangago hasele mpokarajaa ntodea. Ante dala nepasimbuku ala kana radekei ka ira pura, ira mepatesi ane ledo radekeita nuapa niperapira, haitumo ngena sabana najadika posieva riumba-umba.

Rapanamo eva pamulana kagero ngata Raranggonau tangga sapulu sasio, bula sapulu randua, mpaе sanjobu sioatu alima pulu bo alima (19-12-1955). Tempona haitu dopame naria kajadia, totua-totua nompetalingai moni nu tonji. Niulira naria batuana pomoni nu tonji ane eva raitu. Eona nomoni tonji kureu. Nanguli totua, "Nagureu. Hau ri umba tano kita hii?" Ane bongina nomoni tonji vurukou pade pomonina nondou, nanguli vai totua, "ledo nabelo kana maria ndou nttona madaa meonga riara ngata hitu ngena." Dopa nasaе, naria mpuumo kareba neonga nanguli bongi haitu kana mainga-inga apa ledo nisani bara maipia Gorela meonga. Pade niulikamo topanggeni podade bongina haitu muni kana malaimo lako ri banuana.

Itumo nikenimo ira hau ri sou nu talua naparamo ante Biromaru nemopa todeana. Naeo mpadondona da naruyo pade nalai hau ri sou talua. Da naria muni hanu dopa nakapo nalai lako ri banua, nakavamo Gorela nombaronde ira ante jarita neompanaka mepatesi ane ledo madota hau rarondera. Gorela nompekutana ri umba kalau balengga ngata, nipesanakara ledo nisanira bara ri umba. Pade Gorela nombaboba ira ante panaguntu sabana panguli nu Gorela ira nodava. Naupu haitu nitunjumo banua-banua bo gampiri-gampiri pomboli pae anu dako niore da naponu pura, napapu sanganimo nitunju nu Gorela. Ri umba tempona haitu todeana hau netabuni rakayu puramo. Sangu eo damo nanggovia niepe nalinomo, domo naria pogu nu banua nitunju, pade hau langgai nompetadilo Gorela lako ri sosona. Tano domo naria, navolimo. Todea netabuni nesuvu hau ri sou taluamo.

Dopa nadea eona nakavamo Pomarenta nomparesa banua-banua anu naboa nitunju ante mpengaya-ngaya gana banua, pangande, pakea. Damo pae ri talua anu dopa nakapo niore ri gampiri, haitumo nibagi-bagi rakande. Pade nanguli pomarenta rapalaisimo ngata hitu, aginamo motua hau ri Biromarumo. Tona nangoseaka jarita pomarenta, nijanjika tana anu mabelo rakarajaa. Hanu ntanina nalaimo hau ri Parigi, Manggalapi, rakayu, pade da naria muni hanu da naroomaka ri ngata Raranggonau.

Dopa kami nalai lako ri ngata Raranggonau, nakavamo tangga roapulu bo alima, bula sapulu randua, mpaе sanjobu sioatu alimapulu bo alima (25-12-1955). Nasiromumo kami ri banua sangupa anu ledo nitunju, risia kami nodade nompopatora pompoanaka i Pue Yesu ri dunia. Topanggeni podade iamo sarsaa. Ri sia tona nodade aga nte saito-saito nasova, aga notumangi pura. Naliu haitu pade nanggalivonaka puramo hau ri Biromaru. Ri umba kami ro-mbulu labi kasaena ri sia, nanguli pomarenta molinja hau ri ngata Pandere vai sabana pangulira ngata haitu nabelo.

Nanggava bula tatalu nakavamo pomarenta ante oto mangala todea hau rakeni ri Pandere. Kami nakava nangosanaka ri banua ntupu ngata nompopea sou nipovia ri umba langgai-langgai

¹² TEMPO KAGERO NGATA RARANGGONAU dikarang oleh Hanalia B., Rejeki

nompakasangu novia sou nipakandate, damo nitombo-tombi nipaturu sambanua-sambanua. Riamo kami nitulungi nu pomarenta nibagika mpengaya-ngaya anu niparaluu eo-eo evamo: pakea, pakuli, sero, taono, pomanggi, pandoli, ante pangande eva ose, bau, uta, gula, gando, susu.

Tempona haitu nompamula puramo nantalу rapotuda pae, dale, uta bo mpengaya-ngaya. Naganapa talu-mbula pade nikabasaka nu pomarenta. Riara talu-mpae kasaena kami notuda pae, aga sanggani najadi aga naleso niindo nu eo napane. Nanggava vaimo mpae 1957-1958 (sanjobu sioatu alimapulu bo papitu, sampe mpae sanjobu sioatu alimapulu valu) nantepuu vaimo nasusa rara kami sabana naria vaimo nuapa niuli PORMESTA. Pamulana ledо nisani-sani sampesanika neongamo riara ngata anu nosangaka tantara KIU nakava nosanggani ante berei bo anara bo nte panggenira. Ledо nasae ra ngata haitu nopalakana malaimo ira, sabana niulira maria bali ritu metuntuni (meraga). Dopa nasae naria mpuumo tantara Brawijaya ante kapala mpevoro nombanavusaka boo. Pade hanu ira nesavi oto nadea anguna naponu pura ante pakea bo pareva mposievara.

Tempona haitu kami bara sakuya minggu kasaena ledо nidekei mompatuvu apu eona, aga bongina mamala. Haitumo kami da nabongi novele vaimo rakande eona haitu, sabana niuli isema mompopounu apu ranavusaka boo. Pade hau netabuni rakayu pura tonu, naria ro-minggu hanu saena ala neemo mambela peluru.

Aga naliu haitu roa-roa kami nalaimo hanu hau ri ngata Maenusi nodala rakayu, nesuvu riara nu ngata Bobo. Hanu da nabolipa muni ri ngata Pandere. Pade nakava vaimo pomarenta neulika molinja hau ri Maenusimo apa hamai tana nabelo rakarajaa rapolida.

Nipasadia pomarentamo terekutoro manggeni mpengaya gagu-gagu ntodea apa dala hau ri Maenusi dopa namala niose nu oto, aga jara mpuu namala nangosena. Jadipa nanggalivomo hau ri Maenusi ri umba ngata nikakava kami pamulana nosanga Maenusi I (sangu). Tempona nakava haitu, da nijampangi pomarenta pura pangande bo popakea. Banua niponturo kami iamo banua roa kami anu nokolu nakava. Pade langgai-langgai novia talua rapotuda pae, dale, ante mpengaya-ngaya.

Nariapa hasele nu talua, nantepuumo todea neguru movia lida. Nikalavata ruru sulapa ampa pade nitonggo nu pomanggi riarana. Nisuaraka uve pade naupu haitu nipovia pasanga ante salaga. Sakuya deana topokarajaa nosiuliko mosinjambei-mbeiki randua majadi japi, saito sampe randua muni motamanaka salaga ane maoya tampona. Naoyapa , ninana binemo. Naria haselena nitarimamo sakaru saito, haselepa nadeamo nggotana nikarajaa jadipa namalamo notimpo japi. Nipekiri vai dopa naoge tana rapolida nipeinta da nariapa tana naloga, dopa ria tupuna. Nosintuvu vai langgai-langgai nantalу riara mpangale rapajadi lida. Naupu nitunju nituda pae lare pura ruru, pade totua-totua nosinjula pekiri nanguli ane raposintuvu rapokintamo salibo tana anu nikarajaa. Naupu haitu nitudumo todea nompelisiki mboto mbana pompokonona pade niukurukamo kintana. Naria salibo kinta ledо naria tupuna, haitumo nipombangu gareja.

Nadeapa banua neangga, nakavamo pomarenta nomparesa bo nompoposanga ngata, iamo "Rejeki"

Sampe ri siimo kaupu potesa nantepuu lako kagero ngata Raranggonau sampe kami nonturomo sii ri ngata Rejeki.

TUTURA POLINJA MANGELO KATUVU BO KABALI KATUVU TORARANGGONAU¹³

¹³ TUTURA POLINJA MANGELO KATUVU BO KABALI dikarang oleh A.Lamangile Lamanusu, Banpres

Katuvu ntodea toRaranggonau naliu dako ri poparenta kamagaua ntanina, eva poparenta Balanda bo Japaa, dopa nasiayu katuvura. Da bate-batenamo dopa naria kabalina naupa nasaemo kakabasaka njumangu todea (tolndonesia) dako ri kamagaua ntanina haitu eva Balanda bo Japaa ri mpaе 1945. Naliu haitu ponturo toRaranggonau aga bate-batenamo nantalу, nolinja dako ri bulu sangu hau ri bulu ntanina. Naliu haitu naria sangu kajadia, najadi ri ngata Raranggonau bo ngata-ngata ntanina, iamo kajadia petunju Gorombola. Petunju haitu najadi ri mpaе 1955, nombatunju banua, sou-sou, gampiri, bo Gareja ri Raranggonau. Nanggita kajadia haitu todea toRaranggonau nakamburaka, naeka bo nalai pura hau ri rakayu. Naria nalai sampe nesuvu ri ngata Parigi, bo naroomo ri sumai.

Naupu sia nanjili vai ira ri ngata Raranggonau. Nipeintara domo naria banua, sou raponturora. Sangu tempo madika ri Biromaru nompokio Kapala Raranggonau, iamo Yacop M. Lamanusu (Toma i Yenny). Tempo haitu, ala mangulika todea molinja dako ri ngata Raranggonau hau ri ngata ntanina ala mabelo katuvura ri eo nggapurina.

POLINJA POPAMULANA:

Ri mpaе 1956, iamo ri ngara Karampe (Pombeve) nikeni Kapalara, iamo Y.M. Lamanusu. Ledo nasae ira ri ngata haitu, apa tanana nakaa (apa tempo kapane nu eo). Riara mpaе haitu muni ira nilinja pomarenta hau ri ngata Pandere, ri tana kabuluna muni nasimbayu eva ngata to nipalaisi ri Raranggonau. Iamo ri bulu bavo ngata Pandere, eva Tinjavatu, Dolo/Tombua sambote Salu Tombe, dll.

Rompae ira naroo hamai, pade nilinja pomarenta hau ri ngata Palolo, iamo ri ngata Menusi. Ri mpaе 1958 nikeni Kapala Y.M.Lamanusu bo nitarima Kapala Menusi, iamo Geo Biro. Nituduaka ka ira tana ri Pekavare bo ri Salili layana sampe ri Sidumu. Mpaе 1963 nolinja vai ira nantalу ri Salili uluna, sampe ri sambote binangga Menusi sampe ri Uve Tovu bo Torogimba. Ri mpaе 1965 naroomo ponturora. novia ngata napara binangga Menusi nipoposanga Rejeki.

Nompoposanga ngata Rejeki haitu iamo, Madika LDg. R. Lamakarate (Toma i Dompo). Nipokapalara batena Y.M.Lamanusu. Bo totua-totua ngata ntanina iamo:

- 1: Lamanusu (Tupu i Yenny)
- 2: Y.L. Lamanusu (Toma i Rally)
- 3: Y. Burivana (Toma i Tiriko)
- 4: Pakubasa (Toma i Ndili)
- 5: Mbeti (Toma i Neni)

POLINJA KARONGGANINA:

Ri mpaе 1972? apa nadeapa todea toRaranggonau naboli ri ngata Raranggonau, nilinja pomarenta vai ira sagaa hau ri ngata Petimbetag. Totua nanggeni ira hau iamo Jondi (Toma i Hati). Bo totua-totua ntanina naroomo, ledomo nolinja-linja. Kadeana ira, nelabi 20 banuana.

POLINJA KATALU-NGGANINA:

Ri mpaе 1978, apa nadeapa vai tona naboli ri ngata Raranggonau, tempo haitu naria vai kaasi mata nu pomarenta ka todea nonturo ri buluna ri ngata Raranggonau. Tempona haitu da i Camat Biromaru Efendy D. Pavara B.A. nombalinja ira dako ri ngata Raranggonau hau ri Palolo, iamo ri lobuna Wenuni napara Tongoa, sanugu ngata to nibangu nu pomarenta ka tona ri buluna ntanina eva toPosirunju, Doda, Daenggune, kaupuna Balaroa bo Raranggonau.

ToRaranggonau nilinja hau, bo nikeni i Nei Repentina (Kapala kolombo Raranggonau) bo i Aswin Lemba lako ri pomarenta. Bo nitarima muni pomarenta eva i Taero Parigade (Pembina Proyek) to nibangu pomarenta haitu. Pura-pura todea to nilinja dako ri Raranggonau hau ri Wenuni 40 banua, sampe sii-sii ira ri sumai nelabimo 60 mbanua. Jadi nadeamo ngata nikamburakara momaelo katuvu, nantora katuvu muli-mulira sampe ri kasae-saena.

Nasudu ri siimo Tutura mbuku, polinja toRaranggonau mangelo katuvu, bo kabali katuvu toRaranggonau.

LONTARA ANTE DALA NGGATUVUA¹⁴

Ane kutora-tora lenge ntotua nompatuvu yaku da nangana kodi, pai njidi, pai nggana nangelo pangande, ala mamala ngana matuvu masalisa mambaso. Mpuu-mpuu ranga totua santanga mate nompatuvu, nompaiku sampe nambaso. Papitu nosampesuvu nipatuvu ntotua, nipakande mumu nu dale ante uta kelo nigalo nu palola, nibale nu lamale mata nilapa. Hiimo hii kandeata toKaili, mau damo hau ri umba, kana nitora talebe mpoge. Ane ratora muni ri tempona eo napane nggaulu, tabaro nidange nisirobu ka uta. Nasalisa mpuu nabosu tai, nadii pura tambuke, apa tabaro nebanggamo riara. Vesiamo kapaina nopaelo kandea nggaulu, apa nggaulu dopa naria erehasi, anu pompasaviraka uve hau ri tana popae. Jadi pangane hia, nangelo pangande da santanga mate. Notuda-tuda, aga nantongoraka uda. Sii pura nipoسابانا pangandena nggaulu tunggai nabotu, ledo nosiumpu, apa aga mantongoraka uda pade mevavo. Pajeko da nakura muni nggaulu, aga tona nabotemo ante naluo tanana nomboliaka pajeko.

Vesia muni nosikola. Ane sikola nggaulu, deanapa nirindi nu palapa, sikola nabelo ntotomo nggaulu ane nirindimo vitate. Pakea mposikola, mpetuli-mpengaya. Deanapa nopuruka pangguru hau nosikola. Mau nilampi nu solo kada ledo pura naria, tuumo rauli ane mosapatu. Jadi mpuu-mpuu napakasi popakea nggaulu.

Mau vesia kapakasi nggaulu, kana napumpu muni sakide posikola, natama muni SR (panguli nggaulu). Natama ri SR, nompaenje vai ri SMP. Talu mpae saena nosikola. Eo-eo aga nolipa, apa dopa naria oto eva nggapuri hii, Mau aga sapeda, da nakura ntoto. Ane hau mpadondona, dopa neonga eo nolipamo nodala ri bavo nggalavata. Sapatu aga nisampeaka ri vinga. Nakava ri jambata ase pade nombokoisi kada pade nipasua sapatu. Jadi pangane hia, kami nggaulu nosikola. Dota nu rara naoge, patuju nambaso, doi ledo nompakule. Mau vesia kana nipaenje ntotua nombaongkosi sampe nesua vai ri SMA. Ri SMA kana nolipa njuu talu mpae muni.

Natama ri SMA pangane hia, nicoba muni nesua ri sikola nalanga Tadulako. Dopa nanggava tite, nenontomo, apa totua namatemo. Domo naria topeongkosoni.

Dako ri kakakodiku sampe nambaso, ledo nabutu nangepe jarita ntotua nompangajari. Petevai ntotua hii, mpuu-mpuu nekeni ri kabelona. Haimo hai yaku ane notesamo totua, kana nitingoaku adena, ala rasanita muni dala nggatuvua. Panguli ntotua, "Belo rapovia, belo rakava. Dala rapovia, dala rakava." Hii jarita nakana ntoto. Itumo yaku, nuapa nippetuduka ntotua, ledo yaku netubo. Apa ane rabantata totua, niperapi doa ntotua kita ledo masalama. Hii ntoto nipoekaekaku sampe yaku ledo sanggani nombasanai totua. Jadi pangane hia nasae-nasae yaku nanggenggenisi petevai ntotua, naria muni gunana ri karoku. Sabana ane nanoa kita natuvu ri tatanga ntodea, sani muni sakide atura ante ada, mpuu-mpuu kita nipoimbi ntodea. Naparacaya muni todea yaku. Dako ri sii pangane hia nolibu totua nu ngata, batuana totua nu ada, madota mombaonggotaka yaku majadi topotulisi ada.

Jadi pangane hia, nakavamo totua-totua nu ngata ri banuaku tumai nopasabi neulika, nerapi kangaa nu raraku mantarima nturo majadi topotulisi ada ri boyo nu Duyu. Perapi ntotua pangane hia nitarimakumo, apa nitoraku muni belo ntotua, ala ledo totua mompakte. Nturo nombatulisi ada hii, nikenggenisiku melabi dako ri talu mpae.

Mpuu-mpuu nirasaiku muni bago najadi totua nu ada. Nuapapa ledo rapasiayu. Topoberei, toposinggarau, toposibore, tona nosimpalaisaka, topositui, mombine neduku, notangara vaya, toposiraga ka mbara-mbara, pokona susa belo, susa nadaa, nikeri pura ka totua. Jadi pangane

¹⁴ LONTARA ANTE DALA NGGATUVUA dikarang oleh Musu D. Tiku, Sept 10, 1991

hia, ane rabatuani nturo ntotua nosangaka "TOTUA NTODEA". Ane rabatuani ri kasarana ledo totua ntodea, "BATUA NTODEA". Nuapa sabana? Sabanamo eo bongi, naupa ntanga bongi kana nlike, nipecembangu. Niperapi, kana rapasua baju, kana manau mompasiayu tona bara nosimpalaisaka, bara nosibaga, bara topositui ri tatanga nu dala.

Hai puramo hai bago ntotua nibagota muni, ledo ria manguli lenge nu rara. Damo gaitu, papasa ntotua raala; "belo rapovia, belo rakava."

Nirasaiku muni eva nandasa najadi totua nu ada, ledo naria pareina. Ri sii pangane hia, yaku nerapi vai menonto sampalai, sabana nadea muni bago nu kantoro nipasiayuku.

Mpuu-mpuu nabago ane nadea tona nompalumpaiki ada. Bo eo-eo notangara. Eva nabasa muni rara. Ledo naria pangosarakana.

Sampe ri siimo ruru lontara ante dala nggatuvuaku.

TUTURA KAJADI NU NGATA¹⁵

Mpae sanjobu sioatu lima pulu bo sasio (1959), talu pulu bo ro-mpaemo naliu, haitumo pamulana kami nakava ri ngata Mpalolo hitu lako ri Tompu bo Raranggonau. Tempona haitu, ri njumangu Palolo hii dako ono-angu kadea nu ngata pura-pura. Manusiana da nte salale-lale. Bo dalana muni da nabiko, damo mpalovu-lovu. Nelabi-labipa ane tempona nauda ntamba, damo nagege bo nalonjo ndala. Ane nolipa kita, bo nasala mbajeje kita aga nambela lovuna kadata, nasapa kela lonjona. Apa tempona haitu da manusia bo jara mpuu namala nangosena. Dopa eva sii-sii, nau motoro, oto, nalancara puramo.

Tapi naupa ivesia kadaa nu dala ipangane hia, ledo muni nananga rara ntona. Sabana ri ngata Mpalolo hitu, nelabi-labipa nisangaka ri Maenusi hii, tanana naluo bo narano. Bo uve nu binanggana muni naoge. Nagampa rapovia tana lida.

Haitumo bo nompakadidi rara ntona. Sampe kadea-dea mpaena, kapantambai-mbai manusiana nakava lako ri umba-umba ngata, nabelo anu niaturu nu Pamarenta, nabelo dotara mboto.

Mpae sanjobu sioatu onopulu bo tatalu (1963) naliu, manusiana nadea ntotomo pantambaina. Sampe tana-tana ipangane da rakayu mbongo, sii-sii najadi natoaya puramo. Apa nipovia ntona puramo. Topotaluana notaluamo, topolidana nolidamo. Pokona, damo aga simbodota. Apa nuapa-nuapa ratuda, najadi pura. Sabana haitu sampe Pamarenta nanguli, bo ri ngata Mpalolo hii niulira najadi gampiri nu ngata mbaso (ngata Palu). Apa hasele-hasele mpovia ntona lako ri Palolo hii niulira naganamo.

Tapi aga sangaya, sakide nipokoru nu rara ntona, iamo dalana da nakaja. Haitumo pade nipekirisu nu Pamarenta bo ala mamala melabipa kasana ntodea, dalana kana rapovia bo rapakabelo pura. Ivetu dalana najadi bo nabelo puramo. Bo muni pongata-ngata niaturu mpakabelo munimo. Ivesia nagopa purapa ipangane hia, bo ngata-ngata dako nibangu mai, nipoposanga puramo.

Lako ri mpae haitumo kajadi pantambai nu ngata ri tana Mpalolo hitu. Eva niuli ri bavona ipangane, pamula nggakava kami ri ngata hitu, dako ono-angu kadea nu ngata pura-pura. Tapi sii-sii najadi sapulu bo ono-angumo ngata anu nipakakana nu Pamarentamo. Dopa nireke ngata-ngata ntanina anu dopa nipakakana eva Banpres, Kamarora, Kadidia, Lembantongoa.

¹⁵ TUTURA KAJADI NU NGATA dikarang oleh E.W. Lampekui, Rejeki

Jadi ane rapakakana mPamarenta puramo ngena, majadi ropulu angumo kadeana pura-pura. Naterekemo ante ngata ponturo kamimo hii, iamo nosangaka Rejeki.

Tona nompoposanga ngata Rejeki hii iamo Cama Biromaru. Nisangaka Daeng Ruda Lamakarate (Toma i Dompo). Topanggingginisi olu nu ngata ri Biromaru. Ngata Rejeki hii, pamula mpeanggana dako ropulu mbanuana ruru. Tapi sii-sii najadi siopulomo kadeana. Ane rapekiri, nasalisa mpuu nenggamba/ nantambai manusiana. Nasituju ante sanga nu ngatana, iamo Rejeki. Tapi sangaya muni niperapi mPamarenta, neemo aga rajakii manusiana magasi pantambaina, tapi mokarajaa ntamo muni ri dala nggatuvua, eva panguli nu basa melayu hia "ekonomi". Batuana, ane kita topokarajaa tana hia, polida rapakaluo, talua ivetu muni. Ala mamala haselena ngena mpuu-mpuu magana bo melabi rapaketa sambanua.

Ane ivesia, natantu masana pobanuata, bo pamarenta muni masana muni rarara manggita toteana, apa ira neoseaka niulika ri kabelona. Apa nuapa niaturu mPamarenta haitu, ledo aga kabeloara, tapi kabeloa mpasanggani.

Ivesiamo tesa mbuku kajadi nu ngata.

PETEVAI NTOTUA KA TONA NOBEREI¹⁶

Ane moberei panguli ntotua, nompengaya rapakasadia, nompamula dako ri pompakule nu bata/karo, ri kamampuan nu doi, sampe ri posikenika. Noberei hii, ledo nikalebaraka eva more-more, sabana kita noberei hii mpuu-mpuu nipasiayu ntotua nu ada, nompamula dako ri pangore balanja, nangovo nangelo eo belo rapanggavia susa, nombatesa ada, naiyana ada petambuli sampe ada mpekai. Jadi noberei hii, ledo aga mekeni kadamba nu rara, mpuu-mpuu kita hai nipou nu atura, evamo atura nu agama ri umbana kita hai kana ranika pade mamala mosinjori. Vetu muni atura nu ada nombapou kita topoberei.

Sema-sema nopalumpaiki ada, kana manggava pogivu dako ri totua nu ada. Evamo kita bara mosiboba, mosiboli besi, batuana nalai ledo nopalakana ante domo neumba-umba. Inggu vesia hai, panguli ntotua, kana movaya. Ane manjili ia hau ante bereina vai, kana mobaku tovau nte sangu rapoisi nu palena, pade namala ratarima ntotua. Itumo itu riara petevai ntotua ane moberei, rapeguruka dala nggatuvua ala ledo masala ngguja, masala mbiyayu ledo nautu metoa (natumutoa?).

Jadi noberei hii ledo mekeni kagigi nu rara, aga masara-masaramo, rapompekirika posikenikamo njamboko, sabana kita ane rataniakamo ntotua, mpuu-mpuu kita mbotomo mopaelo dala nggatuvua. Domo aga manjarumakamo totua mepakande. Sabana ane kita langgai namampumo noberei, batuana kita hai namampumo mompatuvu ana ntona. Jadi ane mpuu-mpuu kita madota masana moberei, pakaria ntani lenje mpokarajaa. Evamo kita ane topokarajaa tana, ratutusi rapakakana mpetuu, akana majadi panggaviata. Vesia muni ane kita najadi pande nu kayu, pande nu ase, rajapui pura pekarajaa hai, sabana masae-sae ngena hai mabelo munimo haselena, natantu puramo tona mangalina. Ane kita aga deanapa nolao-lao, ane panguli ntotua nobaendo, nuapa rakavata? Ledo sanggani manggava rajaki. Ane nu agama; sema menggave manggavia, itumo manggava.

Haimo hai kupopatora ka kita topoberei, eva kita najadi balengga riara sangu banua, mpuu-mpuu rapariara ntai nuapa isi nu banua dopa naria. Evamo isi nu avu neemo mpuu rakalingasi. i situ ngena raposaba mposinggarau. Vetu muni ane mosiuli njamboko. Nemo sampe raepe ntosambanuana, sabana kakurangata njamboko hii eve nuapa hia, rahasia nu ruma tangga. Neemo mosipongareka sampe mosiboba. Pokainggu vesia neemo ntoto rapake. Sabana nu ruma tangga hii, nambaso mpuu rahasiana. Evamo paturu nu njambokoa. Nuapa sabana kita

¹⁶ PETEVAI NTOTUA KA TONA NOBEREI dikarang oleh Musu D. Tiku

naturu ra banua, ri kamara, nipovia vai ka paturua sampe nikulambuni? Ri sia hai kita mompekiri mantanondoaka, ri umbana moberei neemo aga mongei-ngei. Rapongeika ana ntona.

Evamo nggapuri hitu hii. Domo sambara tona mogaa moberei. Sabana atura nipovia nu pamarenta mpuu-mpuu naroso panggenggenisina. Ledo aga sanggani niurusu naupumo. Mpuu-mpuu nibonto kabago, sampe doi nipalaisakana muni.

Jadi sema-sema manturusi, matundu riara nu atura mpoberei, itumo itu ngena tona masalama nggatuvuana. Dunia aherana kana masalama ia.

Sampe ri siimo ruru jarita petevai ntotua ka topoberei.

TESA POMPATUDUKI POBEREI¹⁷

Pompamulana tesaku hitu, yaku manguli bo merapi kasadia riara ntaimiu, Riumba eo hitu yaku nidekei ka tempo/loga dako ri totua-totua ngata, pomarenta, tina/toma bo sampsuvu sarara pura-pura to nibilaku.

Riumba eo hitu yaku nombadekei sakide tesa pompatuduki poberei ka komiu, dopame komiu mantaniaka mboto ri pobanuamiu. Naupa tesaku hitu aga tesa bo rapa bo jonjo, to niepe bo nopeinta matata mboto.

Tesa pamulana iamo PORAPA TOVE. Tove iamo : asele pokarajaa inggu, dako ri karota mboto, eva :

MATA - Nanggita
UNTO - Nompekiri
RARA - nombatimba

Rara nombatimba nuapa-nuapa anu nabelo rapovia bo nuapa-nuapa muni anu ledo nabelo (nadaa) nipovia nu manusia. Dako riara haitumo muni kita namala mompelisi nuapa rapoviata to nabelo ka karota mboto, to najadi riara katuvu manusia (langgai bo mombine) iamo TOVE.

Dopame moberei kita (manusia) haitu,

Pamulana: Manggita lenje bo karo roana, bara magaya bara ledo.

Karanduana: Mompekiri bara ratarimana jaritaku (tabe) ka ia bara ledo.

Katataluna: Mombatimba nuapa to nipeinta mata bo nipekiri ala mamala manguli jarita ka roata.

Kaampana: Posimpokono. Ane nisanitamo ia bara (randaa/kabilasa) gaitu nitarimanamo jaritata (tabeta) haitu, batuana mamalamo kita mompapola manguli jaritata posimpokono.

Nasae-sae posimpokono haitu, ledo ria kakuya-kuyana, kasae-sae najadimo posimpotove sampe noberei. Tove haitumo nompajadika manusia noberei nasana dako pamulana sampe namate, ledo naria kagero bo pogaa riara ponjamboko sampe ri kasae-saena.

Naria dade dero nanguli:

Dako ri umba pentaya nu love?
Dako ri laerava nanau ri tana.
Dako ri umba kakava nu tove?
Dako ri mata nanau riara.

¹⁷ TESA POMPATUDUKI POBEREI dikarang oleh Alex Lamangile Lamanusu, Banpres-Tongoa

Jadi, ane tove nipariarta nonjamboko ledo naria pogaa njamboko sampe ri kasaе-saena. Naupa naria posinggarau njamboko, neemo sampe manguli jarita to nadaa-daa bo nompakadua rara roa. Jarita nadaa haitumo namala nompakagero popekiri roa sampe domo naria tove riara ntai roa, sampe najadi nagero pobanua bo nogaa.

Tesa karanduana iamo PORAPA SAKAYA.

Sakaya nirapaka pobanua. Riara banua haitu, nadea tonana. Nom Pamula lako ri toma, tina, bo ana.

1 Toma nirapaka kapitee (topotaropo) nuapa-nuapa naria ri ngayo sakaya ri kakavaona. Jonjo:
a) Kapala (sakaya) ntanina ala ledo mosirumpa. b) batu mpeumba (batu karang) ala ledo rarumpana bo matetuobo sakayara.

2 Tina, iamo nirapaka topotipale pogoli sakaya haitu. Ane masala mpogoli ia, sakaya pangane kana mosirumpa, bo mombarupa batu pangane. Bara matetuobo nitompesaka balumba. Apa tina pangane topotipale/ mangisani nuapa-nuapa bo nantarima to nidekei bo nikava toma pangane rapombaganai isi banua haitu. Masala tipale bo masala pake tina pangane, rapana doi. Kana matetuobo eva sakaya haitu bo magero. Toma (berei langgai) pangane marau. Najadimo posinggarau sampe nagero pobanua.

3 Ana, iamo to nirapaka topokarajaa riara sakaya haitu. Ira aga mantuntuni dota kapitee (topotaropo) bo topotipale pogoli sakaya haitu.

Pura-pura katatalu ngaya jonjo pokarajaa haitu namala nikarajaani ane naria sintuvu. Pura-pura pokarajaa namala nipovia ane tesa pepangajari haitu rapariara. Iamo:

- a mosiepe
- b mosisabara
- c mositurusi dota (matundu)
- d mositulungi
- e mosipotove

Ane kaalima ngaya tesa pepangajari hitu rapariara, ledo bo ledo katuvu riara pobanua masana, ledo naria kakuya-kuyana sampe ri ana, tupu, bo ri muli-mulita sampe ri kasaе-saena.

Nasudu ri siimo, sakide tesaku ka kita pura-pura.